

**NATIONAL ASSEMBLY OF
SEYCHELLES**

Wednesday 03rd April 2024

The Assembly met at 9am

National Anthem

Moment of Reflection

Mr Speaker in the Chair

MR SPEAKER

Bonzour tou Manm Onorab. Bonzour bann zofisye Lasanble, nou piblik. E bonzour nou bann viziter ki osi en group etidyan Glacis ki avek nou.

Byenveni dan Lasanble e Onorab Esparon in demann mwan laparol pou zis dir en pti *greeting* nou viziter. Onorab Esparon.

HON REGINA ESPARON

Mersi Mr Speaker. Bonzour tou dimoun a lekout, tou Manm. E mon ti a kontan swet labyenveni bann etidyan lekol Glacis, lekol sorti dan P6 akonpanyen par zot de ansennyen Ms Diana Cecile avek Ms Florence Labiche.

Fotespere zot a pas en bon lazournen e zot ava aprann bokou avek nou isi dan Lasanble. Mersi.

MR SPEAKER

Mersi Onorab. Nou a pran Prezantasyon Papye. Madanm Deputy Clerk.

MADAM DEPUTY CLERK

Mersi Mr Speaker. Bonzour tou bann Manm Onorab, tou *staff National Assembly Service* e bann zanfan sorti kot Lekol Glacis Primer. Prezantasyon papye i konm swivan;

Central Bank of Seychelles Annual Report and Financial statements for the year ended December 31st 2023.

The Information Commission Seychelles Annual Report 2023. Mersi Mr Speaker.

MR SPEAKER

Mersi. Nou ava prosede avek nou *Order Paper*. Nou annan en stement par Minis Naadir Hassan. Mon ava rapel madanm raporter pou envit Minis antre. Bonzour Minis pou Finans, Plan Nasyonal e Komers Mr Naadir Hassan.

E Ms Cillia Mangroo *Executive Director* dan Sekretarya Minister. E Mr Paul Barrack koman en *Commissioner of Customs dan Seychelles Revenue Commission*.

Mersi pou zwenn nou ozordi pou en prezantasyon en stement lo *Policy and Procedures for Clearance of*

Goods by Diplomats, Consulars and International Organisations ki pou fer par Minis Hassan. Minis, mon donn ou laparol pou ou stement.

MINISTER NAADIR HASSAN

Mersi Mr Speaker. Bonzour Mr Speaker. Bonzour le de dirizan dan Lasanble. Bonzour tou bann Manm Onorab. Bonzour bann dimoun dan Galeri e bonzour tou dimoun ki a lekout.

Mr Speaker, Lalwa Privilez e Iminite 1980 e osi son bann lamannman, i sa Lalwa ki regulariz bann misyon diplomatik, konsil ek bann lorganizasyon enternasyonal.

Sa Lalwa i etabli bann kriter, drwa avek egzansyon ki bann misyon diplomatik ek endividi ki kouber anba sa Lalwa, ki baze lo Konvansyon Vienne ki Sesel in sinyen.

An plis Minis, Minister Zafer Etranzer par en lord, i kapab akord privilez ek iminite lo en pouvwar souvren, oubyen okenn endividi anplwaye avek sa pouvwar souvren, ki dan lopinyon sa Minis, bann tel iminite e privilez i nesese an akor avek sa ki ganny akorde ek Sesel par sa pouvwar souvren.

Lalis sa bann endividi ki ganny akorde sa bann privilez e iminite i trouve dan *S.I.* 10

2021 e amande par *S.I.* 96 2021.

Mr Speaker, an sa ki konsern lenspeksyon komodite ki bezwen pas atraver Ladwann paragraf 1 Lartik 35 sa, 36 sa Lalwa i dir;

“An konformite avek Lalwa e regilasyon ki’n ganny adopte egzansyon i ganny akorde lo fre Ladwann taks avek lezot sarz sof bann sarz stokaz, transportasyon e lezot servis lo (a) keksoz ki pou bezwen ofisyel e misyon.

Keksoz pou bezwen personnel en arzan diplomatik oubyen Manm son fanmir ki form parti son lakour, enkli keksoz ki pe servi pou li etabli li Sesel.”

Paragraf 2 lartik 36 i dir, ki bagaz personnel en arzan diplomatik i ganny egzansyon lo lenspeksyon, amwen ki i annan for soupsyon ki ladan i annan keksoz ki pa ganny kouber anba paragraf 1 oubyen sa bann komodite son lenportasyon.

Oubyen eksporte i ilegal anba Lalwa Sesel; oubyen Lalwa sa pei ki pe resevwar sa komodite.

Sa bann lenspeksyon i strikteman bezwen ganny dan prezans arzan diplomatik oubyen son reprezantan. Neanmwon sa egzansyon anba lartik 36 Ladwann e lezot lazans ki sirvey nou frontyer,

pe enspekte bann komodite ki pe antre oubyen sorti lo nou lafrontyer, pou asire ki okenn komodite ki restrikte i annan tou son bann dokimantasyon nesese.

Dan lepase Mr Speaker, sa konsern kontrol frontyer vizavi drwa bann arzan diplomatik e endividi, ti annan privez ek iminite in anmenn serten defi.

Sepandan, swivan en kantite diskisyon avek bann Lanbasad e lorganizasyon enternasyonal atraver Minister responsab pou Zafer Etranzer, ziska prezan bann prosedir lenspeksyon pe mars byen.

Kot bann privez ek iminite pe ganny respekte tout-an asir sekirite frontyer pei. A tou moman prosedir Ladwann in e pe ganny swiv e dokimantasyon in ganny soumet dapre Lalwa. Mersi.

MR SPEAKER

Un instant. Mersi Minis. Mon pou permet avan nou komans kestyon - nou pou annan en peryod kestyon wi, avan nou pou pran kestyon nou a pas dan Staz Komite pou kapab permet lezot zofisye antre.

Anba *Order 84* mon krwar nou devret fer sa lo en Mosyon. Onorab Georges, oule? Ou ti anr *sorry* mon, wi mon a donn sa privez Onorab Lemiel. Mersi.

HON SYLVANNE LEMIEL

Mersi Mr Speaker. Bonzour Mr Speaker. Bonzour Minis avek ou delegasyon, tou bann dimoun ki dan Galeri, tou mon bann dimoun mon bann Manm Onorab e tou dimoun ki pe ekout nou.

Mr Speaker, mon ti'n lev mon lanmen pou mon demann ou pou nou kapab pas dan en Staz Komite e pou nou kapab demann Minis avek son bann dimoun ki la devan kestyon. Mersi.

MR SPEAKER

Mersi. Wi, Onorab Gill ou segonde?

HON CHURCHILL GILL

Wi, Mosyon i segonde Mr Speaker.

MR SPEAKER

Mersi. Nou pa bezwen vot sa Mosyon in ganny aksepte. Eskiz mwan, mon'n mal enterpret ou lev lanmen mon ti krwar ou'n lev lanmen pou kestyon.

(comments off-mic)

MR SPEAKER

We have to vote. Bon ale mon a swiv zot nou a pran en vot.

Tou Manm ki an favor lev lanmen silvouple? Okenn Manm ki kont? Madanm Deputy Clerk i demande ki

nou vot ankor pou li ganny kont byen. Manm ki an faver lev lanmen silvouple.

Mersi. Okenn Manm ki kont. Lo Mosyon pou pas dan Staz Komite 29 Manm in vot pour, 0 kont e 0 *abstain*. Alor nou a pas-

(comments off-mic)

MR SPEAKER

I annan en? *Sorry*. Lo Mosyon pou Lasanble pas dan Staz Komite 27 Manm in vot pour, 0 kont e 2 abstansyon. Nou a pas dan Staz Komite. Bon, nou a pran kestyon bann Manm.

Nou annan ziska 10 er pou sa so letan i limite, alor mon pou demann zot gard zot kestyon bref e direk. E mon krwar nou a kapab pran otan kestyon ki posib dan letan ki nou annan. Onorab Cosgrow.

HON WALLACE COSGROW

Bonzour Mr Speaker. Bonzour Minis. Bonzour *Executive Director*. Bonzour Mr Barrack *Commissioner of Customs*. Bonzour tou Onorab. Bonzour tou bann etidyan Glacis ki'n zwenn nou ozordi bomaten. Bonzour tou Manm piblik.

Mr Speaker, mon ava demar sesyon kestyon bomaten anvi ki mon war lot kote latab ki personn pa pe lev lanmen. So mon a demar sesyon kestyon bomaten Mr

Speaker, avek sa kestyon swivan;

Minis in donn nou en stement bomaten an se ki konsern bann privez e iminite bann diplomat, bann *dignitaries* anba Lalwa *Privileges and Immunities Act*.

E Minis in donn nou bann lenstans kot sa Lalwa i ganny aplike. E mon sipoze Minis pe fer referans avek lenstans, lensidan ki'n ganny pibliye ki'n ganny piblisite pandan sa detrwa zour la. Kot nou war en zournalis in ganny arete pou serten keksoz ki'n met devan-devan piblik. Kot nou'n war bokou bann materyo dapre Minis, materyo personnel.

Bann *item* personnel pou *allegedly* pou en diplomat *UAE* e ki Minis pe dir nou bann *item* ki ganny kouver anba, anba sa Lalwa se bann *item* personnel pou bann Lanbasad avek bann Konsila.

So eski Minis pe dir avek nou ki tou sa kantite *pick up*, mon ti kont apepre 16 *pick up* ler mon'n get portre avek tou sa bann materyo sa bann *item* ki ti dan sa bann transpor, ti bann *item* ki annan pou fer avek keksoz personnel pou Konsila pou sa leta?

E eski Minis pe dir tou bann *item* ki ladan, in ganny byen verifye, in ganny byen kataloge, byen *log* dapre bann, bann Lalwa bann regilasyon

Customs Authorities? E ki sa zour ti annan zofisy *Customs* ki ti pe swivre tousala.

E zofisy *Customs* i satisfè ki tou sa bann keksoz ki'n ganny antre i, i ganny antre byen legalman dan pei? Mr Speaker, mersi bokou.

MR SPEAKER

Mersi pou kestyon. Minis.

MINISTER NAADIR HASSAN

Mersi Mr Speaker. Mersi Onorab pou ou kestyon. Zis en pti koreksyon Onorab, mon tann ou dir en zournalis in ganny arete pou anmenn sa zistwar. Sa ki mon'n ekoute lo televizyon i dir *criminal trespass*, so i en, i enkorek ou stement premye.

Lo kote si tou prosedir *Customs* dan sa sirkonstans in ganny swiv, mon ava envit Mr Barrack ki *oversee Customs* pou li eksplike ki prosedir ki'n ganny swiv.

E kekfw Mr Barrack osi ava eksplik nou, si dan lepase osi menm prosedir in ganny swiv pandan sa dernyen 10 an par egzantp. Ki kantite *pick up* ki'n antre, si la i annan plis *pick up* ki'n antre *or, or* avan ti annan mwens.

So Mr Barrack ou, mon ava envit ou pou donn detay lo sa bann keksoz. Mersi.

MR SPEAKER

Mersi. Komisyoner ou annan laparol.

COMMISSIONER OF CUSTOMS PAUL BARRACK

Mersi Chair. Mersi Onorab. Mersi Minister. Bonzour a tous ki a lekout. Pou reponn ou kestyon Onorab, i annan dokimantasyon ki ti ganny prezante pou sa bann *consignment* ki'n antre ki ou pe koz lo la.

E verifikasyon ti ganny fer pou parey Onorab in dir bann verifikasyon detaye, lo bann keksoz ki pou en *dignitary* i restrikte lo nou kote.

Bann keksoz ki *restricted* ki aparet lo lalis *prohibited restricted regulation* sa bann keksoz, sa bann *dignitaries* i oblize fer nou konnen poudir i annan sa bann keksoz, ki zot oule swa enporte oubyen eksporte.

E pou bann lezot *item* ki pa restrikte ki bann *item* personnel, Sa bann keksoz nou pa fer bann *direct inspection* lo la. Zot, zot swazir si zot anvi montre nou sa bann keksoz. Nou war nou tyeke nou verifie *against* dokimantasyon ki ganny prezante.

Me selman bann keksoz ki restrikte, zot oblize met dan nou latansyon pou ki si i annan kontrol *biosecurity* pou fer i ganny fer. Si i annan lezot

kontrol osi pou fer i ganny fer. Setadir si i annan permi ki merit prezante pou sa bann keksoz sa permi i ganny enspekte.

Dizon ou annan en *item* ki li i bezwen en permi pou eksporte sa *dignitary* i bezwen prezant son permi atraver nou *Protocol Officer* e nou, nou tyeke avek nou dokimantasyon ki nou annan e sa lenspeksyon i ganny fer dan sa format ki mon pe dir. Mersi Onorab.

MR SPEAKER

Mersi.

COMMISSIONER OF CUSTOMS PAUL BARRACK

Pou reponn sa lot pti bout kestyon eskiz mon kot kantite *pick up* ki ti annan *whether* in ogmante konpare ek avan. Posibleman i annan de moman ki sa bann dimoun i vin isi pli souvan, *therefore* i annan plis keksoz ki zot vin avek.

I annan de lenstans ki zot vin mwens letan kot nou e *therefore* i pou annan mwens *pick up* selman i varye. Mersi.

MR SPEAKER

Ou annan klarifikasyon Onorab Cosgrow.

HON WALLACE COSGROW

Yes Mr Speaker. Mon annan klarifikasyon aköz Mr Barrack pa'n tous sa zafer lepase.

Minis in entrodwir lepase; konparezon avek lepase, Mr Speaker, lepase i devan nou la *Le Seychellois Hebdo* in raport lo la plizyer fwa e son editer sa letan pe asize lanmenm la lot kote latab Mr Speaker.

E zot in fer en kantite konplent dan lepase lo lafason ki sa ti ganny administre ti ganny sorti e zot in menm tir portre bann avyon, bann *pick up* bann *luxury cars*. E zot ti dir Mr Speaker poudir...

MR SPEAKER

Onorab nou, nou pa pou al dan sa bann, dan sa ki *Le Seychellois Hebdo*. Wi Minis...

(comments off-mic)

MR SPEAKER

... Onorab be silvouple-silvouple si, si ou annan remark pou fer avek sa ki Minis in dir, fer remark lo sa ki Minis in dir.

Nou pa pou pran rapor bann zournal an konsiderasyon, mersi. *Ok* ou kestyon silvouple.

HON WALLACE COSGROW

So eski Minis i kapab dir avek nou, si bann transpor ki antre dan sa landrwa restrikte lo erport i bezwen ganny *special permission*? Aköz yer mon ti fer referans avek bann transpor ek SCAA ki ti la,

bann transpor ki ti pas lo erport pandan sa *flood*.

E akòz nou konnen Mr Speaker, ki Drayver Dr Patrick Herminie, pa ganny drwa antre kot *VVIP* pou li al *drop* Dr Herminie ler i pe *travel*. So eski i annan *special permission* ki ganny donnen pou tou sa bann transpor ki antre lo erport? Mersi.

(Interruption)

MR SPEAKER

Order! Order! Bon Onorab, Onorab silvouple, nou pou osi pa antre dan ki prosedir ki ganny swiv pou lezot dimoun *dignitary* oubyen pa *dignitary*. Selman mon pa konnen si sa keston ki'n poze o komansman eski lekel transpor ki annan drwa antre dan sa *area*.

Minis, si ou war en repons pou sa oubyen zofisyè.

MINISTER NAADIR HASSAN

Mersi Mr Speaker. Mr Speaker mon napa lenformasyon lo kote ki transpor ki, ki *allowed* dan lo, lo *airside* erport. Mon mazin ki sa keston ti ava pli-pli byen poze a Minis Transpor.

Lo kote *VVIP* sa osi mon napa okenn lenformasyon si Mr Herminie i en *VVIP*. Mon pa konnen ki lalis protokol. Mersi.

MR SPEAKER

Tre byen, mersi. Onorab Woodcock ou keston. Onorab, Onorab ou keston.

HON WAVEL WOODCOCK

Mersi pou ou keston. Mon kontan antann ki Mr Herminie pe reve pou li vin en *VVIP* ankor pou son-

MR SPEAKER

Ou annan keston?

HON WAVEL WOODCOCK

Mersi Mr Speaker. Bonzour Minis ou delegasyon e tou dimoun a lekout. Minis mon annan la devan mon en *S.I, S.I. 144 of 2020. Privilege and Immunities of Consular and International Organization Act* ki ti ganny sinyen par Vincent Meriton Vis Prezidan sa letan, le 5 Oktob 2020 avan ler ki menm Gouvernman *LDS* ti vin o pouwar.

E ladan i listre tre byen bann privez ki bann *dignitaries* i gannyan atraver *Customs* ki detaye ki kler. Annefe lo sa lalis anba *schedule 1*, i annan en lalis *of dignitaries* ki enkli 1, 2, 3, 4, 5 – 5 *Sheikh* avek de bann lezot zofisyè dan Gouvernman *Sheikh Khalifa bin Zayed ibn Sultan Al Nahyan*.

Mon keston pou ou Minis, eski sa bann protokol - sa bann privez ki ozordi nou

Gouvernman pe *afford* li ek sa bann *dignitaries* ki pe vin dan nou pei ozordi, in la depi- I fek ganny entrodwir anba nou Gouvernman, ouswa sa Lalwa i aplikab i en norm enternasyonal ki aplikab pou lezot pei enternasyonal? Mersi bokou.

MR SPEAKER

Mersi. Minis, repons?

MINISTER NAADIR HASSAN

Mersi Mr Speaker. Mersi Onorab pou kestyon. Wi, Onorab, tou sa bann privelez i anliny avek bann norm enternasyonal anba *Vienna Convention*.

I osi mon kapab konfirman i pa, i pa nou Gouvernman ki'n anmenn sa bann privelez, me in la pou plizyer lannen. Mersi.

MR SPEAKER

Onorab Uranie.

HON ROCKY URANIE

Mersi Mr Speaker. Bonzour Minis ek delegasyon. Bonzour tou koleg Onorab, bann zanfan Glacis, zot ansenyan ki dan Galeri. Mr Speaker, lo kestyon Onorab Cosgrow Minis in dir ki li ler in get nouvel in war en dimoun ki pe ganny sarze pou *criminal trespass*.

Mwan osi ler mon'n gete mon'n war e sa dimoun pou

mwan an kestyon i Mr Volcere. Be akoz nou pa anmenn Mr Volcere isi anndan nou a demann li kestyon. Akoz i zisteman akoz Mr Volcere...

(comments and laughter)

MR SPEAKER

Onorab, sa eskiz mwan *sorry*, *sorry* mon Onorab i annan en prosedir lekel ki vin dan Lasanble. Silvouple si ou annan en kestyon pou demann Minis demande e pa akoz okenn dimoun pa'n vini.

HON ROCKY URANIE

Ou konnen Mr Speaker, akoz mon rapel ti annan bann dimoun menm ler *TRNUC* ti fini, zot ti ganny demande pou vin la anndan pou vin reponn kestyon. Se zisteman akoz Mr Volcere in filme sa in anvoye ki Minis in bezwen vin fer stement. Akoz si Mr Volcere pa ti'n *leak* sa, Minis pa ti pou bezwen vin fer stement.

Tou keksoz ti pou ale si tou keksoz ti annan. Savedir akoz en keksoz pe ganny kasyet ki ou'n war in ariv la! Mersi Mr Speaker.

MR SPEAKER

Mersi. Bon, Onorab napa en kestyon mon a demann Onorab Andre si i annan en kestyon.

HON CLIFFORD ANDRE

Mersi Mr Speaker. Mon annan en kestyon; mon kestyon i direktman baze lo *Privileges and Immunities Diplomatic Consular and International Organizations Act 2020*. Mr Speaker, mon ti a kontan demann Minis, anefe letan mon pe get sa dokiman i date le 2 Oktob 2020.

So in fer avan administrasyon aktyel i la. E i ti ganny sinyen par Vincent Meriton ki ti Vis Prezidan pandan sa letan. Me letan nou pe gete seksyon 4 dan sa dokiman, dan sa *Act* i dir, “*where a dignitary is entitled to any other privileges or immunity not provided for under paragraph 3, Seychelles shall afford such other privileges and immunity to the dignitary in accordance with any written agreement or international customs and practices.*”

So alor eski pou dir sa byen, oubyen pou fer kler avek piblik se si i napa en provizyon ki ganny fer anba seksyon 3 e i annan en lagreman ant de pei. Savedir Sesel avek en lot pei, eski anba sa lagreman Sesel i kapab donn sa bann privez e iminite sa bann lot pei, oubyen sa dimoun ki pe demann sa, pou ki i fer ki sa, sa lagreman oubyen sa lakor ant sa de pei i ganny respekte? Mersi.

MR SPEAKER

Mersi Onorab. Minis.

MINISTER NAADIR HASSAN

Mersi Mr Speaker. Mersi Onorab pou kestyon. Wi, Onorab, mon kapab konfirmen poudir sa, sa *order* in ganny fer spesifikman pou sa. Se ki sa bann privez ki ganny donner i ganny donner dan en kad legal, *ok?*

E Mr Speaker, mon ti a zis kontan osi klarifye en keksoz, rezon ki mon la ozordi pe eksplik sa se i kler ki nou bezwen - i *obvious* ozordi ki i annan en stratezi pou kree konfizyon pou fer *misinformation, disinformation* dan pei, *ok?*

E sa i kler. I *obvious...*

(comments off-mic)

MINISTER NAADIR HASSAN

...i *obvious* e i kler.

MR SPEAKER

Ok.

MINISTER NAADIR HASSAN

E mon la pou mon donn Lepep Seselwa *facts, ok?* E fe se i annan, i annan en Lalwa ki kouver bann *goods* ki antre dan pei lo nivo diplomatik. E sa i ganny kouver anba, anba sa Lalwa. E ler ou dir Gouvernman pe kasyet be ki mannyer Gouvernman i kapab kasyet en keksoz ki legal? *Ok?*

So Mr Speaker, zis pou klarifye sa, mon krwar i kler pou ki rezon mon la e zis pou met fe devan Lepep Seselwa ki zot menm zot kapab fer zot prop konklizyon. Mersi.

MR SPEAKER

Mersi. Onorab Lemiel.

HON SYLVANNE LEMIEL

Mersi Mr Chair. Mon kestyon i vize ankor ver en stetment ki'n deza ganny fer avan. Wi, Minis mon konnen i annan sa Lalwa e bann Arab par egzanp, zot annan privez parske zot annan landrwa reste isi e tou sa.

Me letan mon *go back* dan lepase letan nou, nou ti o pouwar e Mr Ramkalawan ki ozordi i Prezidan Sesel, i ti fer resorti li ki *Le Seychellois* ler i ti pibliye e ti fer sir pou fer Lepep Seselwa konnen poudir i annan keksoz ki pe *go on* e dapre zot pou zot sa zot ti dekrir li koman koripsyon.

E dapre zot, zot ti le *shed some lights* lo e ti menm ganny dir ki *Le Seychellois* pa per bef ek labarb. So mwan, mon ti pe - mon pe regarde la ozordi, eski par egzanp en aksyon ki'n ganny fer pou met Seselwa okouran keksoz ki pe pase, menm si sa bann dimoun zot annan zot drwa, me nou konnen Ladwann zofisyé in dir poudir pa dan tou sa bann

keksoz ki ganny fouye zis dan serten.

Akoz ou pa konnen dan serten ki pa'n ganny fouye ki zot pa deklare ki i annan. Sa i en risk pou nou osi, so eski i normal pou nou dir poudir i annan serten *issue* koripsyon ki pe deroule. Akoz sa letan la zot ti dir koripsyon. Ozordi eski ou, ou poudir ki i met keksoz i annan koripsyon ki pe deroule la? Mersi.

MR SPEAKER

Mersi. Minis?

MINISTER NAADIR HASSAN

Mersi Mr Speaker. Mersi Onorab pou ou kestyon. Onorab, sa ki *Customs* in dir, se ki dapre Lalwa ki egziste tou prosedir in ganny swiv zot satisfé ki tou prosedir in ganny swiv.

So si mon pa konnen Mr Barrack, si oule reponn si i annan koripsyon lo kote *Customs or not*, sa mon krwar ou dan pozisyon pli, pli bon pou eksplike aköz *Customs* ki fer sa loubraz pou *clear* marsandiz lo lafrontyer. Mersi.

MR SPEAKER

Mr Barrack, i oule azoute?

COMMISSIONER OF CUSTOMS PAUL BARRACK

Mersi *Minister*. Mersi Chair. Zis pou klarifye en pti keksoz

an term lenspekasyon ki *Customs* i fer an zeneral, i an lakor avek norm enternasyonal dan bann komodite ki antre sorti dan tou bann pei lemonn.

Sa ki nou, nou fer isi i an lakor avek norm enternasyonal. Pa tou, pa tou komodite ki antre dan en pei oubyen ki sorti dan en pei ki ganny enspekte 100poursan. Tou pei dan lemonn i adopte en sistenm *risk assessment* lo tranzaksyon komers an zeneral, ki ganny fer ant en pei ek en lot.

Bann komodite ki *high risk* i ganny enspekte, bann ki *low risk* i ganny traverse san ki *physical* lenspekasyon i ganny fer. I annan de pei ki zot annan teknolozi, *scanner at the border* e zot fer *scanning* sa bann keksoz ki traverse ki zot pa pe *physically* ouver pou gete.

So sa i en norm enternasyonal dan tou pei, pa zis Sesel ki *apply* sa bann keksoz dan sa fason. I en norm ki ganny aplike dan tou pei. La mon pe koz komers, tranzaksyon komers an zeneral ki pase dan tou pei. Menm Lanmerik avek tou zot abilite finansyel teknolozi pa tou, pa tou *container* ki antre Lanmerik ki ganny neserman enspekte *physically* enn par enn.

Lerop osi parey, Larisi parey, Sesel osi i pa diferan. Nou pe adopte norm enternasyonal. Mersi.

MR SPEAKER

Mersi *Commissioner*. Onorab Vidot.

HON AUDREY VIDOT

Mersi Mr Speaker. Mr Speaker, bonzour. Bonzour Minis ek ou delegasyon, tou Manm Onorab. Bann etidyan Glacis ek ansenyan bonzour e tou dimoun ki a lekout. Minis, ou ladministrasyon ti ganny elekte pou fer pli byen, *ok?*

E si Onorab Roucou atraver ou Mr Speaker, in bliye ki *LDS* ti dir konsernan privez pou ganny sanze dan 2013 avek 2016 ler Prezidan ti dir sa bann privez fodre sanze. Alors mon kekyon Minis, ler ou Prezidan ki ti dirizan Lopoziyon ti annan problemm avek sa bann privez ti dir pou sanze, akoz ki ozordi Seselwa li i bezwen pey R500 an plis?

E sa privez ki Prezidan ti war ti koripsyon la ozordi i normal Dir nou kwa ki'n sanze Minis? Mersi.

MR SPEAKER

Mon, mon pa tro sir si, si *issue* R500 i antre ladan. nou lo size *goods* pou konsiler diplomat lorganizasyon enternasyonal. Minis ou kapab adrese.

MINISTER NAADIR HASSAN

Mr Speaker, mon pa tro - Ki kestyon mon reponn lo R500? *I mean* mon vin koz lo prosedir pou bann ki annan akse diplomat e iminite.

HON AUDREY VIDOT

(Off-Mic)

MR SPEAKER

Bon, permet Minis reponn. Minis, si ou annan en repons pou donner si ou'n fini.

MINISTER NAADIR HASSAN

Be mon'n donner Mr Speaker. Napa, napa en kestyon ki'n ganny demande lo sa kestyon.

MR SPEAKER

Tre byen. Bon, mersi nou a avanse. Onorab Gabriel.

HON CONRAD GABRIEL

Mersi Mr Speaker. Mon dir bonzour tou dimoun dan Galeri, tou dimoun Lasanble, tou dimoun Pointe Larue ki pe ekout nou. En pti pe, en pti pe delika sa *issue* Mr Speaker, akoz avan parey mon pe konpran la. Avan i ti koripsyon kot nou ti bezwen *adjourn* en sesyon Lasanble pou al gete ki pe pase, kan ozordi i *ok*.

So premyerman, Lapolis ti'n enform popilasyon apre nou dan sa Lasanble nou'n lev sa size ki annan en zournalis ki'n ganny arete.

Minis, ozordi nou'n war, in taye in vin fer en stetment pou zistifye ek piblik ki pe reazir bokou atraver sa. Minis, akoz tousala si napa nanryen ki pe pase? ki zot pe kasyet? Fodre vin kler ek sa pep. Fodre zot...

(comments off-mic)

MR SPEAKER

Onorab laliny, *order, please!* Laliny ou kestyon pa pe al dan bon direksyon. Si ou annan en kestyon pou Minis donner. nou pa pe- mon fer kler nou pa pe konsider kestyon zournalis nou pe konsider kestyon *import of goods*. Onorab si ou annan en kestyon.

HON CONRAD GABRIEL

Wi, be Mr Speaker, nou pa pou, nou pa kapab annan de pwa de mezir dan sa pei, nou bezwen annan en sel pwa pou tou Seselwa.

MR SPEAKER

Bon, *ok*. Onorab Arissol ou kestyon.

HON SANDY ARISSOL

Mersi Mr Speaker. Bonzour Minis avek ou lekip. Bonzour tou dimoun ki pe ekoute. Mr Speaker, mon'n tann koz an relasyon avek bann rezidans. Mon ti a kontan letan nou lo sa bann size diplomat privez iminite, mon ti a kontan

demann avek Minis, apard rezidans bann Arab ki mon'n tann mansyonnen, dan mon lespri mon konnen i annan rezidans Angle, nou annan Franse, nou annan Endyen, nou annan Kiben, nou annan Sinwan zis pou mansyonn detrwa.

Eski sa menm privez ki nou pe koz lo la ozordi bomaten pou en nasyonalite, eski menm privez i osi ganny adrese, i ganny servi i ganny swiv pou lezot rezidans pou lezot nasyonalite ki nou annan dan nou pei?

Dezyenmman, eski sa menm privez ki nou, nou akord bann diplomat dan nou pei Sesel, eski i menm privez, i menm *courtesy*, i menm iminite ki nou koman bann diplomat ki sorti isi, nou al dan lezot nou pas atraver?

Oubyen i annan sa pwa ki Onorab Gabriel pe rode? Mersi bokou.

MR SPEAKER

Mersi. Minis, repons.

MINISTER NAADIR HASSAN

Mersi Mr Speaker. Mersi Onorab pou ou kestyon. Wi, Onorab, nenport ki nasyonalite ki tonm anba sa *order* privez ek iminite, i benefisye i ganny trete parey. E lo ou dezyenm kestyon *regarding* si i annan

resiprosite dan sa bann privez.

Wi ler nou, nou diplomat i osi dan bann lezot pei, zot osi zot ganny menm privez. Akoz parey mon'n eksplike, sa i tonm anba en norm enternasyonal ki tonm anba *Vienna Convention*. Mersi.

MR SPEAKER

Mersi. Onorab Aglae.

HON EGBERT AGLAE

Mersi Mr Speaker. Bonzour Minis ek ou *panel*, e bann etidyan ki dan Galeri, e tou dimoun a lekout. Minis, mon ti dan sa 6enm Lasanble letan nou ti diskrit en deba Bidze kot Dirizan Lopozisyon ozordi Prezidan ti fer aret en sesyon pou al get en avyon swadizan sorti *UAE* pou gete.

E sa letan se Minis Dogley ki ti la nou ti pe diskrit - Minis Benstrong ki ti la. E size ki ti ganny met devan Minis, sete pou al gete si napa potansyel bann size *biosecurity*, ok?

Eski Minis ou kapab dir nou si zot sa moman letan ki sa *cargo* ti pe antre, si zot pa ti pe konsider osi bann potansyel danze bio sekirite ki ti ganny leve a sa moman letan, letan sa *cargo* ti vini?

E eski ti annan prezans okenn Lazans Biosekirite a sa letan pou get sa bann *consignment* ki ti antre? E

dernyerman mon ti a kontan konnen Minis, eski sa letan akoz i deza annan en, en *sort of en manifest* tou *cargo* ki pe antre?

Eski sa ti ganny donnen dayer ki *Customs* e kan sa ti date?

MR SPEAKER

Mersi. Bon, Minis, i annan de pwen la biosekirite e *manifest*.

MINISTER NAADIR HASSAN

Mersi Mr Speaker. Mersi Onorab pou kestyon. Vi pa, pa Minis ki al fer sa bann *check* mon ava envit...

HON SEBASTIEN PILLAY

(comments off-mic)

MR SPEAKER

Onorab, Onorab Pillay silvouple, silvouple kourtwazi respe, mersi. *Komisyoner Lapolis, Komisyoner *Customs* ou annan laparol pou reponn. Komisyoner ou annan en repons?

COMMISSIONER OF CUSTOMS PAUL BARRACK

Mersi Chair. Chair sa, sa tranzaksyon ki nou pe koz lo la ozordi i en *export transaction*, *which means* sa bann keksoz ti deza dan pei ki ti pe ganny rapatriye pou retourn dan sa pei kot i ti sorti. Mersi Chair.

MR SPEAKER

Mersi. Mon le dir mon pa war mannyer Minis ki'n adres sa ki'n mank respe. I zis dir pa li ki al fer lenspeksyon Komisyoner ki fer lenspeksyon ki anba sa lenspeksyon. Komisyoner a reponn mersi. Klarifikasyon Onorab, wi?

HON EGBERT AGLAE

Mersi. Mon ti a kontan kler wi ek non pa en larepons, eski ou pe dir nou sa avyon ki ti vini ti vin en avyon vid, ki ti pe zis vin anmas swadizan *cargo* ki ti pe kit Sesel pou al dan sa pei destinasyon? Kler. Mersi.

MR SPEAKER

Sorry mon pa'n mon a les Minis ek panel adres sa, mon pa'n tro swiv. I annan okenn repons. *Sorry, panel* zot zis bezwen dir mwan si zot annan okenn repons lo sa kestyon. Minis, silvouple zis dir mwan wi oubyen non.

MINISTER NAADIR HASSAN

Non, Mr Speaker, napa. Mr Barrack in fini reponn kestyon.

MR SPEAKER

Mersi.

HON EGBERT AGLAE

(Off-Mic)

MR SPEAKER

Point of order wi ok, wi, ok *point of order* Onorab?

HON EGBERT AGLAE

Mr Speaker, Minis dan son stement in sit Lalwa *Customs regulation diplomatic* ki fer ki sa Lalwa li i pran kont bann keksoz ki en diplomat i anvi fer antre dan pei, *ok?* Be ki mannyer Minis i fer sa kalite stement si ti napa keksoz ki ti pe antre.

Eski sa Lalwa i fer keksoz ki pou kit pei ouswa sa ki pou antre? Akoz lenformasyon ki'n ganny donner la Minis i bann keksoz pe antre. E Mr Barrack i dir napa nanryen, be i annan en konfizyon la.

MR SPEAKER

Ok kestyon, kestyon in ganny reponn. Minis, oule adres sa pwen.

MINISTER NAADIR HASSAN

Mr Speaker, mon krwar byen ekoute i fer byen konpran. Mwan, mon eksplik prosedir, *ok. Maybe...* (la ou pa montre *disrespect* la Onorab? Ler ou riye ou riy dan figir ou kanmarad. Ou pa montre *disrespect* la. La i *ok* la, Onorab *Leader* Lopozisyon.

(comments off-mic)

MR SPEAKER

Silvouple, *order!*

MINISTER NAADIR HASSAN

La mon ganny dir mon koz lalang. La *disrespect* la?

MR SPEAKER

Order! Bon sa sesyon i bezwen donn i pe deroul annord. Onorab Pillay, ou bezwen montre kourtwazi Minis e mannyer ou riye, mannyer ou riye i montre en mank respe. Si, si nou pa ganny lord, nou pou napa sesyon kestyon, mersi. Bon, nou a sey en lot Manm Onorab Spiro ou kestyon. Onorab Spiro.

HON RACHEL SPIRO

Bonzour Mr Speaker. Bonzour Minis avek ou delegasyon. Bonzour tou dimoun ki a lekout e bann viziter dan Galeri. Bonzour tou koleg Onorab osi. Mr Speaker mwan, mon'n ekout deba la e mon'n ekout larepons stement ki Minis in fer.

E mwan, mon napa problemm avek sa Lalwa ki'n vin anfors 2020. I donn egzanpsyon bann konsil, bann diplomat e serten iminite - sa i pa en problemm. Me mon le konnen ki kantite fwa ki sa bann Konsil, diplomat, i kapab enport keksoz dan pei e pa ganny takse.

Tandis ki sa pti dimoun la deor li, li i bezwen Pey taks a tou moman ki i enport *goods* dan pei e menm ganny mete ankor bann *levy* R500 *taxes* lo

zot. Konmsi kote i arete sa iminite e...

MR SPEAKER

Mersi Onorab. Mon'n fer kler nou pa pe konpar sa ki fer pou diplomat ek sa ki fer pou rezidan Lalwa i diferan, mersi. Minis, ou annan okenn, okenn repons?

MINISTER NAADIR HASSAN

Mr Speaker, premyerman sa Lalwa pa sa Gouvernman ki'n anmennen sa Lalwa ki donn privilez bann diplomat se zot Gouvernman ki'n anmennen. E mon napa problem ek sa, sa se en Lalwa ki baze lo norm enternasyonal.

Savedir i pa aköz ler ou, ou dan Gouvernman i ti annan i ti *ok* la ler ou dan Lopozişyon i pa *ok*. Mersi.

MR SPEAKER

Mersi. Onorab Loze ou keştyon.

HON JOHAN LOZE

Mon seye, mersi Mr Speaker. Minis, *from what* ou'n dir la nou konpran ki vedir tou sa ki pa ti *ok* ler zot ti dan Lopozişyon ozordi in vin *ok*. Mr Speaker, *stemming from* larepons Minis, in les nou konpran ki son prezans dan Lasanble ozordi, se pou eklersi bann fo propagann ki pe fannen pou *mislead* sa pep.

Mr Speaker, be fo propagann depi 2016 pe ganny fannen. Si sa bann keksoz ki pe ganny dir fo propagann *then* depi 2016 pe ganny fannen par parti *LDS* e Prezidan Ramkalawan. Alors mon keştyon Mr Speaker.

MR SPEAKER

Alors ki keştyon?

HON JOHAN LOZE

Tre senp Mr Speaker. Ozordi nou war Onorab Arissol vini pe defann Arab. Sa parti *LDS* li ti ganny elekte pou sanz sa bann privilez ki dimoun ti pe gannyen anba Lalwa Privilez e Iminite 1980.

Zot in anmennen kanpanny pros 30 an lo sa size zot in ganny elekte zot lo pouwar ozordi. Eski zot kapab donn en komitman sa pep kan ki zot pou met an pratik tou sa ki zot in dir pandan sa dernyen 30enn lannen lo keştyon elimin sa bann *unfair privileges* ki sa bann diplomat ti pe gannyen?

Sa i pa mon pozişyon, i pa mon largiman i ou largiman e largiman ou parti Mr Speaker. Alors kan ki zot pou *make good* lo sa ki zot in elekte pou fer, ouswa zot in zis koz lalang ek sa pep pandan 30 an. Mersi Mr Speaker.

MR SPEAKER

Onorab Pillay ou keştyon.

HON SEBASTIEN PILLAY

Mersi Mr Speaker. Bonzour Minis. Bonzour tou bann etidyan lekol Glacis Mr Speaker. Mon en ansyen etidyan lekol Glacis e mon demann bann etidyan pou sezi tou loportinite pou pran pou fer tou sa ki zot kapab pou aprann e devlope aköz *the sky is the limit* koman en etidyan ki sorti Glacis Mr Speaker.

Mr Speaker, bomaten mon ti a kontan klarifye serten pwen ki'n ganny *raise* atraver sa stetment.

Ler Minis in antre dan Lasanble in vin fer en stetment in dir avek Lasanble ek lepep Seselwa ki ti annan keksoz pe antre. E ki ti annan keksoz ki ti pe ganny verifye ki pe antre. Mr Barrack lo larepons kestyon Onorab Aglae i vire i dir i annan keksoz ki bann keksoz ti pe sorti.

Savedir la nou pe konpran dapre mannyer nou pe konpran savedir i annan keksoz pe antre pe sorti.? Be ki kalite privez ki nou pe donner ki tou sa ta pake *almost* en lakaz antye pa, pa ni menm lakaz - 4 lakaz i antre dan pei i antre sorti konmsi napa okenn problem.

E la Mr Speaker, ou a permet mon pou fer mon kestyon lezib fer mon kestyon pou dimoun konpran mon kestyon. Mon pou repet en

parol ki Mr Ramkalawan ti dir sa letan dan Lasanble Nasyonal.

I ti dir

“Le Seychellois Hebdo is doing the right thing - i pe kestyonnen i pe met devan bann facts laverite i fermal me rest assured ok gard antet ki okenn threats okenn keksoz pa pou anpes” sa letan i ti pe dir Gervais oubyen *Le Seychellois Hebdo ‘apply for fairness e shed light lo koripsyon.”*

Mr Ralph Volcere i fer menm zafer i ganny arete i ganny sarze. Kestyon pou Minis eski bomaten ou pe dir nou laverite lo sa ki'n arive avek sa lensidan, ek sa bann pake ek sa bann keksoz antre dan pei? Sa i mon premye pwen.

Mon *go back to* Lasanble Nasyonal deba Bidze 2016 ki ti ganny fer an 2017. Le 4 Zanbye Mr Bernard Sullivan i pibliy en pos lo *Facebook* kot i dir en gro avyon in antre avek en pake, pake, en pake zafer pou Arab e pa pe ganny fouye.

Dan menm semenn Onorab Ramkalawan, i sispann sesyon Bidze pou anvoy bann zofisyé dan Lasanble, sispann sesyon Bidze pou anvoy bann zofisyé pou al verifye lo erport. Eski Minis pe dir mon poudir i pa dakor avek sa ki son Prezidan ti pe dir sa letan?

Eski Prezidan ti pe zis koz lalang sa letan, ler i ti dir poudir bann Arab i fer sa ki zot anv i dan pei ler atraver ou Mr Speaker Onorab Larue ti dir, ti dir lo en pos lo, lo rezo sosyal e dan Lasanble Nasyonal ki bann Arab in menm anmenn sa pti bebet ki nou apel 'together' dan pei.

E ki li i war poudir bann Arab pe ganny tro bokou privelez. Eski ozordi tou keksoz in sanze e LDS i o pouvwar tou keksoz i ok? E mon dernyen kestyon pou...

MR SPEAKER

Ou'n ganny de kestyon deza, de kestyon deza. Mon pa konnen egzaktman - mon pa'n tro kler lo ou kestyon. Minis, Minis mon a permet ou adrese mon pa aksepte alegasyon ki Onorab in fer ki Minis pa pe koz laverite.

Minis in la pou li reponn kestyon avek laverite, Minis si ou annan en keksoz pou reponn ou kapab reponn.

MINISTER NAADIR HASSAN

Mersi Mr Speaker. Mr Speaker, mon pe regard mon stement ki mon'n fer e mon pe regarde ladan kwa ki kontradir sa ki Mr Barrack in dir. Mon pa pe war nanryen. Kekfwa mon pa konnen si Onorab i le mon relir mon stement e i ava dir mon ki bor

dan mon stement ki mon'n kontradir.

Akoz napa nanryen dan mon stement ki'n kontradir nanryen ki Mr Barrack in dir. E pli spesifikman. E mon le zot ekout byen. Mon dir" Mr Speaker an sa ki konsern lenspeksyon komodite ki bezwen pas atraver Ladwann paragraf 1 Lartik 36 sa Lalwa i dir."

E mon *state* li so mon stement pou ganny *made available* to Lasanble Nasyonal e mon ti a kontan konnen avek *Leader* Lopozisyon ki bor ki mon stement i kontradir sa ki avek sa ki Mr Barrack in dir.

Me selman mon ti ava envit Ms Mangroo pou li eksplike pou sa *order privilege and immunity* kwa ki kouver egzaktman anba la. Akoz mon krwar zot pe kre konfizyon.

MR SPEAKER

Mersi. Onorab Georges ou kestyon. *Sorry* Komisyoner. i mon pa konpran ki pe pase la. Minis, ou'n montre lo Komisyoner. *Yes* ar wi Ms Mangroo.

PS CILLIA MANGROO

Mersi Chair. Bonzour tou dimoun. An referans avek sa ki Minis in dir mon pa rappel si in dir zafer lenportasyon dan sa *statement it was both* eksportasyon avek

lenportasyon. I koz lo *clearance of goods*, savedir pe antre pe sorti.

Sa sityasyon ki ti arive ki zot pe refer avek i en eksportasyon ki'n ganny fer e son *manifest* i ava montre avek son *bill of export*. E i en keksoz normal ki ler en dimoun i antre tanporer avek - i kapab pa en diplomat i kapab en dimoun normal - ou kapab antre ek en keksoz ou fer okouran avek Ladwann ki ou pe antre avek serten marsandiz. I ganny mete anba *Customs* zot annan sa lalis, apre ou kapab resorti avek i apel *temporary importation*.

E sa i aplikab pou en dimoun normal osi; dimoun kekfwa ki pe vin fer en *trade show* Sesel. Zot bezwen zot bann keksoz apre zot retourn avek. So ti annan bann kestyon ki ti ganny demande osi avek si sa keksoz i ganny fer ler nou al *overseas* e i konfirman ki wi.

E i annan de ka ki ou pa ganny fouy ditou lo la ler ou al dan pei deor si ou en diplomat. E *in the past* nou ti war ki ti annan en ta keksoz ki ti pe antre ki pa ti pe ganny deklare ek *Customs*.

E mon rappel ki nou ti fer en ta miting avek *Foreign Affairs* nou ti ganny en ta problemanm avek zot pou fer zot konpran ki Ladwann i bezwen konnen kwa ki pe antre.

Nou pa anvi tou lazournen pe fouy lo bann diplomat, akoz i pa byen. Akoz ler nou diplomat i al dan sa bann landrwa zot pa ganny fouye lo la. E selman nou bezwen fer sir pou rezon sekirite lafrontyer ki nou konnen kwa ki pe antre dan pei kwa ki dan sa bann zafer.

E Mr Barrack i konnen nou'n fer en ta miting *through Foreign Affairs* pou nou kapab ganny sa. E mon kapab dir ki la e Mr Barrack i kapab konfirman, ki nou pe ganny bann bon konprenezon avek bann Lanbasad. Menm bann ki sa *order* ki tou dimoun pe fer referans avek i sorti dan Lalwa 1980.

Sa *order* li i ganny fer pou bann dimoun ki pa ganny kouver anba zot Lanbasad, selman ki nou Prezidan i al dan zot pei. E zot, zot donn nou menm e nou Prezidan i al dan zot pei e menm nou bann *VVIPs* zot ganny menm proteksyon e nou bezwen donn zot bann dimoun ki vin isi menm proteksyon.

So sa *order* li i ganny fer ki i annan en lalis dimoun ki tonm anba la, ki pa tonm anba bann *Embassies*. Par egzanp si en *Sheikh Qatar* i vin isi oubyen en Prezidan Irlann i vin isi, so tousala i ganny kouver. E i annan bann dimoun ki nou konnen i vin souvan, zot annan rezidans isi

zot non i ganny kouver la. So i pa zis nou pe donn en nenport dimoun.

E nou'n fer en, parey mon'n dir nou'n fer en ta renyon ek sa bann dimoun. Nou'n met bann pwen devan ki toultan nou bezwen konnen kwa ki dan sa kargezon.

Prezan li Mr Barrack ek son tim i kapab swazir pou li fouy dan sa bann keksoz *on a risk basis or* i fer ale. Selman toultan *Customs* i annan *sight of what is in there*.

MR SPEAKER

Mersi Ms Mangroo. Mon annan detrwa Manm ki reste, mon annan tre pe letan. Onorab Georges ou kestyon?

HON BERNARD GEORGES

Mersi, mersi...

HON SEBASTIEN PILLAY

(Off-Mic)

MR SPEAKER

Onorab Georges ou kestyon. Fer li bref silvouple.

HON SEBASTIEN PILLAY

(Off-Mic)

HON BERNARD GEORGES

Mon pe sey demann mon kestyon me Onorab Pillay pa oule, pa oule mon demann kestyon. I le zis li koze dan sa Lasanble.

MR SPEAKER

Ou kestyon.

HON BERNARD GEORGES

Mersi. Mr Speaker, taler en Manm Lopoziyon in dir ki ler nou, nou ti dan Lopoziyon sa ki zot, zot ti pe fer pa ti byen. Me la ki nou lo pouvwar i byen, me nou kapab dir osi ki ler zot, zot ti o pouvwar sa ki zot ti pe fer ti byen ozordi ki zot dan Lopoziyon sa ki nou, nou pe fer zot war i pa byen.

HON SEBASTIEN PILLAY

(Off-Mic)

HON BERNARD GEORGES

Mr Speaker, Onorab Pillay, kan eski i pou aret donn nou poum dan sa Lasanble Nasyonal silvouple?

MR SPEAKER

Kestyon Onorab.

HON BERNARD GEORGES

Kan i pou aret malelve dan sa Lasanble Nasyonal?

MR SPEAKER

Onorab, ou kestyon silvouple?

HON BERNARD GEORGES

Mersi. Mr Speaker, mon pe seye me Onorab Pillay pa oule mon koze.

MR SPEAKER

Onorab, ou kestyon.

HON BERNARD GEORGES

Mersi. Mr Speaker, mon kestyon pou Minis se sa enn swivan. 18 zour avan ki zot in perdi eleksyon an 2020, parti ki ozordi ki dan Lopozisyon ti pas en *S.I.* kot zot ti liste en seri Sheikh eksetera, zot ki ti fer pa nou. En seri *head of state* ki pou ganny iminite sa i *S.I. 144 of 2020*.

Alor nou pa pe koz zis diplomat la, nou pe koz osi bann Sef D'Eta ki zot, zot annan bokou plis keksoz ki bann diplomat zot annan ki zot fer antre sorti dan pei. Mon kestyon pou Minis ozordi, pou fer sa sityasyon kler;

Minis sa ki'n arive semenn pase ki'n ganny raporte e ki'n anmenn nou devan sa Lasanble Nasyonal ozordi, eski se premye fwa ki arive dan pei Sesel sa oubyen ler *US* parti, Parti Lepep, *SPPF*, *SPUP* ki minoriter ozordi ti o pouwar, eski ti annan menm kalite keksoz ki ti arive e ki nou, nou ti kritike ler i ti arive? Mersi.

MR SPEAKER

Mersi. Minis en repons bref silvouple.

MINISTER NAADIR HASSAN

Mersi, mersi Mr Speaker. Mr Speaker, mon krwar Mr Barrack in eksplike, poudir ki sa bann tranzaksyon ki annan pou fer avek bann diplomat e

bann ki annan iminite i en keksoz toutafe normal ki ganny fer e in arive toultan.

Ms Mangroo in eksplike ki dan lepase pa dan letan nou Gouvernman ki ti annan serten problem e li mon krwar i ti dan tim ki ti pe diskrit pou rezourd sa bann problem. E in konfirman ozordi avek Mr Barrack ki tou keksoz pe ganny fer dan satisfaksyon tou lotorite. So mon larepons i koumsa.

Mr Speaker, mon ti a kontan gete si posib kekfw mon pa konnen si Minis i annan sa pou lev *point of order* ou *matter of privilege*. Me selman pa kapab sak fwa ou vin la ou ganny akize pou lalang e pa ganny *substantiate*.

Konmsi ou konnen Mr Speaker, avek ou permisyon mon ti anvi dir en keksoz.

MR SPEAKER

Wi.

MINISTER NAADIR HASSAN

I sagrinan ozordi konmsi ler ou get bann zanfan vini pe ekout diskisyon Lasanble, ki sa bann kalite en *behavior* koumsa pe - konmsi ki legzanp nou pe donn nou zenn.

(APPLAUSE)

MR SPEAKER

Bon, merci Minis. Bon, nou pe termin sa sesyon kestasyon la. Mon remerisye Minis ek son bann zofisye e mon swet zot bonn kontinyasyon, merci. Bon, nou a prosede avek lot *item* lo nou *Order Paper*.

Onorab Pillay, wi?

HON SEBASTIEN PILLAY

Mr Speaker, mon le *raise* en *matter of privilege* koman en Manm Lasanble.

MR SPEAKER

Wi, ki *matter*?

HON SEBASTIEN PILLAY

Standing Order i kler poudir ou, ou ziz mon oubyen ou remontrans mwan pou mank respe. Ou dir mon pe mank respe pou Minis, mon mank respe pou lezot Manm, mon mank respe pou tou dimoun. A de repriz Onorab Georges in mank respe pou mwan, Minis in mank respe pou mwan.

E nou, nou problem dan Lasanble se ki atraver ou Mr Speaker lafason ki Lasanble i prosede, mon *Caucus* pa ganny sans demann kestasyon ditou. Nou pa ganny sans demann kestasyon nou pa ganny sans demann *supplementary question*.

(comments off-mic)

HON SEBASTIEN PILLAY

E nou bezwen *resort* pou fer en bann aktivite, en bann aksyon zis pou nou kapab fer pase nou pwen. *This is what is happening in the* Lasanble Nasyonal Mr Speaker!

MR SPEAKER

Mersi. Ou *Caucus*, ou *Caucus* in demann otan kestasyon ki Lopoziyon. Madanm raporter, *sorry* nou a retourn dan Staz Lasanble e madanm raporter i ava apel Minis pou nou prosede avek nou *Order Paper*.

Bonzour e byenveni Minis pou Lenvestisman, Lantreprenarya e Lendistri, Madanm Devika Vidot. E egalman bonzour e byenveni Mr Michael Nalletamby Sekreter Prensipal dan sa Minister.

Mr Ronny Antat *CEO Seychelles Licensing Authority*. Mr Georges James Asistan *Draftsperson* dan *AG's Office* e akote Madanm Vania Marimba *Legal Draftsperson*. Mersi pou vin dan Lasanble pou partisip avek nou lo *Bill Licences (Amendment) Bill 2024*. Nou a pran Mosyon pou *Second Reading Bill*. Onorab Arissol.

HON SANDY ARISSOL

Mersi Mr Speaker. Bonzour Minis avek ou lekip. Bonzour ankor enn fwa tou bann dimoun ki pe ekoute. Mr

Speaker, anba *Order 69(2)* mon le *move* ki *Bill Licences (Amendment) Bill, 2024* i ganny lir en Dezyenm Fwa. Mersi.

MR SPEAKER

Nou a ganny segondman pou sa *Bill*. Onorab Esparon.

HON REGINA ESPARON

Mersi Mr Speaker. Bonzour Minis ek ou delegasyon. Mr Speaker, mon segonn Mosyon pou ki *the Licences (Amendment) Bill 2024* i ganny lir en Dezyenm Fwa. Mersi.

MR SPEAKER

Mersi. Minis, nou'n pare pou ou prezantasyon lentroduksyon lo *Bill*.

MINISTER DEVIKA VIDOT

Bonzour Mr Speaker. Bonzour tou bann Manm Onorab. E bonzour tou bann dimoun ki a lekout. Bonzour spesyal pou bann zenn ki dan Galeri.

Mr Speaker, sa Prozedlwa ki mon pe prezante i pou konsiderasyon Lasanble Nasyonal, i propoze pou anmenn serten lamannman dan Lalwa *Licensing*.

Sa bann sanzman i annan avek lobzektif amelyor lanvironnman biznes e permet desantralizasyon *licensing* kot lezot lazans piblik i kapab donn *licence*.

E sa pou ganny fer par azoutan en paragraf, ki etabli klerman ki sa Lalwa *Licence* pa aplike dan lenstans kot en lot Lalwa i otoriz donn en *licence*. An retiran sa provizyon ki enpoz kontrol *Licences Act* lo lezot antite, ki pe osi donn sa *licence* atraver en lot Lalwa.

E osi pou transfer Lotorite *Licence* anba Minister responsab pou Lenvestisman, kot i pou pli kapab byen aliny son fonksyon avek Polisi Minister pou fasilite, lenvestisman e biznes.

Dezyenm lobzektif sa bann lamannman, se pou koriz serten anomali dan Lalwa, kot serten regilasyon pa pe ganny byen kouver anba Lalwa prensipal *Licences Act*.

Trwazyenm lobzektif, se pou fer provizyon pou kapab permet bann biznes ki napa en regilasyon, ki napa regilasyon pou *licence* an se moman, Pou zot kapab ganny en *licence* provizyonel, an mezir ki son regilasyon i ganny formalize.

E katriyenmman, pou entrodwir en provizyon pou permet *Seychelles Licensing Authority* aplik *fixed penalty* kot i apropiye, pou ki i vin pli efektiv dan son responsabilite, pou ranforsi bann provizyon anba *Licences Act*.

Alor Mr Speaker, lobzektif an zeneral sa Prozedlwa i pou anmenn serten amelyorasyon dan

Lalwa *Licences Act*, ki ava permet fasilitasyon lenvestisman e biznes, e osi donn Lotorite *Licensing* plis zouti pou vin pli efektiv dan son manda.

Avek sa mon demande ki Lasanble Nasyonal i konsider e aprouv sa Prozedlwa. Mersi Mr Speaker.

MR SPEAKER

Mersi Minis pou prezantasyon. Nou a komans avek deba lo merit zeneral *Bill*. Onorab Naidu, eski ou pe koz lo lapar *Bills Committee*? Onorab Naidu.

HON SATHYA NAIDU

Mersi Mr Speaker. An relasyon avek *Bill* ki devan nou i vin atan, espesyalman ler nou pe koz lo laspe *ease of doing business*. Mon panse ki sa provizyon ki pe met an plas sa *provisional licence*, i ava fer ki bann biznes ki inovativ, bann biznes ki nouvo dan domenn biznes dan li menm, i ava fer ki Lotorite *Licensing* i pa pou ganny trouve konmkwa i pe ferm laport. Me plito i pe ouver laport pou fer sir ki keksoz i ava ganny fer dan en lankadremman legal.

Zisteman lo size sa *provisional licence*, en kestyon ki mon pe poze se, apre ki tan eski ki zot pou kapab etabli bann regilasyon? Ki bann travay ki zot pou bezwen fer

pou kapab etabli bann norm ki vin avek sa biznes?

Akoz byensir i bezwen la pou en peryod letan mon panse, apre ki i ganny pase atraver en regilasyon. E si zot pe mazin en *the licensing fees*, eski i pou varye baze lo sak *licence* ki zot donner an term en, en *provisional licence*?

I zisteman mon war sa koman en bon inisyatif lo kote *licensing* pou kapab adres sa defi *ease of doing business*. Me nou tou nou konsyan poudir avan ki en biznes i ganny sa *licence, at the end of the day* i bezwen pas atraver *channel*.

Alors ki kalite konversasyon eski zot in ganny avek bann lezot Lotorite, par egzanp *PHA* i enn, *Planning* i en lot. Ki kalite konversasyon ki zot in gannyen, pou fer sir ki ler en biznes - ler en enterprener plito, i vin devan i vin devan avek son lide inovativ pou kapab ganny en rannman. E an menm tan donn en servis pou nou pep ek nou pei. Ki kalite *timeframe* ki pou ganny met an plas, pou fer sir ki sa *provisional licence* i ava vin sa zouti efektiv ki zot, zot pe sey etabli atraver sa provizyon legal.

Byensir an relasyon avek sa size nou konnen poudir i annan bann lezot Lotorite tel ki *SMSA, SFA, FSA*, ki *issue*

bann *licence* apar. Mon konnen pou bann *dive center* in ganny tire atraver bann provizyon dan sa *Bill* e i *S.I. 5 of 2003* ki etabli bann mwayen ki *SMSA* par egzantp i kapab *issue* en *licence*.

Me dan bann sekter ki tonm dan sa domenn par egzantp, eski se zot menm ki pou determin bann paramet ki relye avek en *provisional licence*. Zisteman lo laspe *fixed penalty* i fer ki Lotorite *Licensing* i annan en pe plis pouwar imedyatman ler en biznes ouswa en endividi i ganny trouve ki i pe komet en lofans, direktteman Lotorite i kapab enpoz, enpoz en lanmann dan plas pas Ankour ki ou kapab dir ki trenn en pe bann resours ki bezwen ganny itilize, pou kapab penaliz en biznes ki pe kondwir li kont bann provizyon dan *licensing*.

Eski lefe ki pou annan lezot lotorite ki pou *issue* bann *licences*, baze lo direksyon ki nou war ki sa *Bill* pe anmenn nou, lo laspe ki relye avek *enforcement* e menm *monitoring*.

Mon panse ki vi ki sa lamannman ki i pe ganny met devan, i kapab fer ki *Licensing Authority* i kapab pli byen deservi son responsabilite. Kekfwa i kapab reprioritiz lo lafason ki itiliz son resours, pou kapab adres bann diferan

laspe ki tonm anba *Licensing Authority* li menm.

Akoz nou konnen ki sa laspe *monitoring and enforcement* i en defi ki *Licensing Authority* i annan. Eski ler i annan bann lezot antite ki pran sa bann diferan responsabilite ki tonm anba zot parasol, eski sa i fer ki *Licensing Authority* i kapab pli byen deservi son responsabilite vizavi manda ki i annan.

E an relasyon avek sa *licence*, *provisional licence*, eski i pou ouver en laport pou etranze antre e pran tou loportinite? Eski sa i kapab vin leka? Mon konnen i pa pou neseserman leka baze lo *S.I. 76* ki kouver *Seychelles Investment Economic Activities Regulation*.

E mon rapel ki se pa lot ki Onorab Sebastien Pillay ki ti anmenn *S.I. 148* devan Lasanble pou nou *annul*. E lo kote nou latab nou'n siport sa *S.I.* aköz ti fer sans pou, pou *quash* ouswa plito pou *repeal* sa *S.I.*. Aköz i ti fer ki i ti annan en debalans. E an menm tan Lasanble pa ti neseserman ganny konsilte lo sa size.

E mon konnen ki Onorab Mondon lo nou kote ti'n menm asiste bann rankont an relasyon avek sa size. E alors lo kote *LDS* ler i annan en Mosyon ki fer sans e nou

bezwen *repeal* nou, nou ava *repeal* akoz mon rapel ki ti annan en *S.I.* an relasyon avek *Port and Harbor Dues*, i ti annan *S.I.* an relasyon avek *Cleaners Corporative*.

Port and Harbor Dues, nou ti pe investi larzan pou amelyor - nou ti pe met provizyon plito pou lenvestisman an relasyon avek *maintenance* nou lenfrastruktir. *Cleaners Corporative* ti annan pa mal koripsyon, ti annan pa mal manboulouk si oule dir.

E alors lo sa kote, ler nou ti bezwen pran bann desizyon pou kapab adres en problem nou, nou pa pou vin siport en bann Mosyon ki napa relevans. Mon pe zis ilistre en legzanp, kot nou koman lo kote *LDS* nou'n bezwen debout pou en keksoz ki byen e ki fer sans e ki lozik, nou, nou fer li san okenn problem.

E pou terminen Mr Speaker, mwan, mon pa anmenn ka dimoun san konn konteks en sityasyon vizavi problem ki sa dimoun in rankontre. Mwan, mon pa servi sa platform ki nou annan pou fer politik bonmarse. I fasil fer politik bonmarse.

E an relasyon avek okenn sityasyon i annan de kote e toultan se laverite ki pou renye. E i enportan koman en Lasanble, ki nou

etabli en bon legzanp pou nou bann zanfan anler.

Pou konnen ki ler nou annan en responsabilite e sa drwa ki apel drwa de lekspresyon, nou servi li byen pou enform nou pep. Mersi Mr Speaker.

MR SPEAKER

Mersi Onorab. Bon, mon respekte ou lopinyon me selman nou annan en *Bill* devan nou e size sa *Bill* i ase spesifik. Nou toultan kapab antre dan bann size politik, me nou la pou nou konsider sa *Bill*.

Wi, Onorab Loze, ou kapab adrese.

HON JOHAN LOZE

Mersi Mr Speaker. Mr Speaker, mon ti ava konsey bann zanfan ki a lekout ki la sa ki nou fek war se en legzanp kot en poupet sifon ti pe tap koudpwen dan ros.

Alors pa servi ni ou fron ni ou lanmen pou sey kas ros parey sa ki'n koze avan mwan in sey fer. Mr Speaker, mon en pti pe *conflicted* avek *Bill* ki devan nou. Mon napa gro problem avek mwan. Mon war ou, ou a krwar ou'n en pti pe dezapwente ler mon'n dir ou mon *conflicted*.

Mr Speaker, mon *issue* i vin aköz nou pei an se moman i pe pas atraver bokou difikilte. So eski nou ouver lekonomi e

nou, nou liberalize? Eski nou *step in* avek sipor pou biznes e nou met divan anba zot lezel? *Or do we keep legislating?*

Mon konnen i kapab ganny *argued* dan lot kote ki Lezislasyon ki devan nou pe ganny mete, zisteman pou fasilite biznes. Zisteman pou permet aktivite ki an se moman i *unlicensable or unlicenced*, pou permet zot *take off* fer zot aktivite.

Be *from* mon pwennvi pou mwan kot mon pe gete, mon santi ki petet lekonomi i bezwen plis ki sa. Nou bezwen an se moman les dimoun fer zot aktivite ekonomik, anmenn bann benefis anmenn bann retonbe ekonomik, apre nou ava antre nou a met kontrol nou a isi nou a laba.

Akoz *in spite* ki nou ganny dir, pe antre 10 bilyon par isi 1 bilyon par laba, nou lekonomi i dan problem. Nou pep i santi difikilte. Seselwa i war li la deor poudir nou pei i pa osi performan an se moman ki i ti kapab etc.

Mon napa gran *issues* avek *licence* ki nou annan avek Lezislasyon avek *licence* ki devan nou. Mon santi ki i kapab ganny fer dan en lot fason, i kapab ganny fer pli byen dan en lot fason.

Me sa i en diferans filozofi. Mon napa ase dan mon trip, pou mon vini dir sa pa bon. I pa ki i pa bon e ki

mon difere avek zot dan lapros ki zot pe pran, mwan, mon santi ki petet nou devret pe al dan en lot direksyon pou *kickstart* lekonomi pei an se moman.

Be Gouvernman li i santi ki i bezwen donn Seselwa loportinite pou donn son aktivite atraver permet li ganny en permi legal, pou fer son aktivite pou bann aktivite ki an se moman pa kouver anba bann *current price licences*.

E mon krwar se sa ki devan nou, non? Nou annan sa devan nou la. Be Mr Speaker, mon'n tann en kestyon leve lo, eski sa pou ouver laport pou etranze antre? Mon pa krwar ki sa pe ouver laport pou etranze antre be selman danze i deza la Mr Speaker.

E petet nou devret - pa konnen mwan, ler nou pas sa Lalwa, *licence* en pe sa bann etranze aköz en dimoun ki *wanted* dan son prop pei, i vini i ganny over R100 mil avek Minister Lafanmir pou li donn *training*. E li i *wanted* koman en dimoun ki komet frod pran larzan anba fo preteks, be konmsi ki lesan i pe vin donn nou ki mannyer nou pou pran larzan anba fo preteks? Prezan li i antre isi lo en *tourist visa*.

Minister Lafanmir i pey li sote R100 mil ekek pou donn nou lesan. Be mon krwar

petet sa *licence* i en bon keksoz annou *licenced* en pti pe sa pti madanm e tou bann lezot ki nou bann Minister i pe decide pey zot gro, gro sonm.

Mon pa konnen mwan me *anyway maybe the intention* sete ki nou aprann fer frod, alor nou'n anmenn sa madanm isi pou montre bann zofisyè bann isi, bann laba, bann dimoun ki mannyer pou fer frod - *I don't know* Mr Speaker.

Be letan nou get sa bann issues etranze Mr Speaker, anba ki *licence* ki en lakonpanyen etranze i fer larestasyon Seselwa? Petet sa i ava kouver ki ler nou al kot mersener Langleter, mersener Angle i vini i fer larestasyon sitwayen Seselwa.

E pou fer pli gou i ale i al ekri lo son *blog* poudir "*VPH International in made arrest in Seychelles.*" In fer *arrest* li be in ganny *licence* kote be petet i a pey *licence fees* nou a rekiper en pe larzan ek li pou sa ta 100 milyon ki ACCS pe donn li.

Mon, mon krwar dan en sans i en bon keksoz, aköz nou pa kapab annan mersener *running around* antre isi lo viza touris zot osi, apre ou tande zot in ganny en egzanpsyon GOP par en let. Pe pratik ek en *unlicensable* aktivite; mon pa krwar poudir mersener i *licensable*. Mon pa konnen

Minis i a koriz mon si mersener i *licensable* Sesel.

Be posibleman sa i ava ede nou a *licence* en pe mersener sa ta 100 milyon ki Madanm May pe pey zot - ki vin *by the way* i vin serse isi anndan. I vini, i vin kol porte isi anndan e nou, nou donn li nou. I vini, i pran 15 milyon apre i pran 56 nou donn li menm nou. I ale avek i al donn mersener Angle.

So petet si mersener Angle i kapab pey Minis Vidot en *licence* i a zistifye en pti gin sa douler ki nou pe anmase Mr Speaker. Aköz mon pe dir ou mon fransman koman en Manm Lasanble Nasyonal en reprezantan mon santi mon angwase mon.

Mr Speaker, ou ti la anndan mon krwar ti Desanm 2021 ouswa 22, Minister Finans i vin la anndan i fer nou aprouv en Lalwa pou kree en *Asset Management Unit* anba Minister Finans. *All well and good* nou ti aprouve - pou *manage* bann byen sezi, bann byen ki sezi aköz be nou ti ganny dir nou in ariv problem dan lepase sa bann keksoz in ganny mal *managed* - pa'n ganny *maintained*. Apre ler ou rode pa konnen kot in ale so nou pas en Lalwa nou kree en *unit*.

Apre ou tande poudir en lakonpanyen Angle, ankor mersener Angle i vini ek en

lakonpanyen de nonmen *Asset Realty* pe *manage* byen propriyete Valabhji ki'n ganny sezi. *Next* ou tande Madanm Valabhji bwat bizou zis bwat ki reste bizou napa.

Mr Speaker, be petet sa Lalwa ki devan nou i a permet nou *licenced* sa aktivite kot mersener Angle i vini i al vid bwat bizou Madanm Valabhji. I a vin en *licensable activity* anba sa Lalwa ki nou pe pase la, pou nou ganny mersener Angle dan nou pei. I vid bwar bizou Madanm Valabhji e an retour Minis Vidot i kolekte *licence fees*.

At least nou a ganny *licence fees* aköz la Angle la in, in disparet depi ek bizou in kit zis bwat in disparet ek son ta milyon ni Ankour pa vini.

MR SPEAKER

Onorab, ou pe fer krwar ou pe koz lo sa *licence*.

(APPLAUSE)

HON JOHAN LOZE

Mon pe koz lo Lalwa Mr Speaker mon pe koz lo fason pou...

(comments off-mic)

MR SPEAKER

Order! Ou pe fer krwar ou pe koz lo *licence* me, me ou pa pe koz lo Lalwa. Silvouple annou sey...

HON JOHAN LOZE

Mr Speaker, mon-mon...

MR SPEAKER

E mon fer lapel pou tou dimoun annou sey *focus* silvouple Onorab.

HON JOHAN LOZE

Mr Speaker, ki mon pe dir mwan. Mon krwar i pou en bon keksoz si Minis i kapab kolekte en pe *licence fees* avek sa bann *non licensable activities* ki pe deroule an se moman dan nou pei.

E i annan en bon pe, pe deroule. Mr Speaker, aköz dimoun in ganny larzan, in ganny peye apre ni Ankour i pa le vini. Ni levidans i pa le vin donner. E be i pa'n ganny *licence* pou pratik sa bann *mercenaries activities* dan nou pei.

Be prezan letan i napa en *licence*, nou pa kapab tyonbo li poudir koumsa ou'n ganny peye pou fer lenvestigasyon pou sezi 100 milyon, \$900 milyon pou donn nou apre ni Ankour ou pa le vini.

Ou'n *breach conditions of your licence*, be nou pa kapab fer li nanryen la se, se sa ki mon pe *hope* Minis i kapab met en lord dan sa dezord ki pe deroule dan nou, dan nou pei an se moman.

Ou war Mr Speaker, aköz zot menm zot vini zot dir nou i

annan de 100tenn de milyon pou sezi apre ler zot *flop*, zot *fail* zot pa ni vin ankour.

E napa en *licence* ki nou kapab *hold them accountable* anndan. E ni en *pti licence fee* pa'n pey Minis Vidot Mr Speaker. Se sa kot mon leker i fermal mwan koman en Seselwa. Nou annan mersener Angle *running roughshod* partou lo nou dan nou pei, pe fer sa ki zot anvi e la Minis Vidot i a vin met en lord enn fwa pou tou dan tousala.

Sa bout mon kontan Mr Speaker. Mon kontan ki Minis Vidot finalman pou pran sa bann mersener Angle pou pez anba son *thumb* be zot a peye. Zot a pey li en *licence*. Ou war Mr Speaker, ou kapab zis vid bwar bizou Madanm Valabhji taye? Be kot ti annan sa? Be kote ti annan?

Pey nou en larzan. Zot kapab zis vini pey ek ACCS apre taye ni levidans pa vin donnen Ankour. Be non, Minis Vidot i a met en lord ek zot! Mwan, mon kontan Minis Vidot ki pe fer i a fou en lord ek sa bann mersener dan nou pei. Mr Speaker, be pe koz...

MR SPEAKER

Repetisyon Onorab.

HON JOHAN LOZE

Wi i annan keksoz ou bezwen repete de fwa Mr Speaker.

MR SPEAKER

Repetitious.

HON JOHAN LOZE

I annan keksoz nou bezwen repete aköz *anyway* les li be annou pa repete Mr Speaker. Be sa ta frod ki'n pase dan Korperativ la ou tande in kriye laba i dir rod levidans Onorab Sathya ki fek dir.

La Onorab Woodcock i dir mon oli levidans rod levidans be Onorab Sathya i pa ti dir rod levidans. War Mr Speaker be Korperativ li i pa en *licensable activity or non licensable activity* ki in monte dan sa *Bill* la be selman in monte Mr Speaker.

Be ler in monte size in koz lo Mosyon ki nou, nou ti anmennen, be Mosyon ti about saler *Cleaners* Mr Speaker. Ti *about* R1500 a R1000 pou *Cleaners* ti *about* R1500 pou dimoun ki ganny mwens ki R10 mil Mr Speaker.

Ozordi dimoun ki *take home* R25 mil par mwan pe *make an issue about* R1500 e R1000 ki *Cleaners* i *take home*. Mon krwar nou bezwen annan en lord dan nou lespri isi anndan nou osi.

Nou pa kapab vini koz koripsyon ki'n pase dan Korperativ *Cleaners*. *Cleaners* pa'n fer okenn koripsyon, pa'n fer okenn manboulouk e zot pa'n fer okenn laprev ki nou annan sa bann keksoz.

E *Cleaners* ozordi pe ganny *unfairly* defavorize! I pe perdi ant R1000 a 1500. I annan pe perdi R2000 be aköz nou pe pini dimoun ki ganny mwens ki R10 mil?

E prezan nou pe vini nou pe sant louanz lo la konmsi i en bon keksoz ki nou'n fer! I mal. I pa akseptab! E i pli pa akseptab pou en dimoun ki *take home* R25 mil par mwan, vini vin lev en size koumsa so *lightly*, san okenn laprev ki'n annan koripsyon ki'n pase laba.

E san okenn laprev ki *Cleaners* zot menm ki pe ganny direkteman afekte in komet koripsyon. Be mwan, mon osi mon ava komet en koripsyon mon pou ganny pini lo leskiz ki koripsyon in deroule?

Ki sa koripsyon ti annan pou fer ek mwan *whether* ti annan *whether* ti napa, ki ti annan pou fer ek sa *cleaner* en dimoun ki son *take home*, i mwens ki R10 mil ou defavoriz li ant 1000 a R1500. E nou, nou bat lanmen *as if this is something good* ki nou'n fer en...

MR SPEAKER

Onorab silvouple terminen. Bann size ki ou pe leve pa relevan aköz sa.

HON JOHAN LOZE

Pa mwan ki'n leve Mr Speaker.

MR SPEAKER

Ale.

HON JOHAN LOZE

Sa ou ti devret dir depi ler Onorab Naidu in leve.

MR SPEAKER

Terminen.

HON JOHAN LOZE

Ou ti a'n dir li ki'n anmennen li ki'n entrodwir. Be bon Mr Speaker, mon swet Minis bonn sans. Mon swet li kouraz pou met en lord dan sa dezord, ki son Gouvernman menm pe anmennen kot ACCS, Minister Lafanmir zot tou ek sa bann etranze ki pe *swamp* dan nou pei la.

Pe vol nou bann byen; pe vol nou larises pe al avek. Minis kouraz Minis, aköz la ou pou bezwen al lager ek bann gro pwason dan ou prop Gouvernman. *Good luck!* Ou konnen *I'm on your side* depi zour ou ti met ou *interview*, mon ti siport ou.

E la, la rezon mon pe siport ou Minis, mon konnen ou pou met en bon lord avek sa bann mersener Angle ki pe mars partou lo nou. Mersi Mr Speaker.

MR SPEAKER

Mersi. Bon, nou a pran poz, nou a pran poz dan deba la. Wi mon annan de non ki'n leve

deza. Lasanble i a rebran 11 er. Mersi.

(BREAK)

MR SPEAKER

Nou a rebran lo deba. Mon annan de Manm ki'n lev lanmen. Mon a fer en lapel ankor, avek bann Manm silvouple nou annan en size ki devan nou annou reste lo sa size koumsa nou ava komanse.

Onorab Woodcock, ou annan laparol.

HON WAVEL WOODCOCK

Mersi Mr Speaker. Mr Speaker, sa *Bill* ki devan nou ozordi, i enn ki mon konsider li vreman enportan. Me pou nou met sa *Bill* an konteks i enportan pou Lepep Seselwa mazine dan lepase ki manner *Licensing Authority* ti ganny manipile.

Ti ganny servi koman en zouti politik, kot pou donn *licence* en endividi pou fer en biznes ti baze lo lapartenans ti baze lo ki parti ki ou siporte. E mwan, mon rapel dan 6em Lasanble, menm ki ase resaman kot plizyer biznes in vin kot mon in koz ek mon lo ler zot in apros *Licensing*. E menm bann lannen avan, pou sey rod en *licence* pou en biznes swa dan sekter

enformel swa en biznes normal.

I annan bokou dimoun dan lepase Mr Speaker, ki malerezman zot in ganny peze zot in ganny anpese ganny *licence*. *Licence* ti ganny servi koman en zouti politik. Mon konpran en pe zot fristrasyon ozordi, akoz sa Lalwa ki devan nou pe fer provizyon pou plis dimoun Mr Speaker kapab ganny en *licence*.

Akoz i annan en kantite dimoun ki pa pe kapab ganny en *licence*, ozordi akoz biznes ki zot fer Mr Speaker, i pa ganny kouver anba *Licensing Act* ozordi.

Alors sa Lalwa pe fer provizyon pou *licensing* provizyonnel pou sa bann dimoun kekfwa ki dan sekter enformel ouswa bann dimoun ki'n vin avek, avek bann biznes pli nouvo pli, pli inovativ Mr Speaker.

Mon rapel letan anba *SEnPA* kot bann dimoun ki ti tonm dan sa kad sirtou dan *cottage industry*, ouswa dan bann pti biznes enformel. *SEnPA* ti sey kouver zot me selman i pa ti tonm anba en kad legal.

Alor ozordi sa Lalwa pe regulariz, pe *regularize* tousala pou fer ki sa bann biznes ozordi i kapab anrezistre. Mwan, mon konn en kantite dimoun ki'n apros mwan in koz avek mwan. I annan en

garson ki annan bato ekskirsyon ki i eksplik mwan ki li in idantifye en later i pa ni fer gran zafer.

Ler mon anmenn mon kliyan lo lanmer, mon vin ater mon ti a kontan kapab annan en pti biznes kot mon vini mon met en *grill*, fer en pti keksoz pou mon bann kliyan ater. Ki malerezman i pa ganny kouver anba *Licensing*. I annan plizyer biznes ozordi nou war bann, bann zenn pe vin avek bann biznes vreman inovativ Mr Speaker.

Mon war mwan en - pa bokou letan pase, ti annan en *interview* lo televizyon, kot en garson in *come* - avek en fanmir anefek en biznes kot ou servi *transparent canoe* lo lanmar pou anmenn bann kliyan.

I annan plizyer bann nouvo lide ki dimoun pe vin avek e i annan bokou dimoun ki fer fas avek plizyer defi. Parey ozordi i annan bann ki dan biznes *beach bed*. Mon rapel en *case in point* kot en zanmi kot i ti'n sey komans sa biznes e i ti pe ganny difikilte problem menm avek Lapolis akoz in met son *beach bed* lo lans, ki anefek pa ti pe ganny *regulated* sa letan, ki i pa ti pe ganny provizyon *licence* sa letan Mr Speaker.

E dapre tou Mr Speaker, pou en pei bouze, pou en lekonomei bouze i enportan ki

Gouvernman pe kolekte reveni e sa i atraver taks ki nou takse bann biznes.

E ler biznes i pey taks, i kontribye dan nou lekonomei, i ed Gouvernman pou li kapab fer bann devlopman neseler. Dapre tou nou tou Sesel nou servi bann servis Gouvernman bis piblik, lasante, ledikasyon e nou bezwen kolekte reveni enportan, pou tou bann biznes kolekte dan lekonomei nou pei.

Pou ede fer nouvo fasilite ki tou bann Manm pe demande e menm *renovate* bann fasilite ki deza ozordi i bokou e dan bann leta ki pa neselerman dan bann bon kondisyon Mr Speaker. Ler mon pe mazin ozordi dan sa lemonn ki nou pe viv ladan, mon konn bokou dimoun ki pe *come up* avek bann lide inovativ.

Mon pe mazin la ozordi menm mon konn bann dimoun ozordi Mr Speaker, ki'n *come up* avek bann nouvo konsep. Mon konn dimoun ki'n antre dan *virtual assistance services*, mon konn dimoun ki pe fer *content marketing* Mr Speaker.

Mon pa pou kanmi poudir, poudir mon en dimoun ki mon fer en pti pe *content marketing*. E mon konn osi bann dimoun ki ganny anploye ki ganny peye pou *manage schedule*, sirtou bann dimoun ki dan biznes pe fer sa

me selman zot pa *licence* Mr Speaker.

E sa i pou ede, i pou ed bokou dimoun Mr Speaker. I pou ed Gouvernman enn;-kolekte plis reveni e Mr Speaker e *regulate* sa bann biznes. Donn zot en, en *provisional licence* Mr Speaker pou zot kapab *operate* Sesel.

E zot osi fer zot kontribisyon Mr Speaker. Mr Speaker, i annan dimoun ozordi en keksoz pa tou dimoun ki pou al kot en *professional counsellor*. Ozordi nou annan bann *Life Coach* Sesel bokou dimoun pa konnen, bokou bann *Life Coach* Sesel ozordi Mr Speaker ki ed bann dimoun.

Avek swa zot *career development*, swa pou deal avek bann konfli, ouswa en fanmir in mor i annan sa bann *Life Coach* ozordi ki ed bann dimoun Mr Speaker, avek bann *advice*, bann sipor pou zot kapab *overcome* bann diferan lobstak ki zot pe fer fas avek Mr Speaker.

E *right now* i annan menm dimoun, ozordi nou pe koz parey menm bann dimoun ki *provide cleaning services* Mr Speaker. Parey mwan, mon konn dimoun ozordi ki'n aktyelman pe fer biznes me i napa en *licence* pou le moman kot i pe fer *mobile car*, ofer *mobile car cleaning services*. Kot i vin kot ou, swa i vin

netway ou loto swa i vin kot ou i fer bann servis kot *vacuum cleaning, power washing*.

Tousala i en biznes ki ladan, me selman i annan sa bann biznes ki ozordi i pa, napa provizyon pou donn zot *licence*. Ozordi Mr Speaker, an parlan biznes *cleaning* mon'n tann en Manm pli boner o par avan.

Onorab Loze annefe kot in koz en pti pe lo sityasyon *Cleaners Corporative* Mr Speaker. I enportan note Mr Speaker *Cleaners Corporative* ti annan en rapor Oditer Zeneral 2022 ki ti sorti. Kot i montre tre klerman bann *irregularities* ki'n arive dan *Cleaners Corporative* Mr Speaker.

E la ozordi sa dimoun ki ti pe ansarz *Cleaners Corporative* in ganny en biro Maison Du Peuple Mr Speaker. Sanmenm sa zot pe lager lebra kase Mr Speaker, pou protez Sef, ansyen Sef *Cleaners Corporative*.

Mr Speaker, nou bezwen et realis e et onnet ler nou koz lo plizyer keksoz. I annan en stement ki'n ganny fer dan Lasanble ki'n ganny fer Mr Speaker, ki mon pou bezwen korize. Mr Speaker, Sesel i annan bann louvraz ki rezerve zis pou Seselwa.

Anba S.I. 76 2022 anba *Seychelles Investment Act, Seychelles Investment*

Economic Activities Regulation
Mr Speaker, i fer kler Mr Speaker, poudir i annan bann biznes ki rezerve zis pou Seselwa e bann biznes ki etranze i kapab fer Sesel i ganny *regulated* Mr Speaker.

I enportan pou nou aret *mislead* nou pep. E i enportan osi ler nou pe koz mon, mon fatigue tann sa bann kalite konversasyon ozordi sa lager ki US pe anmennen kont ACCS, ouswa sa bann, sa bann Angle ki pe ed nou dan lenvestigasyon Mr Speaker, dan disparisyon plis ki \$50 milyon.

Mon kestyon ki mon toultan demande Mr Speaker, se akoz ki zot per sa bann Angle? Me selman Mr Speaker zot pa per - zot pa ti per Irlande ki ti ganny proteze anba Lalwa, ki Oditer Zeneral pa ti annan drwa odit zot.

Mr Speaker, zot pa ti per ler sa bann Irlande ti pe sezi kont bann *Businessman* e fer zot pey larzan, fer zot - *blackmail* zot pou pey larzan pou al dan kont sa bann, sa bann Irlande. Ti *ok* pou zot ler Sid Afriken ti pe *train* lisyen pou R200 mil par mwan.

La ozordi nou annan bann travay pe ganny fer pou nou *recover* plis ki \$50, \$100 milyon Mr Speaker ki'n disparet zot pe rod dan bwat bizou msye, Madanm Valabhji. Mon pa konnen si i

annan *old gold* ouswa bann, bann *gold plated* zafer laba mon pa konnen - kekfwa li i konnen kalite ki ti annan dan sa bwat laba Mr Speaker, Onorab Loze.

Kan i totalman kontrerman avek sa ki, sa *Bill* devan nou pe sey fer. Sa *Bill* i kler Mr Speaker. Parey mon'n dir i annan en kantite biznes ozordi ki nouvo dimoun pe vin avek bann konsep inovativ Mr Speaker. E zisteman ozordi Seselwa i kontan fer *online shopping*.

Ozordi nou annan bann diferan *website* kot ou kapab al *online* fer *purchase* ou *goods* i ariv devan ou laport *Shein*, *Alibaba*. E i annan Seselwa osi Mr Speaker i annan Seselwa Mr Speaker ki pe *venture* dan *online shopping*, kot aktyelman zot pe eksport keksoz atraver *online* Mr Speaker. Be *it's not regulated*.

I annan bann *podcast* ozordi Mr Speaker. Tousala i bann fason ki bokou dimoun ozordi pe fer biznes Mr Speaker. Parey mon'n koze, mon'n eksplike *content marketing* eksetera.

Mr Speaker, i enportan alor ki nou koman en pep nou met nou azour avek sa ki pe arive dan nou pei ozordi atraver met bann Lalwa, pou fasilite plis dimoun ki dan lepase pa ti pou ganny sa loportinite pou komans en

biznes, pou zot ozordi ganny sa sans pou zot kapab anrezistre.

E i annan en kantite biznes. Nou tou lo tou lede kote latab, nou konn en dimoun dan nou distrik ki annan en biznes ki anrezistre ki pe ganny difikilte.

Sa Lalwa i senp. I kler. I en Lalwa ki bon e ki pou ed en kantite nou bann frer la deor, pou nou kapab ganny en *licence* provizyonnel pou zot kapab, pou zot kapab zot osi siport zot lekor, zot fanmir e kontribye dan lekonomi nou pei.

Avek sa de mo Mr Speaker, mon pou siport sa *Bill* ki devan nou e mon dir ou mersi bokou.

MR SPEAKER

Mersi Onorab. Onorab Michel Roucou.

HON MICHEL ROUCOU

Mersi Mr Speaker. Bonzour a tous. Bonzour Minis, tou dimoun ki pe ekout nou espesyalman bann dimoun ki dan biznes. Mr Speaker, sa *Bill* ki Minis ozordi in anmenn kot nou i pa en gro *Bill* se en pti *Bill* ki i pe-i pe ede pou *innovate* en pti pe plis bann biznes la deor.

Ou konnen souvandfwa ler mon asize mon ekout *Chief Whip* ler i komans son deliberasyon lo bann *Bills*

oubyen lo bann Mosyon, toultan i demande ki annan ladan pou nou bann dimoun la deor?

Ki annan ki pe ofer pou nou bann zenn la deor. E mon panse poudir avek sa *Bill* ki la devan nou, mon mazine poudir bokou Seselwa la deor zot pe esper sa loportinite.

Akoz bokou zot espesyalman bann zenn, zot annan bann lide inovasyon ek bann keksoz ki pe ganny modernize. Espesyalman dan bann pei larestan pei kot ozordi tousala i bann lide ki zot kapab anmenn isi.

Mr Speaker, detrwa wikenn pase mon'n kapab fer mon apepre 3 zour aktivite dan mon distrik avek *Shreeji Group*. Mon'n kapab war bokou bann lide bann biznes ki annan ki mon menm mwan, mon pa ti okouran poudir i egziste.

Bann biznes ki parey bann *games* ki ou war bann zenn pe komans anmenn ki sa i kapab ankouraz nou bann zenn la deor, i bann keksoz ki ou kapab vini an fanmir li menm li, *enjoy* li dan en lazournen.

E mon panse poudir sa *Bill* ki la i pou ede kot i annan bokou sa bann lide parey, kot demen nou a kapab war kot i annan sa finansman ki ler en dimoun i anvi vin investir dan nou pei, kot nou pa war li kot

i pe bezwen aprezan. Akoz bann lobstak ki i kapab annan pou li kapab ganny en *licence*, kot i bezwen kit Sesel pou li al envestir en biznes dan en lot pei, ki aprezan nou Sesel nou perdi.

Mon panse poudir avek sa *Bill* ki la devan nou la, i pou annan bokou laport ki pou ouver pou bann zenn. E osi fodre nou pa bliye ki avek *COVID* in annan bokou leson ki in anmennen pou bann biznes.

E ozordi mon mazine poudir avek bokou bann biznes la deor, zot pe revwar zot fason fer zot pe revwar zot biznes. Zot pe rod bann nouvo lide pou zot kapab anmennen ozordi, ki si demen kot i annan en pandemik ki a tap Sesel, ki atraver reveni, ki nou a kapab pe anmase atraver bann biznes, kot nou ava war kot bokou bann lezot nouvo biznes kot i pe antre.

E osi Mr Speaker, mon mazine poudir avek sa *Bill* ki la devan nou la, i annan bokou bann biznes dan lepase ki zot in war zot -mon mazine poudir *Licensing* avek sa travay ki zot in fer, zot in war bann landrwa kot zot krwar ki zot devret *improve* pou ed bann biznes avek bann konsern ki bann biznes menm in vin avek devan ki'n zwenn zot.

E petet sa osi tou, i a kapab ede pou fasilite bann biznes. Mon a donn zis en legzanp. Ozordi en dimoun ki anvi ouver li en biznes petet kwi manze. Ozordi nou konnen avek modernizasyon, i annan bokou dimoun ki petet i kwi manze kot, kot zot dan zot landrwa avek tou bann gidans, ki apre zot kapab al delivre.

E sa bann biznes parey Mr Speaker, ki nou war i annan diferan Lotorite ki bezwen antre ladan. I annan *fire*, kot *Fire Service*, *SMRSA* i annan *Public Health Authority* li menm li, ek bann larestan bann lezot Lotorite ankor ki vini.

E souvandfwa sak sa bann Lotorite zot ler zot vini zot annan zot Polisi ki vin avek. E malgre ennler ki ler ou'n travay lo en serten bout, sa lot bout ki vini li sa lot Lotorite li ki i vini i kapab dir ou non la ou bezwen al aranz sa enn.

E i annan serten letan kot bann Lotorite petet ler zot vin sa bann vizit zot pa vin ansanm zot. Ki fer li vreman difisil pou bann dimoun ki anvi antre dan en biznes parey.

E ozordi Mr Speaker en lot biznes ki ou war i pe vin popiler Sesel bann dimoun pe, pe ouver bokou landrwa kot zot pe fer *wholesale*. E sa pe

komans vin popiler li menm li kot mon mazine poudir anba sa Lalwa bann lide, bann lide parey ki ozordi ki bann zenn li menm li la deor, ozordi nou war poudir i annan bokou zenn ler zot fini zot karyer zot pe pran zot en *course* dan biznes *management*.

E sa i a kapab ede pou nou anmenn bann lezot konponan, ki ozordi pou ouver en pti pe sa lespas ki petet ti annan en *gap* la. I a ouver en pe sa lespas ki demen bann envestiser osi tou i a kapab vini pou vin envestir e sa zenn li menm li i a kapab war sa laport.

Kot sa i a kapab ed li ki demen nou pa ava tann bokou sa bann kritik ki nou gannyen, ler *regarding* ler pou ganny en *licence* pou fer biznes.

Ozordi mazorite dimoun ler ou koz avek i dir ou koumsa i annan sa, sa konsern ki ler pou al fer en biznes i pran sitan bokou letan. I pran sitan bokou letan akoz i annan bann, bann Lalwa ki ou bezwen pe swiv; i annan bann dokiman.

E mon mazine poudir avek sa, sa Bill ki la Mr Speaker, i pou annan en soulazman. E Minis li menm li dan son ler i pe, i pe tous en pti pe lo bann pwen petet i a kapab donn en pti pe plis.

Akoz ki arive ler i annan sa bann bout teknikalite petet

bokou dimoun ki pe asize ki pe ekoute, i pa pe ganny petet sa lenformasyon parey nou isi anndan nou pe gannyen. Petet Minis i a tous en pti pe ki mannyer sa *Bill* li i pou soulaz en pti pe la deor bann ki petet i oule moderniz en pti pe zot biznes. Bann zenn ki pe mazin envestir en nouvo biznes Sesel, akoz nou konnen poudir ozordi *once* ki ou war en biznes i ouver Mr Speaker, en pti moman ou war in vin en kantite.

Zis parey *food van* ozordi *food van* dan pei li menm ki ou war, ou war i annan sitan bokou ki tanzantan ou war sa bann dimoun nek pe vann i pe sanz *owner* i pe sanz.

Car hire i en lot biznes ankor ki ou war i annan sitan bokou, ki ozordi ou war demen poudir se ki i avek bann nouvo fason fer bann nouvo Lalwa parey *Licensing* in anmennen ozordi.

Pou, pou anmenn en pti pe sa *ease of doing business* isi dan nou pei ki nou osi nou a kapab war sa reveni. E i pou annan bokou bann, bann lezot biznes ankor parey lo kote bat kannel li menm li. Nou delwil koko petet i pou anmenn en pti pe plis sa, sa vizibilite pou fer sir ki bann dimoun demen i dir anr *ok* be *Licensing* in anmenn sa.

I annan sa nouvo Lalwa la deor ki demen i kapab ede

pou nou anmenn en biznes ki petet i pa ganny kouber anba sa Lalwa *Licensing* ki ti ete avan. E sa i ava ede.

Mr Speaker, sa i enn de bann pwen ki mon'n anvi tous lo la pou fer sir poudir nou bann zenn la deor, oubyen bann dimoun ki deza dan biznes ki pe rankontre petet serten difikilte ki zot anvi investir dan en lot biznes, oubyen bann lezot lide ki annan.

Akoz ozordi ki nou war? I annan bokou dimoun ki zot annan en biznes petet zot pa anrezistre. Ozordi nou war bokou dimoun ki petet zot fer *mechanical work*, ki zot zis bann dimoun ki donn sa servis an menm tan ki zot pe bouze.

Zot pa *stack* dan en landrwa zot. I zis en dimoun ki petet i anvi ouver en biznes, kot demen ou annan en problem ek ou transpor ou konnen poudir i annan sa servis ki ou kapab donn en *pti call*. Sa dimoun pe dir li osi, si i kapab antre ladan, kot sa i a kapab ede pou anmenn en *pti pe sa*, sa transparan, sa konfyans en *pti pe pou dimoun ki petet pa pe anrezistre zot biznes pou le moman*.

Ki zot osi nou en *pti ki vreman nou annan bokou keksoz tropikal*. Ozordi nou annan bokou nou war bokou dimoun pe komans mazin en

pti pe lo nivo zot lasante, pou komans servi bann keksoz organik.

E petet tousala i kapab bann keksoz ki i kapab pli ede, pou nou kapab fer bann *pti biznes*, bann dimoun ki anvi vin ek bann lide pou zot antre anba la.

Mr Speaker, mwan, mon pou donn mon sipor sa *Bill* aköz mon war poudir avek sa i pou ed *Licensing* li menm li pou ed bann biznes.

E osi bann biznes osi bann ki la deor, pou zot kapab war sa laport petet kot zot ti pe sey tape pou zot antre ki sa biznes i kapab vini. Mersi.

MR SPEAKER

Mersi Onorab. Onorab Cosgrow.

HON WALLACE COSGROW

Mersi Mr Speaker. Bonzour Minis avek ou tim. Mr Speaker, mon pran laparol lo sa *Bill* ozordi bomaten. Mon annan detrwa *pti keksoz mon krwar mon ti a kontan kontribye an se ki konsern merit sa Bill* li menm, avek serten keksoz ki petet mwan, mon'n idantifye e ki mon santi petet i bezwen annan serten keksoz ki ganny fer ouswa amelyore an relasyon avek lanvironnman biznes Sesel ozordi.

E osi an relasyon avek *Licensing* li menm ki, ki kapab

vin swa fasilatater ouswa en *impediment* pou biznes dan okenn pei. Me selman avan mon al lo la Mr Speaker, mon ti a kontan vi ki letan ou'n donn laparol boner avan nou'n rebran, ou dir ki ou ti a kontan nou ti a reste lo *Bill*.

E mwan, mon anvi mon met en keksoz *to rest* en pti pe, pou ki nou pa antre ankor dan sa bann kalite diskisyon. In annan diskisyon lo, lo *Cleaners Corporative* e *Sef Cleaners*, madanm ki ti ansarz *Cleaners Corporative* avan in annan alegasyon ki konmkwa sa madanm i annan en biro Maison Du Peuple.

Sa mon kapab kategorikman *deny* sa i pa vre, i pa fonde i zis en mansonz sorti lot kote latab. Eskize ou dir, pa dir, me selman letan i en mansonz, nou bezwen dir i en mansonz.

E mon pa konnen aköz nou bezwen tou lazournen lev Maison Du Peuple. Mon pa konnen si zot per Maison Du Peuple si zot per sa dimoun ki laba, aköz 2025 i pe vin pran laba pei i pe vin ansarz sa pei 2025 Mr Speaker. An di-z-an sa Mr Speaker, mon krwar i enportan ki nou fer resorti. Avan 2020, an 2020 parti *LDS* ti kanpanny pou fer keksoz pli byen fer keksoz diferan e fer keksoz pou amelyor sirtou lanvironnman biznes isi Sesel.

Si mon refer en pti pe lo sa ki zot in dir Mr Speaker, ti annan en promes pou fer, pou ouver nouvo loportinite. E ler zot ti vini in annan bokou koze lo bann nouvo loportinite ki zot ti pou ouver.

Par egzanp Minis i a rappel byen biznes kannel, patsouli, lavannir e tou sa. Ki ozordi nou, nou pa pe neseserman war sa, sa fer pli byen, ouswa sa sanzman dan sa bann sekter ki parey i ti'n ganny promete.

Me par kont ozordi nou pe tande ki i annan kantite lezot biznes dimoun ki anvi fer bann lezot kalite biznes. E bann dimoun sirtou bokou bann zenn zot pe angaze dan bokou bann aktivite ki ozordi pa *licensable*, ouswa ki napa vremen en lankadremen pou sa bann biznes.

Mr Speaker, *Licensing* li menm e mon, mon ti ava espekte Mr Speaker, ki ozordi katriyenm lannen dan manda *LDS*, ti ava annan en *overhaul* si mon kapab met li koumsa, dan lafason ki *the Licensing system* i marse.

E ki zot ti ava kapab pe permet plis loportinite pou bann dimoun kapab antre dan bann biznes. Sirtou bann nouvo e *emerging businesses*, bann *trend* ki nou pe war dan pei. E osi dan bann lezot pei aletranze, dan en mannyer ki ti a fasilite fason, ki dimoun in

antre dan sa bann biznes fer sa bann biznes e kre plis larises pou nou lekonomi, pou nou pei.

Me malerezman Mr Speaker ozordi Sesel i ganny kategorize koman enn bann pei ki annan bokou, bokou *grip* lo lafason ki ou komans ou biznes. Bann *licences* ki ou bezwen rode avan ou ganny ou biznes; bann kondisyon ki ganny mete avan ou ganny ou biznes. *Licence* li menm, *licence* li menm si mon kapab dir i zis en formalite.

Me par kont sa bann kondisyon ki vin ek sa bann *licence* Mr Speaker, i enkrwayab. Ozordi en kantite dimoun ki nou pe koz avek, i dir nou poudir be i annan bokou plis *fees* ki pe ganny mete avek bann biznes.

E la mon mazin Mr Speaker, par egzantp bann *fees*, *levies* ki annan pou fer avek *tourism*, kot bann dimoun ki pe *operate* bann biznes zot pe war zot avek bann *fees* bann *levies* ki zot bezwen peye. E ki pe fer zot vin pa konpetitiv.

So demen bomaten zot pey en *licence*, me zot pey en *licence* e zot ganny difikilte pou ganny rannman dan sa biznes ki zot pey *licence*.

Akoz i annan bokou bann *fees*, bokou bann kondisyon ki pe ganny mete, ki pe fer zot pa, pa konpetitiv

dan zot bann biznes. E pe fer Sesel koman en *market* pa neseserman konpetitiv an konparezon avek bann lezot-lezot *market* sirtou dan larezyon.

Mr Speaker, nou a mazin osi bann *fees* ki pe ganny mete par egzantp lo bann bato, bato ki fer, ki fer larout Mahe-Praslin, Mahe-La Digue. Kot ankore i *increase* kou zot biznes. Zot pe pey en *licence* pou zot biznes bann kondisyon bann *fees* ki vin avek i *increase* kou zot biznes.

I *increase* kou sirtou transportasyon anver sa bann ver nou bann zil. E i fer ki pri lavi lo nou bann zil Mr Speaker, i vin bokou, bokou difisil aköz bann *licences* bann *fees* ki pe ganny mete.

Mr Speaker, i annan serten pwen dan sa Lalwa ki mon pe gete, ki mon krwar nou devret anmenn en pti pe plis *thought about it*. Mon, mon ti krwar poudir parey mon'n dir a sa pwen nou ti kapab pe fer pe revwar Lalwa *Licensing* an zeneral.

E adopte bann nouvo metod ki mannyer nou *regulate* or nou *apply* bann *licences* avek bann diferan biznes. Parey i annan bokou pei in fer. Zot in plizoumwèn *deregulate* serten bann sekter e fer li bokou, bokou pli fasil pou ankouraz, pou ankouraz

lenvestisman biznes dan sa bann sekter.

Zot in tir en bon pe bann *licences*, bann kondisyon ki vin ek bann *licences*. En *licence* i zis en *licence*, be selman sa kondisyon ki vin avek Mr Speaker ki fer ki parfwa bokou bann biznes, *or* bann dimoun ki ti ava anviantre dan sa bann biznes, i war li difisil pou kapab *meet* sa bann kondisyon sa bann *licence*.

E *in the process* nou touf ou touy bann pti biznes *or* bann *emerging businesses* ki pe vini. E an fezan sa lekonomi li menm li pa benefisye e nou pa kre sa lanvironnman pou kapab fer lekonomi grandi e e fer dimoun zot menm depan lo zot prop lekor vin zot bann prop anplwayer.

E menm pourkwa pa vin bann dimoun ki anploy bann lezot dimoun. E ler mon pe get sa Mr Speaker, i anmenn mon direk lo lamannman dan seksyon 5. Ler nou pe koz lo seksyon 22A *provisional licences*.

Ki pou mwan Mr Speaker, sa i mon pa poudir en louvraz pares me selman mon poudir en louvraz ki mon krwar i mank serten keksoz ladan. Mwan, mon krwar Mr Speaker, ki zis pou entrodwir en - dan mon pwennvi pou

entrodwir en *provisional licence* i en *easy way out*.

So nou pa pe fer resers. Nou pa pe war, nou pa pe gete kote ki annan bann potansyel biznes bann keksoz. Bann *emerging businesses* ki pe vini ozordi isi Sesel e nou pa, nou pa pe fer sa resers pou war, ki posibilite ki i annan e nou *set* bann *framework* pou sa bann posibilite.

Donn en *provisional licence* pou mon i zis en *way out* tanporer e i pa pe neseserman, neseserman ankadre sa bann biznes. Akoz demen bomaten, ou kapab annan biznes ki vini ganny *provisional licence* i vini i *operate*. Apre i fer keksoz ou napa okenn lenformasyon lo sa kalite biznes i fer en keksoz.

E taler Onorab Loze in koz lo bann keksoz ki pa neseserman dezirab pou nou pei, lekonomi. E dimoun i vini i fer en keksoz akoz nou napa ase lenformasyon lo la, alors ou donn li en *provisional licence* i fer sa *whatever* i fer, i annan pou li fer *within a year*. Apre i sorti i ale domaz i ganny fer - difisil pou repare.

Sesel koman en destinasyon, Sesel koman en ziridiksyon biznes, i ganny afekte akoz nou menm nou, nou pa'n fer ase resers pou nou kapab ankadre sa biznes *or* sa bann biznes dan en *proper framework*.

Dan en *proper legal framework* pou kapab fer ki sa biznes i, i vin enn legal byen avek son bann kondisyon. Menm pa neseserman en ta kondisyon, me bann kondisyon *within* ki sa biznes i kapab *operate*.

E mwan, mon ti a demann Minis pou revwar en pti pe sa zafer *provisional licence*. E rod en fason ki manner nou kapab fer plis resers i annan bokou biznes ki'n ganny mansyonnen la. Fer resers gete mon asire bann biznes ki pe vini ki, ki pe *emerge* i pa bann nouvo biznes dan sans ki i nouvo dan lemonn.

Akoz souvandfwa nou Sesel koman en pti pei. Si mwan, mon'n war en biznes par egzanp Onorab Woodcock in nonm *virtual assistance*, mon asire Sesel pa le sel pei ki prodwir fasilite *virtual assistant* i annan lezot pei.

So annou asize annou gete ki sa bann *framework* ki sa bann pei in mete. Servi *best practices*, servi *best examples* e nou osi annou met nou *framework*.

So annou pa zis pran tou keksoz met dan en kote, apre nou dir nou pe fer li byen. Mr Speaker, nou bezwen kapab investir en pe lenerzi, investir en pe letan osi dan, dan reserse war bann *best*

practices bann diferan lezot pei.

E fer manner ki nou osi nou kapab met bann bon lankadremman ki nou, nou a kapab avans nou sekter biznes, me osi avans nou lekonomi. Dernyen keksoz mon ti le koz lo la Mr Speaker, i annan sa zafer kot bann biznes ki...

Bann biznes Mr Speaker, ki letan nou pe koz lo *fixed penalty*, *fixed penalty* Mr Speaker. Yer nou fek war en Lalwa ki koman *Bills Committee* nou'n war en Lalwa ki pe koz lo bann zafer *fixed penalty and compounding of offences*. Enn bann keksoz ki mon krwar ki'n fer resorti se kapasite pou nou kapab-pou nou kapab *monitor* bann *issues* ki leve.

Monitor bann diferan, diferan *offences* i ganny fer e ki manner nou *deal* avek sa. Ozordi i annan en kantite landrwa kot petet dimoun pa pe neseserman fer zot bann biznes parey zot sipoze pe fer.

I annan bann petet penalti ki ganny mete me selman nou pa pe kapab *monitor* e fer sir ki sa bann dimoun pe *comply*. Or menm dan serten lenstans serten dimoun pe fer serten *offences*, ki nou, nou sitan nou napa lakantite kapasite pou *monitor* pou war sa bann zafer.

E nou pe, nou pa pe kapab *capture* bann problem ki, ki pe leve dan bann diferan biznes. So Mr Speaker, mon krwar enn bann keksoz ki *Licensing* i devret pe fer se *build capacity* pou kapab. Or anploy plis dimoun or anploy plis teknolozi pou kapab desifre, war sa bann, sa bann *issues* kot i leve e *deal e deal* ek sa bann *issues* parey i devret ganny *deal* avek.

Pou ki dimoun i ava annan plis konfyans dan bann biznes; dimoun ava annan plis konfyans dan, dan lafason ki bokou bann dimoun i fer biznes. E konsomater li menm - aköz *Licensing* i la pou, pou protez e prezerv konsomater. So konsomater osi i ava ki *the end user of* bann prodwir ki ganny servi par bann biznes, i ava kapab ganny proteze ganny *the best service* ki posib.

So Mr Speaker, parey mon'n dir mon, mon krwar poudir *Licensing* i bezwen fer bokou plis travay, pou kapab revwar lanvironnman *licence* Sesel. Revwar lanvironnman regilasyon Sesel an se ki konsern biznes e fer ki i vin enn bokou pli - mon pa le dir *relax as such* - me enn ki bokou pli fasil pou dimoun kapab antre dan biznes.

Pou bann nouvo *emerging* biznes kapab *setup*, fer e *operate* e fer larzan kre larises, kre lanplwa pou bann

dimoun. E vin avek bann keksoz en pti pe pli inovan, pli modern pou kapab avans sektèr biznes Sesel.

So avek sa Mr Speaker, mon pou aret la mon ava esper Minis donn son larepons e mon ava fer mon kontribisyon dan *Committee Stage* pli tar. Mersi.

MR SPEAKER

Mersi Onorab. Onorab Sandy Arissol.

HON SANDY ARISSOL

Mersi Mr Speaker. Bonzour ankor enn fwa tou dimoun ki a lekout. Mr Speaker, letan souvandfwa nou koz lo *licence* dimoun i asosye li avek biznes. Dimoun i asosye li avek bann keksoz formel ki ou fer, parske zisteman ou bezwen en *licence* pou ou kapab fer sa ki ou anvi fer.

E letan nou pe koz lo *licences* i fer mon mazin Bel Ombre. Bel Ombre an se moman letan nou pe koz lo sa proze Lalwa. Nou annan en kantite dimoun ki pe fer bann biznes pozitiv dan nou distrik. Kantite biznes nou annan e nou annan plizyer dimoun ki dan biznes pandan plizyer lannen.

Nou annan nouvo dimoun ki'n antre pou fer nouvo biznes par egzanp letan nou pe koze nou dan distrik Bel Ombre nou annan bann

magazen. Nou annan lotel, nou annan *daycare*, nou annan restoran, nou annan bann *takeaway*.

Nou annan Peser ki annan zot bato ki anmenn, ki fer en lot kalite biznes nou annan bann bato lwazir sa ki nou apel bann bato ekskirsyon. Nou annan en seri biznes dan distrik Bel Ombre an se moman letan nou pe koze.

E letan Bel Ombre i kontinyen an mouvman pozitiv an relasyon avek biznes, nou Lotorite distrik nou'n osi ganny sans zwenn avek bann reprezantan *Auberge* o bor *La Scala* kot bis vire Bel Ombre. Pou nou gete kwa ki zot anvi anmennen pou sanz sa fasad sa landrwa parske en pe letan i abandonnen.

Akoz nou'n ganny en zoli kozri avek zot pou nou gete kwa ki zot kapab fer pou elev en pe sa fasad nou distrik ki baliz avek delo sale. Nou'n an kontak avek responsab proze isi devan Anse Sima kot en propriyeter etranze ti aste, zisteman pou fer en konstriksyon an relasyon avek tourizm Anse Sima i sa lans vizavi avek sa legliz *St Luke*.

Nou'n ganny sans koz avek son reprezantan e boner sa lannen *Zanvye* lotel *Fisherman's Cove* ti fer en miting piblik zisteman pou

eksplik zabitan Bel Ombre e piblik an zeneral kwa ki li i anvi fer an term sa lotel ki egziste la pou donn li en nouvo, en nouvo gete parey nou dir.

So i annan. Bel Ombre i kontinyen an mouvman parey bann biznes. Bel Ombre i kontinyen annan bann keksoz pozitiv e nou annan plizyer zenn ki pe vin devan e alor lo kote biznes Bel Ombre nou pa pe mal debourye.

Alor letan nou pe koz *licence* Mr Speaker, lo sa lamannman ki devan nou, I annan detrwa mo ki mon'n note ki Minis in dir. Minis in servi sa mo amelyor, desantraliz latmosfer biznes; Minis in koz lo fasiliteyasyon lenvestisman. I sa trwa mo ki mwan, mon kontan.

Mon pe dir sa Mr Speaker, parske souvandfwa parey nou'n tann dir i annan dimoun i santi poudir letan i pe *apply* en *licence*, i anvi fer serten biznes.

I annan bann sa mo ki nou servi, i annan bann lanpayaz ki vin avek e souvandfwa se *Licensing* ki ganny targete oubyen se *Licensing* ki ganny blanmen. Parske sa ki nou pa konpran se parfwa pou ou ganny sa *occupancy* pou ou *run* sa biznes se i annan bann lezot Lazans osi ki zwenn avek *Licensing*, pou fer sir ki tou

keksoz i annord pou ki ou kapab *run* sa biznes.

Public Health i enn, *fire*, *SFRSA* i en lot, so kot tou sa bann Lazans i vin ansanm pou asire ki sa biznes ki pe ganny prezante ki vin devan. I azour avek tou keksoz e pou asire ki sa dimoun ki pe *run* sa biznes i an konformite avek tou Lalwa oubyen tou bann lamannman nesese ki annan dan pei.

Be letan Minis i koz amelyor, amelyor e desantraliz latmosfer biznes mon kontan. Parske si sa lamannman ki devan nou, pou zisteman pou ed nou fer sa mon napa difikilte avek sa.

Parske sa i a fer ki bann dimoun ki santi poudir zot annan sa bann difikilte, pou fer sa lot *step* si sa lamannman pe ede avek sa Minis. Atraver ou Mr Speaker, mon krwar i a fasilite bann tranzaksyon.

I a fasilite bann demars ki bann dimoun pe ekout nou zot pe fer. E an menm tan mon krwar i ava enportan pou zot konnen osi, kote zot ale pou sa bann demars pou fasilite sa lenvestisman ki zot anvi.

E sa kominikasyon ki zot bezwen. Parfwa dimoun i mank serten kominikasyon. Zis i dir non, oubyen in ganny dir wi, be selman napa sa leksplikasyon ki vin avek.

Souvandfwa i osi annan sa laspe lokasyon. Par egzanp

ozordi dan Sesel i annan en *pattern* kot tou dimoun i annan li en bis manze. Me selman apre i tourn an ron i dir ek ou, i pa konnen ki i pou fer avek? Kote mon mete? Kote mon ale avek?

So i annan tou sa laspe ledikasyon ki vin avek. E si sa lamannman ki la ki devan nou Minis i an relasyon ek sa ki ou, ou'n dir ek nou pou fasilite bann dimoun an relasyon avek sa ki zot pe fer bann lezot biznes.

E sirtou parey Onorab Woodcock in koz ozordi, nou annan plizyer bann zenn ki pa nesese man annan menm *thinking* avek nou, pou zot kontinyelman fer menm biznes ki tou dimoun i fer be li i anvi inovativ. I anvi anmenn promot nouvo keksoz modernizasyon transformasyon.

Me si sa lamannman ki la devan nou pe ede pou fer tousala ki mon krwar i bann keksoz ki bann zenn sirtou ki pe ekout nou zot pa ava ganny difikilte zot pa santi zot in pri. Me i ava annan bann laport ki ava ouver parey mon pe dir avek serten leksplikasyon, an relasyon avek kwa ki zot anvi fer e ki bann gidans zot ava gannyen zisteman pou zot zis pa ganny dir non.

Me i annan bann gidans ki ava vin avek poudir e get sa, be ou kapab fer koumsa ou

kapab fer koumsa sa i ava anmenn ou lo sa lot letap ki ou, ou pe rode koman sa zenn, oubyen sa nenport ki dimoun ki anvi investir e fer son biznes parey i anvi.

Alor Mr Speaker, mon krwar *Bill* i pti, pti e esansyel in ganny fer atraver sa ki Minis in dir ek nou tou sa bann Manm zot in koz lo la. Selman mon krwar i enportan pou zot kontinyen fasilite, fasilite biznes. I enportan sa.

Pou nou kontinyen larg lanmen nou bann zenn fasilite zot, annou rode ki mannyer nou ouver laport pou zot, pou zot pa pri. Oubyen dan bann fristrasyon lo en senp pti size me pou nou gete ki mannyer ansanm nou kapab ed zot pou zot demare. E letan mon ava pe konklir Mr Speaker, an siportan sa proze Lalwa ki devan ki'n ganny anmennen sa pti lamannman, mon ti a kontan osi profite la, pou mwan felisite bann dimoun dan mon distrik; bann dimoun fer bann keksoz pozitiv.

E bann biznes parey mon dir ki'n la pou plizyer lannen ki pe anmenn en ranman pou pei parske zot anploy plizyer bann, bann zabitan Bel Ombre e zot osi kontribye dan lekonome pei.

Sa i fer ki nou ganny larzan pou fer bann lezot proze dan distrik ki fasilite osi zabitan mon distrik menm si i pa

aplike direktman avek sa biznes.

Alor Mr Speaker, mon ava aret la anvi letan nou al dan *Committee Stage*. Selman mon ti a kontan si Minis i kontinyen met lanfaz lo la letan i fer son repons pou eksplik nou en pti pe an relasyon avek bann lamannman.

Sirtou ler i konsern *Licensing* sa lot prosedir. Konmsi olye dimoun i ganny dir non i annan sa lot *process* ki i a vin avek. Sa *advice* ki kapab *advice* li pou konpran ki i fer me pa bite e tourn an ron.

Me Minis, mon ti a kontan montre mon sipor pou sa lamannman e asire ki tou bann dimoun dan mon distrik ki pe ekoute, zot a konpran e zot ava swiv sa ki pe arive ozordi kote zot osi zot antre dan sa ki nou pe sey fer. Mersi bokou Mr Speaker.

MR SPEAKER

Mersi Onorab. Onorab Aglae.

HON EGBERT AGLAE

Mersi Mr Speaker. Bonzour Minis ek *panel CEO, PS*. Mr Speaker, Mosyon ki la devan nou i konsern en *Bill* pou amann serten parti bann Lalwa ki gouvren *licence* e ki pe fer provizyon osi pou annan *licence* tanporer dan bann ka kot napa regilasyon ki atase ek sa biznes, ouswa servis ki en

dimoun i anvi met devan ouswa i anvi antreprann. Sa i kler.

Dezyenmman, nou konnen poudir i osi annan son lenportans ki *licence* i ganny donnen dan en fason pou etabli serten lord, ouswa kod etik dan biznes pou ou kapab bouze antreprann en aktivite. Akoz si napa *licence*, byensir nou pou war bann diferan aktivite ganny fer ki dan en fason petet nou kapab dir dezord.

Nou pe evolye; lemonn i evolye. Nou nepli dan bann letan kot ti annan bann letan lontan kot ti annan bann *traders* ki ti zis pase parey lontan nou ti dir dan... Kot ti annan bokou bann larout komers ki ti zis ki pa ti ganny *regulate* dan en sans.

Me ozordi nou'n ariv lo en pwen, kot nou santi poudir *licence* i annan son lenportans pou kapab etabli lord avek en etik dan fer biznes.

Mon le osi met lo rikord Mr Speaker, mon krwar letan nou pe koz lo sa *Bill* mon'n ekout bann entervenans lo lot kote latab - partikilyerman atraver ou Mr Speaker, letan politik in antre dan sa *Bill* li menm dan en fason, kot in ganny dir poudir lontan politik ti ganny zwe letan ou pou ganny en *licence*.

Be letan mon'n analize mwan osi, akoz nou dir parfwa

nou *state the facts right*. Pti biznes isi Sesel, in vin en moter lekonomi li menm. E letan mon regard partou dan sa Providence tou an desandan pou vin ver Victorya, sa kantite biznes ki'n ne ki'n grandi, be mon demann mon lekor si tou sa dimoun in siport, ti siport *SPPF*, ti siport *US* e ki zot in ganny en *licence*.

Akoz si ti en pratik avek Gouvernman avan pou get konotasyon politik pou donn ou, ou *licence* byensir plizyer sa bann pti biznes pa ti pou ne.

Mon pa dir, mon pa dir petet in annan serten lenstans, me selman mannyer in ganny dir konmkwa tou i bezwen ganny gete politikman si ou pa siport Gouvernman nou pa pou donn ou *licence*.

Fodre pa ki nou, nou senm sa kalite konfizyon la, akoz si *LDS* in ganny eleksyon en kantite biznes in deryer li pou *sponsor* li. E sa bann biznes pou zot kapab *operate* zot ti bezwen ganny en *licence* anba ansyen Gouvernman sa i kler.

Mr Speaker, lot pwen ki mon anvi fer resorti mwan se nou bezwen fer atansyon osi letan nou pe donn *licence* biznes. E la mwan, mon dir letan Onorab *Leader* Lopoziyon, Onorab Sebastien Pillay atraver ou Mr Speaker,

ti le anil sa *S.I.* kot i konsern bann *areas of* aktivite ki govern bann biznes, nou, nou santi poudir i ti annan serten *areas* ki si nou les etranze antre, i pou devor sa aktivite ki sa pti Seselwa pe fer.

E se sa rezon ki ozordi menm si nou pe fer lamannman Lalwa *we need to be extra careful* malgre nou dan *WTO*, *ok?*

Kot nenport ki, ki anvi vin investir i kapab antre ki annan en lenvestisman. Me selman nou bezwen et en pti pe pli pridan. *ok?* I vre ki nou annan serten defayans lo kot i konsern serten lekspertiz avek bann bouzman ki lekonomi pe bouze, modernite, inovasyon.

I vre ki nou annan serten mankman lo kote lokal ki nou pou bezwen serten lekspertiz enternasyonal. Me selman dan en fason pridan, mon dir koumsa pou nou pa ganny anvair en sekter ki pou dominan par etranze a lavenir, akoz nou mankman lekspertiz.

Nou devret regard osi, osi de lavan lo ki mannyer nou promot Seselwa, nou Seselwa pou zot osi pran bann bat. E la mon pe koz dan serten sekter enportan, ki nou pou napa swa nou pou bezwen war nou pe form par ladan. *Ok*, sa i bann sekter teknolozi e bann *financial sectors* ki vize lo nivo

vertyel *online* e bann servis osi *online*.

E bokou pei pe war li pe fer bann lamannman parey dan zot bann Lalwa e regilasyon pou kapab met azour. Akoz zot in war poudir i annan in tarde e letan zot in war poudir bann aktivite ki ganny deroule anba zot ziridiksyon.

Zot in war osi poudir sa bann aktivite i annan ki'n promot serten fason fer ki pa legal. In annan frod, in annan bann *money laundering activities* ki'n ganny ... avek bann biznes. Menm parey Sesel letan nou'n antre lo bann *blacklist* lo bann *grey list*, nou sistenm nou, nou lendistri *offshore was one of the*, enn bann fakter mon kapab dir ki petet pa ti ase *regulate* anba Lalwa.

Ki'n fer ki i annan in pase in profit ladan. E mon santi poudir bann lenstans parey ozordi i bann legzanp bann dan listwar ki fer nou reflexir e ozordi vin avek bann propozisyon lamannman dan Lalwa, pou kapab regulariz e siperviz sa *oversight* ki nesese nou bann sekter ... *licenced*.

En lot pwen Mr Speaker, nou koz lo *licence* wi *licence* i en keksoz ki i fasil pou ou dir kot en biro *Licensing* pou mon rod en *licence*. E ou a ganny *issue* en *licence*. Me mon krwar bout enportan ladan e

Onorab Cosgrow mon koleg in tous en pti gin ladan se *the condition of granting the licence*.

This is where problemn i vini. Mon krwar in ariv moman letan osi pou fer serten revi la Minis i la, sey etabli ki bann revi ki nou kapab fer avek bann kondisyon ki parfwa nou met devan avek *licence*.

I annan serten aktivite, wi mon santi poudir i pou nesaser *set* bann kondisyon ase o baze lo natir sa aktivite, ouswa potansyel ki kapab poz swa serten danze lanvironnman, swa serten danze lasante piblik.

Ouswa lo en kot, en nivo nasyonal ki kapab koz serten danze dan li menm. Sa mon konpran. Me i annan bann serten sa aktivite *licence* pti biznes, ki fer ki parfwa nou en pti pe tro egzizan lo demann lo, lo bann kondisyon pou kapab *issue* li son *final licence*.

Mon pran bann senp legzanp nou tou nou anvi dimoun i leve debourye, dimoun travay, dimoun al rod en pti, en pti ganny pen par la.

I annan ki malgre parfwa serten sa bann biznes i repetitiv nou kopi lo kanmarad. Me selman lenportans, si sa bann dimoun pe pey en taks i pe kontribye dan lendistri, i pe kontribye dan pei li menm pou fer lavansman pei.

Nou war serten legzizans kot ou pou demann en dimoun pou en pti biznes dizon parey i kapab menm manze, ouswa en keksoz pou fer an relasyon avek *tourism* dan li menm pou dir li poudir si napa en *toilet* i pa pou kapab *operate*.

Malgre personn pa vin asize kot son biznes zis i vini pou en servis apre i ale. Ouswa *parking* i annan landrwa ki i dir ou fodre ou fodre ou annan *parking*. Malgre sa dimoun i zis vini i fer koleksyon apre i pe ale. Konmsi i bann keksoz ki nou bezwen asize vwar, *is it now* sa bann letan koumsa eski la nou bezwen i annan sa lenportans pou nou kapab met sa legzizans *as part of the condition of son licence*.

I annan bann lezot legzanp osi ki swiv avek parey bann kondisyon reste, swa dormi bann keksoz koumsa. Mon krwar in ariv en moman letan pou annan en *review* lo la.

Lot pwen Mr Speaker, ki mon anvi touse avan mon terminen, se lafason ki nou dir Seselwa, byensir i ganny vwar pou ganny en *licence* ler i anvi konmans fer en biznes fas avek sa etranze ki vin devan.

Mon santi ankor annan en pe dekalaz an sa ki konsern pou nou pous sa Seselwa, pou li kapab konmanse, ouver sa bann laport nesaser diriz li kot

i bezwen ale pou li kapab ganny son *licence* pa fer son lavi vin difisil.

E parfwa dan semen i vwar i pe vir an ron ouswa i *give up* konpare ek en etranze ki ler i vini li msye petet i vin avek en kravats, ek en palto, nou pa ni konn son *background*, li i vin i ganny pase *voop vap, vap, vap* taler ou vwar son *licence*, i ganny de i al kot son Avoka i fer tou lot, lot.

Konmsi *we need to be mindful* sa kalite pratik, aköz in vin en keksoz dan nou kiltir ou a dir, kot si li en aköz li i en Seselwa non ou bezwen fer li pas tou sa bann laport; kan msye ler i vini sorti laba deor nou pa konn li ou a dir tou son keksoz i ganny fer fasilite lo en plato en pti moman i ganny son *licence* i konmans *operate*.

So i bann keksoz ki mon santi nou bezwen vwar si nou anvi promouvwar ti le oter lekonomi.

E yer ler mon'n ekout Mr Speaker, i annan en zofisye *IMF* ki'n koze, aköz in fer resorti, i dir ou Sesel ti kapab fer pli byen, an term son lekonomi. E taler Onorab Loze li osi in mansyonnen poudir, wi nou kapab fer pli byen mon santi.

Me parfwa nou vwar nou annan serten lanpayaz avek serten nou bann keksoz ki nou pe fer isi menm ki pa pe

promot sa fason fer, ki kapab fer keksoz fer pli byen.

E dernyen mon swete ki letan nou pe met sa Lalwa devan nou Mr Speaker, mon swete ki napa nanryen ki ganny kasyet pe ganny kasyet par deryer.

Mon dir sa aköz Mr Speaker, letan nou'n pas serten Lalwa isi dan sa Lasanble menm Konvansyon, solman apre nou'n vwar poudir i annan serten keksoz ki'n ganny arive e son vre koz e rezondet deryer, pa ti ganny met devan nou o-kler isi dan sa Lasanble.

Mon pa anvi al antre dan *polémique*. Me selman mon swete poudir letan nou pe fer sa bann lamannman, pou sa bann aktivite ki napa en *licence* ki pou esper en nouvo regilasyon pou kapab fer sa bann aktivite, nou pa pe promot serten dalon ki pe vini ouswa ki pe demann serten keksoz ki nou vwar poudir i pa kapab fer la, aköz kondisyon *licence* pa permet li, *we need to be sure about that*, pa vin vann nou en keksoz ki apre nou pou vwar poudir, be i pa ti koumsa ki Minis ti eksplik nou.

Avek sa mon pou termin lanmenm. Mersi.

MR SPEAKER

Mersi Onorab. Bon, sa i bann Manm ki'n demann

laparol nou'n termin lo deba e mon ava envit Minis pou...

HON SEBASTIEN PILLAY

(Off-Mic)

MR SPEAKER

Ok petet mon'n mank ou Onorab Pillay ou annan laparol.

HON SEBASTIEN PILLAY

Mersi Mr Speaker. I ankor bonzour Mr Speaker, pou tou dimoun.

Mon'n ekout bann deba ki'n ganny fer lo sa Prozedlwa. Me avan mon tous sa Prozedlwa li menm, i enportan ki mon koz en pti pe lo konteks *within which* sa Lalwa pe ganny pase ozordi dan nou pei.

E ki mannyer si oule i nesese pou konman en Seselwa, nou fer en legzanmen konsyans lo kot nou trouv nou ozordi e kote nou pe ale.

Mon dir sa Mr Speaker, akoz in annan plizyer komanter ki'n ganny fer. Mon'n tann a plizyer repriz *remind* bann Manm pou reste lo lesansyel Lalwa.

Me lesansyel sa Lalwa i pa egziste lo li tousel. I egziste *as part of* en koleksyon. I form parti en striktir Legal ki enkonpor plizyer keksoz.

Akoz par egzanp avan ou ganny en *licence* ou bezwen al en landrwa si nou napa later

rod en later. Si ou napa en bilding ou bezwen al kot en labank rod en *loan* pou fer ou bilding.

Once ou'n fer ou bilding ou bezwen al kot avan ou fer ou bilding ou bezwen al kot *Planning* fer en plan, e *submit* kot *Planning*. Avan ou fer sa plan ou bezwen al vwar en arsitek ki pou *design* ou plan, al vwar enzenyer ki pou fer ou plan feray apre met ou plan kot *Planning*, *Planning* i aprouve. Ler ou fini ou fer en kontrakter.

So until ki sa bilding in ganny fer ou pa pou kapab ganny sa *licence*. Akoz ou bezwen *operate* sa *licence* from sa bilding. *Unless* ou al lwe en landrwa e la i en lot fason.

So i annan tout en seri prosedir diferan *licence* pou anmennen ki ou bezwen swiv. Ki ou bezwen *abide to*.

Zot kestryon fondamantal ki nou bezwen demann nou lekor si eski tou dimoun ki la deor ki rod en *licence* pou fer biznes i santi poudir klima dan ki ki'n ganny sa *licence* i permet li kapab devlop sa biznes e kree larises pa zis pou son lekor, kree larises pou pei, kree larises pou lezot dimoun par anploy lezot dimoun. E sa bann dimoun an retour i kree larises pou zot fanmir atraver zot lanplwa, atraver lenvestisman ki zot fer.

So i annan tout en seri keksoz ki nou bezwen met an perspektiv. E la Seselwa i bezwen konpran poudir tou keksoz pe ganny fer egzaktaman parey in ganny fer pandan sa 43 an, napa nanryen diferan.

Mon pou eksplik sa Mr Speaker, akoz par egzanp legzanp pli vizib ki nou'n gannyen en avyon i apoze lo *airport, bann* gro go pake, gro, gro konminyon i vini i tir bann materyo brit ladan sez latab, mon pa konnen kwa ki i annan ladan, personn pa konnen personn pa kapab dir, egzaktaman parey in ganny fer pandan 43 an in ganny fer parey san okenn diferans.

Sa bann dimoun i ganny tou privez pou *substantiate* mon largiman Mr Speaker, mon pou lir en morso lartik *Les Seychellois* le 23 Zanvye 2016 ki dir, "*buses with tinted dark windows make their way on the apron to pick up the other disembarking passengers of the aircraft, boarding ... drove them out to the airport by the VIP*" en lartik ekrir par Onorab Gervais Henrie ozordi ki nou Deputy Speaker atraver ou Mr Speaker.

E in menm annan en portre en *pickup* mon ava montre ou an deor get kot *VIP Airport* ki montre en *pickup* ranpli ek bann pake.

Everything has been done exactly like before. Okenn keksoz ki ti ganny promet pou ganny fer diferan, pa pe ganny fer diferan.

In fact sel keksoz ki nou kapab note ki'n ganny fer diferan se ki, a sa pwen kot zournalis ti kapab tir sa bann portre, ozordi ler zournalis i tir sa portre i ganny arete, i ganny met dan kaso i ganny sarze. I pa ganny sarze Ankour li, i ganny anvoye Anse Royale pou li ganny sarze kot personn pa konnen i pe ganny sarze.

Vwala sel keksoz diferan ki nou annan dan nou pei ozordi. E vwala konteks dan ki nou pe diskrit en *Lalwa Licensing*; en konteks kot nanryen pa'n ganny sanze dan lafason ki nou pe fer keksoz.

En lot keksoz ki enteresan Mr Speaker, dan sa konteks kot oparavan bann dirizan politik ti koz lo louvertir, ti koz lo transparans. E la mon pou *substantiate* ankore Mr Speaker, Verbatim Lasanble e ki ti ganny raporte lo la "*Opposition Leader Wavel Ramkalawan said that the Government introduced the Licensing Bill* ki'n kree bokou baryer pou Seselwa dan lepase, i annan tro bokou *red tape* e tro bokou *delays* ki ti pe dekouraz dimoun."

Msye Ramkalawan i azoute ki li i le vwar en *Licensing Authority which for once* i endepandan dan son desizyon, ki okenn Politisyen pa kapab dir ki pou fer kan i konsider laplikasyon en *licence*.”

Mr Speaker, nouvo Lalwa ki monn gannyen devan nou la i *still* prevwar ki se Minis ki fer regilasyon. E annefe sel keksoz ki’n sanze Mr Speaker, se ki dan plas i Minis Finans e Minis pour Lenvestisman Lendistri. Mon pa pe blanm Minis, me vwala ki’n sanze Mr Speaker. Egzakteman parey 43 an. Egzakteman.

Me kwa kin sanze? Bann dimoun ki ti la 43 an in vin dan Lopozisyon nou pa dakor ek *S.I.* ki donn aktivite ekonomik e servis lezot dimoun an deor nou pei, savedir par egzantp mon pe koz pou Lopozisyon pou nou *US*, ler nou ti anmenn Mosyon ler *US* ti anmenn Mosyon pa mon ki’n anmenn Mosyon pou *quash* sa *S.I* ki ti pe koz lo aktivite ekonomik e servis ki bann etranze i kapab fer, i aköz nou’n santi e baze lo desizyon Seselwa an 2020, Seselwa pa’n dakor ek nou fason fer ki nou bezwen revwar;

Ki nou pa dakor ki etranze i *compete* ek Seselwa dan bann servis ki Seselwa pa ankor kapab devlope, ki ti ava

kapab devlope kapab kree larises pou zot.

I pa *LDS* ki ti anmenn. Se sa ki ti la dan 43 an ki’n fer keksoz diferaman. Sa ki’n toultan promet pou fer keksoz diferaman dan sa 43 an in esper nou *US* anmenn, apre i dir in bat lanmen in siporte.

Se sa larealite nou pei. E pou ilistre sa Mr Speaker, ankor enn fwa pou *substantiate* mon lagirman *S.I.* ensi konsern *Port Fees* e *Harbour Dues* ki pe fer pri lavi monte lo zil se *US* ankor enn fwa ki’n anmenn Mosyon pou *crush*, e se *LDS* ki ti dan Lopozisyon sa letan ki ti promet pou fer sanzman ki’n fer egzakteman parey 43 an in gard li parey.

In fact Mr Speaker *S.I.* ki pe remet 1500 Roupri dan pos bann *cleaners*, *Cleaners* Korporativ ki’n zot in gannyen sa R1500 kot Lopital Mr Speaker mersi bokou *US*, *LDS* i vot kont ankor.

Se sa realite dan konteks ki sa Lalwa pe pas ladan ozordi e tou sa bann swadizan gran profet Politik ki ti vwar tou keksoz i mal ozordi, *I am sorry look at yourself in the mirrors ladies and gentlemen* zot in bat latet dimoun an 2020.

This is what has happened Mr Speaker. There’s nothing new in the Law ki pe

provide anything substantial pou la pou nou.

Sel keksoz ki zot pou vin avek pou vin dir nou, *and I will come to that in a minute Mr Speaker, se provisional licences. Provisional licences is the only thing you can come up with after thirty odd years, dan Lopozisyon avek plizyer plan ki ti pli bon ki pou tou dimoun, avek tou meyer fason fer se provisional licence is the best you can come up with.*

I mean mwan pou mwan Mr Speaker, I find that as en si sa pa apel en bat latet pou Seselwa I don't know what is.

E nou bezwen pas nou letan Mr Speaker e mon *sorry* mon pa le grens personn dan sa Lasanble ozordi. Pou nou fer diferan kalite tapaz konplent zis pou ki nou kapab defann lentere Seselwa dan sa Lasanble e nou ganny akize malelve nou ganny akize isi laba.

This is Mr Speaker, this is what it is ozordi. Everything pe ganny fer parey 43 an al sel eksepsyon ki ti la 43 an pe fer tou keksoz diferan.

E pou sa rezon alors ki nou bezwen nonm *Maison du Peuple* toultan. Akoz nou konnen poudir 2025 lot Prezidan Sesel pou sorti *Maison du Peuple!*

(APPLAUSE)

HON SEBASTIEN PILLAY

E mwan mon konvenki ki Patrick Herminie pou vini, lot Prezidan Sesel.

(APPLAUSE)

HON SEBASTIEN PILLAY

Ou konnen akoz mon konvenki Mr Speaker, akoz *when it comes to* administre en pei, ou pa kapab kit tou keksoz parey e espekte en diferan rezilta. *This is what is been done.*

Tou keksoz i reste parey i espekte en diferan rezilta. Ou les Arab pase ek son ta materyo brit lo *airport* ou espekte en diferan rezilta ki dimoun pa pou konplent.

Ou met *habour dues* ek *port fees* lo dimoun, ou espekte en diferan rezilta apard ki pri lavi i monte.

Ou pran larzan ek en dimoun ki ganny R7 mil en *cleaner* ou pran R1500 ek li e zistifye akoz ou'n pran sa R1500 san e espekte ganny en diferan rezilta.

Ou pratikman kit en Lalwa *licence* preski parey, e nou espekte en diferan rezilta.

But let's look at business Mr Speaker. Ki biznes i pe espekte ek nou *right now. Most glaring example* legzanp pli kler pou nou ozordi bann biznes Providence.

Bann biznes Providence. Mon ti ava kontan atraver ou,

ou demann tou bann gran kozer pou dir mwan sa latan dan sa Lasanble, akoz nou ki bann kozer isi, akoz nou pa oule ganny dir mon pe akiz person, mon pa oule ganny dir mon pe mank respe pou person. Dir mwan ki zot in fer pou sa bann biznes Providence.?

Apard ki tande poudir *container* larme ti ansarz, tande *container* in al isi in al laba, pa met *case* Ankour, kwa ki zot in fer pou biznes Providence? Nan...ryen! *Everything been done* parey 43 an e dir nou poudir i annan sanzman.

The only change, ki nou'n gannyen se ki nou'n ganny en Gouvernman ki *face* en lenposibilite pou sanz son prop fason fer akoz in gout pouwar e li i pe bwar dimyel e larestan Seselwa pe bwar vineg. *This is what it is.*

Mr Speaker, pou *substantiate* largiman ki nanryen pa pe ganny fer, ou ava dir mon ki koneksyon i annan i en koneksyon akoz merit sa Lalwa i al pas dan en konteks kot nou pe viv atraver en Gouvernman ki sipoze delivre.

Yer nou vwar en mesaz pe sirkile, en dimoun ki reste anler Le Niole pe dir 4 mwan sepa 3 mwan in ekrir sepa konbyen in ekrir e i pe enlore ki person pa viktimiz li, akoz

i pe esper larepons avek bann Lotorite Konsernen.

Mon ki'n dir? Non! Se sa manm piblik ki pe dir. E i pa'n vin dir nou Lopozisyon li, in dir Seselwa an antye, tou Seselwa in dir. *Is this change?*

E ler nou vin avek en Lalwa Mr Speaker, *I got nothing against with the Minister, the Minister* in fer son louvraz in prezant nou son Lalwa *as she should as it's a remit.*

Me selman, eski Minis li menm i satisfes avek lanvironnman biznes? E eski i satisfes avek konteks birokrasi ki egziste ozordi pou kapab fer biznes marse?

Eski Minis li menm i pa ti ava kontan vwar plis *free rein* pou li kapab fer plis pou bann biznes?

Be i *constrain* - i *constrain* akoz napa.

Mr Speaker, pran par egzanp sa garson ki ti annan *Rambo* la lo *playground*. *The whole process of bidding* pou sa bann zafer in vin en nespes kafriyaz.

Garson in bezwen mont - sa msye pa'n vin kot nou li, in al lo *facebook*. Ankor enn fwa in al dan piblik, dan medya, *it's a licenced business*. I ganny en *licence* pou fer en biznes *but how is he going to develop a business*, ler li i pe *compete* ek lezot dimoun

there's an advantage given to others?

How is ki manner i pou benefisyé. How will granting a provisional licence Mr Speaker, for someone when the condition ki supposed to be met, asset in favour of others avan menm ki sa provisional licence will take place?

So basically ki zot pe dir mon se ki Licensing will tick a box. Mon vini Sebastien Pillay la ou la ou licence ou, mwan al fer ou deboury prezan pou al lager pou ganny tender pou ganny tender pou ganny isi pou ganny laba, kan tender pe ganny donner avek dalon; pe ganny donner ek zanmi. Ki manner ou kapab dir mon sa i sanzman?

I pa bann legzanp ki mon pe evante. I bann legzanp ki'n pas dan medya kouran ki'n pas an piblik.

So the question which is beg it's self Mr Speaker se what is the merit of the amendment ozordi, si kondisyon pa such ki biznes ki sa bann dimoun ki sipoze benefisyé avek sa lamannman pa pe kapab benefisyé avek.

Onorab Crosgrow in servi sa mo pares mon pou admonish li. Annou pa dir poudir i pares, aköz i annan en kantite dimoun in travay lo la. Me kot Onorab Cosgrow is right probableman plis ti'n devret ganny fer.

I'll explain why Mr Speaker. Monn regard tou sa Lalwa e i kler poudir sa Lalwa Licence i konteks aköz i annan plizyer regilasyon ki'n vini try him to harmonize everything, met zot tou ansanm. Mon prezimen i annan en travay legal ase kompleks pou bann dimoun ki'n fer li. Zot in seye. E nou apresye sa.

Me zot, zot in fer li from perspektiv legal Lezislasyon. Me tou Lezislasyon i bezwen ganny aplike dan en konteks. E eski nou pou kapab aplik sa Lalwa dan sa konteks si nou anvi aplik li? E ki nou lentansyon avek sa Lalwa se sa ki nou pa'n ganny en lesplikasyon kler lo la.

Par egzanp Mr Speaker, annou pran bann diferan seksyon dan sa Lalwa. Premye keksoz ki mwan mon konsernen avek se, ki rol en Minis an relasyon avek en Lalwa Licence?

I bezwen ariv en staz dan nou pei kot menm Gouvernman i devret ganny en licence pou li fer serten aktivite. Why? Aköz Gouvernman pa kapab a police son lekor Mr Speaker.

Si sa leksplozyon CCCL in montre nou en keksoz, ki se ki ler ou'n preskri Lalwa e allow Gouvernman pou police son lekor e investigate son lekor, you will never get the truth Mr Speaker.

*So therefore rod Minis pou serten regilasyon, i bezwen zis sa regilasyon an relasyon, avek petet kondisyon. Me pa an relasyon avek *policing of the Act*.*

Me ki mon vwar Mr Speaker, ki mwan mon konsernen avek, sa Lalwa i entrodwir en seksyon ki *basically* donn Minis pouvwar. E sa I pa aplik pou sa Minis ki i pou aplik pou tou Minis.

Mon konsern i sa mon *any Minister* ki vini, i annan sa lyen, i annan sa *whole* lo a Lalwa pou *set* an se ki konsern penalti, an se ki konsern son kriter, son definisyon, son ratifikasyon. Be pou mwan sa i danzere Mr Speaker. Si vreman nou oule viv sa ki Onorab Ramkalawan ti dir, be mon pe konmans realize *everything* ki in dir sa msye in fer tou lekotrer.

This was the opportunity poudir li be *ok let us have an autonomous Licensing Authority*, konpletman *autonomous*. Ki li i ava decide ki mannyer pou donn en *licence*.

Si Gouvernman i le *operate* kek aktivite i bezwen ganny en *licence* e *meet* menm kondisyon ki en biznesmenn i bezwen zwenn.

Akoz Gouvernman i ganny en *unfair advantage*. Par egzanp *STC* i ale al fer en farmasi. *But the conditions are*

not in favor of the other pharmacy ki private!

Because Gouvernman i ou devlop en koneksyon avek sa ki Gouvernman i le fer. *It's not fair. It is unfair competition be it's ok* pou Gouvernman *LDS*.

So ler ou dir mon poudir en *police officer* ki vwar en *infringement* ki pou bezwen al *deal* avek, *the question which beg itself on whose authority? On whose order? The Ministers order? That's what gonna happen.*

E si sa ki Prezidan ti dir ler i ti dan Lasanble i le vin en realite, tir kondisyon ki mwan mon kapab lev mon telefonn e *call* Minis dir Minis al pran *licence* Bernard Georges akoz i pe *disturb* mwan.

I mean sorry pran *licence* Onorab Georges, akoz i pe *disturb* mwan, mon pa'n *mean* li dan sa fason. *So a tone of expression.*

Pran *licence* Onorab Esparon akoz i pe *disturb* mwan.

MR SPEAKER

Onorab ou pe fer en kantite alegasyon. Ou'n vizit en kantite size. Mon zis envit ou pou terminen silvouple, akoz mon ti a kontan prosede avek...

HON SEBASTIEN PILLAY

Mr Speaker, be mon pe koz lo en seksyon ki dan Lalwa. Mon pe koz lo en provizyon ki egziste dan Lalwa, *ok?* La ou'n vwar i fer provizyon pou diferan seksyon ki pou ganny entrodwir. *Ok* mon lo sa seksyon ki eski konsern rol en zofisye *Licensing*, en zofisye lapolis ki sipoze al pran en aksyon kont en dimoun ki pe kas en provizyon sa Lalwa.

Yer nou ti ganny dir par Minis Errol Fonseka an relasyon ki en kestyon ki Onorab Uranie ti demande, ki zofisye lapolis Komisyoner Lapolis e *rightly* so ki Komisyoner Lapolis i kapab al tir en striktir ki lo lans i pa'n ganny *approval* avek li. *It's the same thing.*

Me mon kestyon i se ki akoz sepa *Licensing* ki deside, me se ki ou pe *still retain* donn en *residual power* sa Minis pou fer desizyon lo la? Se sa mon pwen.

Mon dezyenm pwen Mr Speaker an se ki konsern sa Lalwa e sa *issue provisional licence*.

Ankor enn fwa mon bezwen kestyonnen. *where exactly* ki nou pou *defined the term of provisional licence?* Eski *it will be subject to* en *executive control* ki mon ekrir Minis, mon dir mon oule en *provisional licence and then* i anvoy mon kot *Licensing* i

donn mwan en *provisional licence*.

Provisional licences i kree lespas pou labi. Akoz? Nou kapab annan en dimoun ozordi ki pe fer en aktivite ki napa en *licence ok*, ki nou konnen poudir sa pe vini li i ale akoz i kapab *meet* kondisyon ki en *provisional licence* pou vin avek.

Mind you Mr Speaker, en *provisional licence* pa vin san kondisyon. I bezwen vin ek serten kondisyon.

Every licence has to come with condition. Akoz seksyon 22 (3) i dir Minis pou fer regilasyon *providing amongst other things* e Minis ki pou fer *framework* pou fer bann laplikasyon zot evalyasyon *applicable fees*.

So kestyon nou bezwen demande Mr Speaker, se mwan mon ti krwar en *provisional licence* i en *temporary licence to operate* dan en fason dan en *vacuum*, ou napa regilasyon.

Savedir ou pou bezwen annan en *accompanying regulation* ki vin avek. Me sa i vin en problem pou nou Mr Speaker., akoz *it defeats the purpose of a provisional licence* pou an *non-licensed activity*.

Ok par egzanp pirat, eski si par egzanp demen konman ene popilasyon tou dimoun i ale i fer petisyon i dir be *ok*, pirat i en aktivite, eski ou le al

licence pirat? Eski ou pou donn li en *provisional licence* pou fer *taxi* pirat? *Is that what you are talking about?*

En dimoun ki lo lans pe lwe nou son bann *surfboard*. E i annan bokou ki'n seye in ganny en pake problem.

Eski ou pou kapab donn li en *provisional licence* poudir li be ale lwe ou bann *surfboard* pou fer *surfing*? Akoz i bann aktivite ki bann zenn pe engage ladan?

Nou vwar bokou zenn pe enterese avek sa zafer loto konmela. Eski i pou ganny en *provisional licence* pou li provide mon pa konnen en landrwa kot i provide *entertainment* pou bann zenn vini met zot loto parey nou vwar dan bann lezot pei i fer?

What we want to know i se ki *in practice how this will work*. Eski zot in rankontre bann *cases* kot zot pe donn bann *provisional licence* currently? Konbyen *provisional licences* ki zot in donneren? *What where the condition of the provisional licences* ki zot in donneren?

Tou sa ki nou, nou pe dir se ki *the conditions* ki ou pe dir *biznes* i operate ladan i bezwen *match* klima *within which business* pe operate. *But we have to admit that the reality is quite different from what* nou pe tande *from what is painted*.

E se pou sa rezon ki nou bezwen koz koumsa nou bezwen demande sa bann kestyon.

Si nou pa demann sa bann e nou pa fors Gouvernman pou reakte, *then* nou pe *fail* dan nou *duty* konman en Lasanble Nasyonal. *Which is* se ki nou pou zis aksepte tou keksoz e dir tou zafer i bon.

The criticism is not meant to attack the Government. The Government can decide two ways; enn i pran kritik *on board* e i *build constructive* lo la or i pran kritik negativ e i *rebuke*, i antake an retour.

The fundamental questions se ki nou'n ganny mete dan Lasanble Nasyonal pou defann lentera Seselwa *and not to become rubber stamps*.

MR SPEAKER

20 minit Onorab, terminen silvouple.

HON SEBASTIEN PILLAY

Mersi Mr Speaker, pou dir mwan terminen. Alors Mr Speaker, *whilst* ki mon santi poudir serten provizyon dan Lalwa i byen, *but it lacks the basis the clear area of application* pou nou kapab konpran kote sa pou ale. *And it doesn't really change the fact* ki nou annan ozordi dan nou pei.

Mon pa pe war sa lepanouisman parey mon ti ava kontan espekte pou vwar. So mon ava espekte espere ekoute ki Minis i annan pou dir. E regarde ki bann propozisyon ki *Bills Committee* in anmennen pou propoz bann lamannman i fini *regarding* sa Prozedlwa ki devan nou. Mersi Mr Speaker.

MR SPEAKER

Mersi. Nou ava apel Minis pou donn son repons lo deba silvouple.

MINISTER DEVIKA VIDOT

Mersi Mr Speaker. Mersi tou bann Manm Onorab pou zot bann lentervansyon. Petet pou konmanse Mr Speaker, ti ava bon pou mon zis eklersi lo en pwen ki Onorab *Leader* Lopozisyon in fer resorti an se ki konsern pouvwar Minis. E vreman sa *Licence Act* ki devan nou e lamannman ki nou pe vin avek.

Sertenman dan dernyen fwa ki *Licences Act* ti ganny fer lamannman an 2010. Savedir nou pe koz plis ki 10 an pase. *Ok?* Pe al lo 14 an pase. E depi 2010 anba seksyon 28 ti annan regilasyon anba seksyon regilasyon ti fer provizyon pou Minis kapab fer regilasyon.

Savedir sa i en keksoz e toutafe normal, parske konman Minis ou responsab

pou sa antite, ou responsab pou sa Bidze. I bezwen annan en dimoun ki responsab pou kapab met regilasyon ater.

Me sa ki Onorab, petet i pe *mislead* piblik e la mon ava kontan fer resorti byen, se ki anba seksyon 11 i dir klerman poudir Minis i napa pouvwar pou li enterfer dan *licence* dan laplikasyon.

So sa i bon pou fer, fer resorti avan mon konmans mon lentervansyon Mr Speaker.

Nou tann bokou koze lo sa *provisional licence* e Manm Onorab in demande ki sanzman ki sa lamannman pe anmennen avek sa *Licences Act*.

Mon ti ava kontan fer resorti poudir wi sa i en premye konmansman. I en lepa ki i en premye pa ki nou pe pran. I annan lezot travay ki nou pe fer dan *background* an paralel, an se ki konsern amelyor lanvironnman biznes, *improves ease of doing business* e byensir sa pou osi konsern bann lezot lamannman ki nou bezwen anmenn devan.

Me selman dan limedya, i annan serten keksoz ki nou bezwen fer, nou bezwen fer ase vitman.

Enn bann bi ouswa lobzektif prensipal sa lamannman se pou amelyor lanvironnman biznes an se ki

konsern lantreprenarya, e an se ki konsern lakantite letan osi ki pran pou donn en *licence*.

Si nou pe koz lo sa provizyon *provisional licence* sa ki sa lamannman pe fer i senpleman pe amann *Licences Act* poudir nou met en provizyon ladan, pou ki i kapab annan en regilasyon ki ganny entrodwir ki pou govern en *provisional licences framework*.

E aköz ki i enportan ki nou fer sa Mr Speaker, se ki bokou nou bann antreprenner e bokou bann - sirtou bann zenn ki annan en kantite nide inovativ, ki annan en kantite bann nide e bann talan formidab, la zot pe ganny bloke souvandfwa. Zot al kot *Licensing, Licensing* i dir napa en *framework* pou *licence*. Zot al kot bann lezot antite napa enn ki oule pran responsabilite.

Alors sa lamannman pe fer provizyon, pou ki nou met en lankadremman ater, kot i annan bann nide, i annan bann aktivite. E la letan nou pe koz lo inovasyon, nou konnen i annan bann nouvo sekter ki pe sorti, ki pe devlope; sekter nimerik par egzanj i enn, e byensir dan tourizm i annan diferan kalite aktivite ki bann dimoun pe antre ladan. Nou bezwen donn zot en lankadremman pou

kapab siport zot e pou ankouraz zot.

Akoz ki pe arive ozordi se ki zot pe ganny dir non. Ouswa si zot deside ale lo zot menm, i annan en antite pou vini pou annan en lazans pou vini pou dir zot arete. E sa bann zenn i perdi konfyans. Ki nou ti pe fer nou pe senpleman nou pe touy linovasyon. Nou pe touy lantreprenarya.

E alor avek sa lamannman nou'n dir, non, sa sistenm nou pa aksepté. Pa sa ki nou anvi vwar. Nou anvi vwar epanouisman bann diferan aktivite. E nou anvi vwar diversifikasyon bann aktivite biznes e aköz sa i osi enportan?

I enportan aköz nou bann biznes i bezwen konmans vin plis pli inik dan lafason ki zot fer zot bann aktivite.

Sa pou ede ki zot vin pli konpetitiv. Sa pou ede ki zot vin pli rezilyan. Demen letan zot fas avek bann sityasyon ekonomik difisil. Letan zot ava pe debout for, zot ava annan zot en lavantaz konpetitiv. I pou ed zot pou zot kapab soutenir zot lekor.

Alor sa i vremen, vremen enportan dan lanvironnman biznes. E pou nou kapab soutenir sa lankadremman lantreprenarya.

Nou konnen poudir travay lo en kad legal pou sakenn sa bann aktivite, pou pran bokou letan e alor ki sa *provisional framework* pou fer, sa *provisional licence framework* pou fer? I pou donn sa bann dimoun sa posibilite pou zot konmans zot aktivite deswit. E antretan ki en kad legal i ganny travay lo la.

Lavantaz pou sa I bokou. Sa dimoun i ganny sa loportinite pou li toudswit konman son biznes. E dezyenman sa bann dimoun ki pe travay lo lankadreman legal, i a donn zot sa posibilite pou zot vwar en *case study* reel ki devan zot, pou ki letan zot pe drafte bann Lalwa, bann Lezislasyon i vin pli aplikab e *customise accordance to* nou bann kondisyon, ki nou konman en pei nou annan. E byensir sa pa pe ganny fer a se moman.

Alors sa lamannman se sa sanzman ki pou anmennen letan sa regilasyon i vin an fors e byensir Biro *Attorney Zeneral* pe fer *drafting* e letan moman i pare zot tou konman Lezislater zot ava kapab vwar sa regilasyon.

Eski met en kad en *provisional licence framework* eski nou pe anmenn tro bokou regilasyon ouswa plito nou *take a step back* e nou pa anmenn regilasyon?

Sa ki nou'n konstate, se ki biznes i bezwen li en konfor. I bezwen li en garanti poudir letan i pe al konmans fer en biznes letan i pe al investir, i bezwen konnen poudir son lenvestisman i garanti.

E dan bokou lenstans prensipalman pou Sesel, parske nou'n etidye lankadreman dan Sesel, nou'n etidye *landscape*, nou'n var poudir dimoun i pli an faver ki zot tonm anba en lankadreman ki zot pa tonm anba en lankadreman ditou.

E sa i donn zot sa kontinite. I donn zot sa konfidans pou zot kapab kontinyelman investir e fer keksoz pli byen.

I osi donn - sa *framework* pou osi donn en loportinite pou bann diferan lazans dan Gouvernman kordinen e koz avek kanmarad. Nou pa anvi ki demen en aktivite en lazans i dir avek en biznes wi ale fer e apre ou vwar en lot lazans vini dir non, ou pa kapab. E la nou pe afekte, nou pe afekte sa biznes.

Alor avek sa *framework*, i sipoze annan en kordinasyon avek tou sa bann lazans, ki fer ki letan sa dimoun i dir *yes* ou kapab ale al fer li, tou bann lazans i pou bezwen *already on board*.

Byensir dan lafason nou pou ki sa kad legal pou pe travay, i pou pe fer referans

avek bann lezot bann lezot *framework* ki egziste atraver pei.

Me nou'n vwar dan lepase ki mannyer parey Onorab Cosgrow in dir servi bann Lalwa ki dan bann lezot ziridiksyon.

Mon dakor, me osi nou bezwen realize poudir parfwa letan nou zis adopte en Prozedlwa ki sorti dan en lot ziridiksyon i pa relevan pou nou. I annan bokou keksoz ki pa akorde depandan nou sityasyon pou nou i inik. E alor avek sa *provisional framework* i ava donn nou konman en pei loportinite pou nou *customise* sa bann Lezislasyon e *customise* sa Lalwa pou ki i *suit* nou bann bezwen spesifik.

Mwan mon krwar an se ki konsern sa lankadremman legal, sel keksoz ki nou bezwen zis fer sir, se ki en aktivite biznes i enn ki pe asire ki se sekirite piblik, lizyenn i ganny respekte; ki i asire ki i a pe fer sir poudir proteksyon lanvironnman pe ganny sof garde. E osi Sekirite Nasyonal.

Si nou fer sir poudir sa 3 baz fondamantal pe ganny respekte, napa rezon aköz nou pa pou kapab anpes en biznes demare.

E se pou sa rezon ki pou lemoman, kontrerman avek sa ki nou, nou anvi se ankor sanmenm sa, sa sanzman ki

nou pe sey anmennen se ki nou pa anvi kontinyen anpes sa bann biznes konmans *operate*.

Si nou pou regard - mon pou tous lo lezot lamannman ki sa Prozedlwa pe anmennen. *Ok* i annan en lamannman kot *Seychelles Licences Authority* atraver provizyon ki pou ganny retire dan Lalwa ouswa amande, i pe dir poudir si i annan en antite ki li i annan lekspertiz, par egzanp dizon *Public Health Authority, SMSA*, si i annan lekspertiz i kapab toudswit donn son *licence* li menm.

E ankor amelyorasyon dan nou Lalwa dan nou prosedir donn *Licence*, aköz an se moman malgre ki en antite i annan tou lekspertiz pou li kapab *process* e regarde ki bann kondisyon *licence* en biznes i devret swiv, i bezwen toudmenm retourn kot *Licensing Authority* poudir avek *Licensing Authority* zis ou ki annan pouvwar *issue* sa *licence*.

So la ki nou pe dir desantralize si sa antite laba ki li sa *expert* li ki *oversee* sa aktivite biznes an prensipal an prensip, *then* les li *issue* son *licence*. E nou fini lanmenm.

E sa dimoun i pa bezwen *va-et-vient* parey i bezwen fer ozordi.

Ok, sa mon krwar i pou en *improvement* vreman

mazer, ki pou koup birokrazi e i pou osi donn plis konfidans e donn plis lasirans avek sa bann antite ki pe *oversee* sa bann aktivite direkteman pou zot pran zot bann aksyon neserer e pran responsabilite kan i ariv ler.

Ok, bokou fwa la ki nou pe vwar letan i arive letan i ariv en *breach* zot pe bezwen *go back to Licensing*, poudir eski ou kapab *take care of* sa *breach* pou nou, *as opposed to* regard anba zot lankadreman legal ki zot, zot annan tou zot pouvwar e ki zot ti ava kapab *straight away* pran aksyon e *deal* avek bann *breaches*.

Si nou pe regar lezot lamannman, avan mon pou terminen Mr Speaker, parey monn fer resorti lo konmansman, sa i premye seri lamannman ki nou pe vin avek, i pou annan bann lezot lamannman ki nou pou bezwen vin avek.

Wi, Onorab Cosgrow, pares, petet ou krwar sa i en louveraz pares. Me si dan plis ki 10 an lamannman pa'n ganny fer lo sa Lalwa *Licences Act* se sa pares pou mwan. Sa i pli gro pares.

Mon sagren aköz lanvironnman biznes i enn ki dinamik e alor ou bezwen pe fer bann lamannman kouraman.

So mon pa pou aksepte sa *statement*. Me selman pou

mwan koz lo bann lamannman ki pe vini nou pe fer, i annan en plan konpreansiv ki nou pe swiv pou nou kapab *digitalise* bann servis osi ki *Licensing Authority* i ofer.

E an plis ki sa i *already* annan louveraz ki pe ganny fer pou revwar bann kondisyon *licence* pou fer li ou *streamline* li e pou fer li pli efektiv. E tousala i ava vin avek nou bann seri lamannman ki nou pou vin anmennen apre.

An se ki konsern, eski sa Prozedlwa vwar pou anpes etranze ouswa pou les etranze? Pa ditou. Parey zot in fer resorti, bann Manm Onorab in fer resorti, lo lot kote latab; *S.I. 76* i fer kler ki bann aktivite biznes ki ou kapab rantre ladan konman en etranze ouswa ou pa kapab. Alor sa Prozedlwa pa pe tous okenn laspe.

E ankor zis pou fer resorti poudir sa Prozedlwa i *S.I. 76* malgre pa sa ki nou pe regarde ozordi, me selman mon santi petet i bon zis pou mwan klarifye aköz i annan serten *statement* ki'n ganny fer ki pa korek.

Sa Prozedlwa i pa ti okenn i pa ti pe reprezant okenn adisyon ouswa okenn nouvo keksoz ki nou ti pe anmennen.

Me plito sete reflekte komitman ki ti deza ganny fer

an 2016. E mon krwar la tou dimoun in kler lo sa kote, se pou sa rezon ki *S.I. 148* ti ganny *quash*, me *S.I. 76* i anfors.

Avek sa Mr Speaker, mon ti ava kontan remersye tou Manm Onorab ki'n partisip aktivman dan deba e mon espere ki lamazorite de zot, zot vwar poudir sa lamannman ki nou pe anmennen i pe anmenn en amelyorasyon dan *Licences Act*.

I pou anmenn amelyorasyon dan lanvironnman biznes e byensir i annan ankor bokou travay pou fer e nou pe fer tou nou posib ki nou kapab fer, pou nou kapab demare ouswa nou kapab konplet nou *digitalisation agenda* o pli vit, ki posib pou ki nou kapab anmenn devan zot avan lannen fini nou bann lezot seri lamannman pou *Licences Act*. Mersi.

MR SPEAKER

Mersi Minis. Bon avek repons Minis, nou ava envit bann Manm pou vot lo *general merit Bill* pou *Second Reading*. Manm ki an faver lev lanmen silvouple? Mersi, Manm ki kont?

Bon lo Mosyon pou *Second Reading Licences (Amendment) Bill, 2024 - 20* Manm in vot pour, 0 kont, 10

in *abstain*. *Bill* in aprouve par Lasanble lo *Second Reading*.

Mon remarke ki i annan zis enn seksyon ladan ki amannman. Mon realize poudir letan pase, *sorry* mon pe Madanm Deputy Clerk pe sinyal mon *Second Reading* silvouple Madanm Deputy Clerk.

MADAM DEPUTY CLERK

Mersi Mr Speaker. *A Bill for an Act to amend the Licences Act Cap 113*. Mersi.

MR SPEAKER

Wi, avek konprenezon bann Manm, mon krwar mon pou prolonz lo sa *Bill* pou nou sey pran sa lamannman pou nou servi nou letan byen.

Nou ava pas dan Staz Komite pou konsider lamannman silvouple.

(Off-Mic)

MR SPEAKER

Well, si ou annan en kestyon Minis i ava reponn sa kestyon e nou ava *move on*. I kler ki nou gat en kantite letan lo diskite bann pwen ki pa ki amannman ki pa'n ganny met pa'n ganny avanse.

So nou ava pran kestyon Minis i a reponn, nou ava prosede avek bann lamannman.

Lo kote *Bills Committee* i annan enn ki pou diriz nou. Onorab Naidoo.

HON SATHYA NAIDU

Mersi Mr Chair. Lamannman ki devan nou, nou konmans avek *clause 3 (d)* kot nou pe *delete "s" lo "definitions"* pou lir "*definition*" dan plas "*definitions.*" Apre nou pe *insert under clause 3(c) by inserting "after the definition of Minister so inserted the following definition"* apre "*after which you have the provision with regards to provisional licence means provisional licence issued in terms of section 22A.*

So se sa de lamannman ki nou annan pou *panel* konsidere. Mersi.

MR SPEAKER

Mersi. *Panel* napa okenn komanter lo sa bann lamannman? *Accepted.*

MINISTER DEVIKA VIDOT

Yes, Mr Speaker.

MR SPEAKER

Byen. *Ok* ou annan en kestyon Onorab Pillay, wi?

HON SEBASTIEN PILLAY

Mersi Mr Speaker. Mon annan en kestyon, apre mon annan en lobzervasyon.

Mon pou demann mon kestyon anba seksyon 28 ou'n

fer provizyon pou ki i annan *where* ler en zofisye *Licensing* oubyen zofisye lapolis i annan rezon pou krwar i annan en lofans ki pe ganny komet *ok*, anba bann regilasyon. Sa zofisye lapolis i pou *serve* sa dimoun en *notice in writing in such form* i pou ganny *prescribed.*

Mon vwar sa en pe drol ki en zofisye lapolis pou *serve* en *notice in writing.* Pou mwan mon espekte poudir en zofisye lapolis pou pran en aksyon *because* ou'n fini *serve the notice in writing and then* zofisye lapolis pe reakte.

Now mon konpran *the clause is worded this way because you this is this dealing with provisional licences only or tou bann licence? Ok?*

E dezyenmman...

MR SPEAKER

Wi, ale demann tou lede.

HON SEBASTIEN PILLAY

Mon'n ganny drwa fer Mr Speaker?

MR SPEAKER

Wi, kontinyen, kontinyen.

HON SEBASTIEN PILLAY

Mersi. Akoz mon ti krwar mon pe gat letan ler mon pe fer. (Be non ou ki'n dir.)

Mr Speaker, mon dezyenm kestyon i konsern lefe ki Minis i pou preskri anba

regilasyon, apard lezot keksoz lafason sa *fixed penalty* pou ganny peye. Mon ti a kontan Minis i klarifye *what exactly* i pe sey dir *by* lafason ki sa *fixed* penalti pou ganny peye.

Eski nou pe dir poudir en *fixed* penalti pou ganny peye *partly*, i pou ganny peye an antye? *This creates an element of doubt* pou mwan.

Eski *the manner* i mean kote i pou al pey sa *fixed penalty* ki landrwa? *This is what I would like to clarify.*

Akoz nou pe koz en *provisional licence* pou bann biznes ki napa en *licence*.

Savedir demen bann biznes ki napa en *licence* ki pe fer en aktivite, en dimoun ki pe fer en biznes *activity, Licensing* i enpoz son *licence* lo li menm si mwan mon pa dakor pou enpoze Lalwa pou pase. I bezwen konnen kote si i fer en lofans ki mannyer pou ganny *deal* avek.

MR SPEAKER

Tre byen. Minis, reponn silvouple, mersi. Minis?

MINISTER DEVIKA VIDOT

Mersi Mr Speaker. *Ok, so lo authorized officer* ouswa *police officer*. *Ok* zis pou eksplike, dan bokou lenstans lapolis i siport *Seychelles Licensing Authority* dan son travay. E sa i aplik sirtou pandan *weekend* letan bann zofisyé *Licensing*

Authority i pa neseserman *on duty*.

Se pou sa rezon ki nou'n met sa provizyon ladan, parske konman en zofisyé lapolis i en zofisyé ki fer sir poudir Lalwa pe ganny respekte e alor sa i donn li sa posibilite. I donn *the police officer* sa Lalwa i donn sa posibilite.

The manner in which peyman pou ganny fer e sa pe dir poudir Minis i kapab spesifye li atraver regilasyon, sa i zis pou konman pou klarifye lafason ki bann *fixed penalties* pou ganny peye.

Menm parey ki letan Lapolis i donn en *fixed penalty* en dimoun ki pa'n met *seat belt* e alor regilasyon i dir li poudir sepa ou annan kantite zour pou ou al pey ou penalti kot Lakour, eksetera.

So sa i bann keksoz ki pou ganny mete dan regilasyon. Mersi.

MR SPEAKER

Lot pwen Onorab Pillay?

HON SEBASTIEN PILLAY

Mersi Mr Speaker. *So going back to your first point* ki mon le ganny kler, basically ou pe dir mon par egzantp met on mon pe lwe *surfboard* lo lans *ok*. Mon pe lwe *surfboard* lo lans e mon napa en *provisional licence* pou mwan fer. *Which*

means mon pe fer lofans teknikman, right?

So mon pe fer en lofans ou pe dir mon en zofisye lapolis pou vini pou donn mwan en *fixed penalty* ki mon pe fer en biznes san en *licence is that both you saying to en dimoun la deor?* Mersi.

MR SPEAKER

Ok. Minis, nou a terminen lo sa silvouple.

MINISTER DEVIKA VIDOT

Mersi Mr Speaker. Zis pou klarifye Onorab, sa *fixed penalty* i pa aplik zis pou *provisional licence*. I aplik si i annan en *breach of kondisyon licence*.

So par egzantp si ou annan ou en antite ki *already* i annan en *licence* i annan en kondisyon par deryer. Par egzantp en diskotek, i pa sipoze pe admet zanfan dimoun anba 18 an e i annan en zofisye lapolis ki apersevwar i annan li sa posibilite pou li kapab donn en *fixed penalty*.

En lot legzanp par egzantp bann laboutik. i annan zot kondisyon *licence* ki dir zot bezwen annan en *electronic cash registered*. Si en zofisye i apersevwar ki sa laboutik napa - pa pe servi *then* i pou kapab ganny en *fixed penalty*. Se sa ki sa provizyon pe fer. Mersi.

MR SPEAKER

Mersi. Nou'n terminen ek sa pwen. Onorab Pillay si ou annan en lot pwen, ou kapab demann en kestyon.

HON SEBASTIEN PILLAY

Mersi Mr Speaker. Anba *part 3 Lalwa Licences* ozordi seksyon 20 i dir "*notwithstanding anything under this Act currently.*" E zot in amann sa part kot ou'n dir, "*no person shall engage in or carry any activity, profession trade of business specified in the schedule.*" Ok?

Now schedule it means ki bann biznes ki deza preski en *licence* pou li. *However,* bann biznes ki ou pa preskri en *licence* pou li *then they will get a provisional licence. They are not prescribed in the schedule.*

So ler Lalwa pou pase, *how long* eski bann dimoun ki napa en *licence currently* pou annan, ki zot pou bezwen *become licensable?* You see *because your argument* ou pe dir mwan poudir, *as per the schedule* tou sa bann *licences* i la. Be en *provisional licence* *it must apply to something which is not in the schedule,* akoz ou napa en dokiman. *The regulations are not there yet for that.*

So *how long* ki sa bann dimoun pou annan? Eski *until the regulation or eski?* Lalwa pou vin an fors ler Prezidan i

assent. Eski Prezidan pou *withhold assent* pou permet zot *regulate* sa bann aktivite?

MR SPEAKER

Permet Minis reponn.

MINISTER DEVIKA VIDOT

Mersi Mr Speaker. Onorab le moman ki sa dimoun i ganny li sa *provisional licence* i fini annan li son *licence*.

Lalwa i fer provizyon ki Minis i kapab *amend schedule*. E se sa ki se sa fason kot nou pou kapab *capture* bann aktivite ki an se moman i pa pe *feature* dan *schedule*.

MR SPEAKER

Thank you. Onorab Andre.

HON CLIFFORD ANDRE

Mersi Mr Chair. Mr Chair, mon ti anv i zis kekfw *seek* klarifikasyon avek Minis, an referans avek sa premye pwen ki Onorab Pillay in fer resorti, sa Lotorite avek sa lapolis.

Lotorite avek Lapolis, letan i pou donn sa notis, i pou en notis ki'n ganny preskri anba regilasyon ki ou, ou pou fer konman Minis, pa neserman ou, me selman en Minis si en lot Minis si i kapab fer sa.

So zis pou nou ganny li kler ki i pou anba sa *prescribed* notis ki pou'n ganny fer, ki sa notis pou ganny donner avek sa

defaulter in that regards.
Mersi.

MR SPEAKER

Minis, ou repons?

MINISTER DEVIKA VIDOT

Mr Speaker, mon konfirm sa ki Onorab in dir, wi. Lafason ki notis pou ganny *prescribed* sa i pou ganny reflekte dan regilasyon.

E lafason ki peyman konsern ki Onorab Lopoziyon in fer resorti, sa osi pou ganny mete dan regilasyon. Mersi.

MR SPEAKER

Thank you. Onorab Georges?

HON BERNARD GEORGES

Mersi Mr Chair. Mr Chair, mon ti pe lev en *point of order* lo sa ki Onorab Pillay *Leader* Lopoziyon ti pe fer. E sa se anba *Order 73*.

Mr Speaker, anba *Order 73* ler nou dan Komite Lasanble, en Manm i kapab *move* en lamannman. I pa kapab servi sa konman en *Question Time* parey Onorab Pillay in fer bomaten.

In pas 20 minit pe koz lo tou e nanryen ditou, olye adres sa bann pwen e demann Minis pou reponn dan son *reply*.

Prezan i pe akoz i kontan koze sel keksoz ki i pe fer se gat letan Lasanble dan en deba apre vin demann kestyon

apre. Mersi. Sa bann keksoz pa devret arive.

MR SPEAKER

Mersi. Dan mon konesans Staz Komite in ganny servi pour eklersi bann pwen. Alor nou eklersi bann pwen; tou senpleman! Sa ki pa akseptab pou mwan se ki i annan en deba lo bann pwen kot en lamannman pa'n ganny anmennen.

So ou demann en kestyon Minis i eklersi e nou terminen.

Bon, eski i annan okenn lot pwen? Ou annan en lot pwen Onorab Pillay? Lo kwa?

HON SEBASTIEN PILLAY

Mersi Mr Speaker. Mr Speaker, parey ou vwar mon pa pe fer deba ek Minis. Minis pe reponn mwan. Mon pe demann sa bann kestyon pou benefis bann dimoun ki la deor. Dayer zot dir Lasanble, mersi kot mersi pou zot.

Minis in dir ki i pou preskrir sa bann penalti. Mon ti ava kontan ganny en klarifikasyon avek *panel*, si zot pe dir ek nou koumsa poudir sa bann regilasyon *regarding* bann preskripsyon bann *fixed penalty* pe vin ansanm avek Lalwa e pe prepare la pou lemoman?

Oubyen i pou annan en dele letan *within which they will be applied*. E ki pou

annan en peryod lesplikasyon avek bann dimoun Mr Speaker.

E atraver ou Mr Speaker, mon pa bezwen demann Onorab Georges...

(comments off-mic)

MR SPEAKER

Ok, order! Order! Minis, eski ou annan en en repons pou sa dernyen kestyon?

MINISTER DEVIKA VIDOT

Mersi Mr Speaker. Pou klarifye ankor enn fwa, sa ki pou ganny preskrir dan regilasyon i lafason ki sa notis pou ganny met an ekrir. E lafason ki peyman pou ganny fer pou pou sa *fixed penalty*. E byensir bann lezot keksoz.

Fixed penalty pou kapab ganny aplike lo okenn *breach the kondisyon licence*. Mersi.

MR SPEAKER

Mersi Minis pou sa leklersisman. Bon, nou'n terminen avek bann lamannman e klarifikasyon. Nou a pas dan Staz Lasanble. E nou ava ganny Mosyon pou *Third Reading* silvouple. Onorab Arissol Sandy.

HON SANDY ARISSOL

Mersi Mr Speaker. Bonn apre midi ankor enn fwa. Mr Speaker, anba *Order 76 (1)* mon oule *move* ki *Bill Licences*

(Amendment) Bill, 2024 as amended i ganny lir en Trwazyenm Fwa. Mersi.

MR SPEAKER

Mersi. Manm i ava vot. *Sorry* mon a pran segonnman lo Mosyon silvouple Onorab Esparon.

HON REGINA ESPARON

Mersi Mr Speaker. Mon siport Mosyon pou ki *Licences (Amendment) Bill, 2024 as amended* i ganny lir en Trwazyenm Fwa. Mersi.

MR SPEAKER

Mersi. Manm ki an faver lev lanmen silvouple? Manm ki kont? Lo Mosyon pou *Third Reading Licences (Amendment) Bill, 2024 as amended*. 19 Manm in vot pour, 0 kont, e 10 in *abstain*. Sa *Bill* in aprouve par Lasanble e Madanm Clerk i a fer *Formal Third Reading*. Madam Deputy Clerk.

MADAM DEPUTY CLERK

Mersi Mr Speaker. *This act may be cited as the Licences (Amendment) Act, 2024*. Mersi.

MR SPEAKER

Mersi bon nou'n terminen avek sa *item*. Mon remersye Minis ek son bann zofisye e mon swet zot bonn kontinyasyon.

Lasanble i a pran poz nou a rebran 2 er edmi pou

kontinyasyon lo nou *Order Paper*. E *Assembly Business Committee* i ava *meet* parey labitid e nou ava fer li 1:30. Mersi.

(BREAK)

MR SPEAKER

Bonn apre midi tou dimoun, Manm Onorab, zofisye e nou osi nou piblik.

Nou a rebran lo nou *Order Paper* e nou annan en Mosyon dan non Onorab Desheila Bastienne. Madanm Clerk i dir mwan nou annan en *Revised Order Paper* devan nou. E i enkli en *First Reading Public Bill*. Madanm Clerk?

MADAM CLERK

Mersi Mr Speaker. *This Act may be cited as the Compounding of Prescribed Offenses Act, 2024*. Mersi Mr Speaker.

MR SPEAKER

Mersi Madanm Clerk. Bon, nou ava kapab prezan prosede lo Mosyon dan non Onorab Desheila Bastienne. Onorab, ou ava soumet ou Mosyon premye pou ganny segonde.

HON DESHEILA BASTIENNE

Mersi Mr Speaker. Bonn apre midi Mr Speaker. Bonn apre midi tou serk Onorab, e bonn

apre midi tou dimoun a lekout.

Mr Speaker, mersi pou raport sa privez pou mwan prezant mon premye Mosyon pou sa lannen 2024.

Mosyon i al koumsa;

Prenon kont lenportans Lendistri Tourizm dan lekonomi Sesel, Lasanble i ankouraz Minister Tourizm pou kontinyen avek son program *Cultural Tourism* e devlop li plis ankor e demann tou Seselwa pou vin pli aktiv e inovativ dan sa sekter, ki i annan gran potansyel pou anmenn benefis endividyel e pou nou pei an antye.

MR SPEAKER

Mersi Onorab. Nou a ganny segonnman pour Mosyon. Onorab Georges Romain.

HON GEORGES ROMAIN

Mersi Mr Speaker. Mr Speaker, mon segonn Mosyon. Mersi.

MR SPEAKER

Mersi. Onorab, ou kapab adres lo ou Mosyon prezan.

HON DESHEILA BASTIENNE

Mersi ankor enn fwa Mr Speaker. Mr Speaker, pou nou Seselwa nou toultan pe dir e osi tann diferan Nasyonalite dir ki nou pti leta zil i en pei beni.

Nou dir ki Sesel i en pei beni malgre sanzman klima pe osi annan son lefe lo nou pei. E nou'n fini konmans eksperyans enn de sanzman dan letan li menm, ozordi nou dir mersi Bondye Papa, akoz nou ankor pe ganny eparye kont bokou bann sityasyon ek kalamite pli grav, tel ki siklonn, tranblemandter, tourbiyon, gro lapli ki okazyonn gro lavalas ek inondasyon vremen pwisan.

Mr Speaker, letan nou dir ki wi, nou ankor vremen sanse anba sa zoli lesyel ble, kot nou anbras sa zoli ler soley e nou kontinyelman pe lager pou gard lanatir nou lanvironnman sen dan son zoli kouler ver, sa i laprev inik bote nou pei ki e ki bokou e diferan Nasyonalite i kontinyen montre sa dezir pou vin pas en moman tre agreab e osi inoubliyab dan nou pei.

Mr Speaker, nou pou dakor ki Bondye Tou Pwisan in beni nou avek en zoli pti pei.

E malgre nou annan serten keksoz ki nou kapab prodwir isi dan nou pei, me an rezilta nou klima e osi kapasite prodiksyon alimanter, i fer ki nou oblize enport bokou nou bann prodwir alimanter dan lezot pei.

Alor dan sa bann tel sityasyon, mon pou osi dakor ki sa pti prodiksyon ki nou pe

fer lo nou menm, i pa sifizan pou soutenir nou lekonomi. E se la kot Sekter Tourizm i antre, konman enn parmi bann pilye pli enportan nou lekonomi.

Mr Speaker, mon'n konmans mon lentervansyon dan sa fason, akoz i kler ki touris ozordi pe rod sa ki pli meyer. Valer pou zot larzan kot zot santi zot an sekirite, sirtou dan bann lenstans kot ou pe al vakans an fanmir e osi kot kiltir sa pei i atir zot e i annan dekwa keksoz enteresan pou gard zot okipe.

Mr Speaker, letan nou konpar grander nou pei opred lezot pei tropik, ki zot osi zot pa tro lwen avek nou laspe touristik, sa Mosyon devan nou Lasanble i vin avek sa lentansyon, kot sakenn de nou konman Seselwa, nou osi donn tou pou siport Minister Tourizm dan sa travay nob ki i a pe fer, dan son Lendistri Touris.

Osi pou nou ede pous li o pli profon dan son devlopman, anver *cultural tourism* dan tou son laspe. I a donn son plezir e osi valer sa deplasman, prenon kont i annan serten etranze ki sorti vremen lwen pou vin pas en moman agreab dan nou pti pei e viv sa vre kiltir Kreol.

Mr Speaker, bokou touris i vin Sesel par ler pou en

maksimom 5 zour pou serten zot i pa lakantite zour ki konte.

Me sa prodwir ki zot pou resevwar e sa bon moman ki zot pou pase, ki i ava fer ki sa pti vakans dan nou pei i a satisfere zot sezour ek zot kiryozi lo vre kiltir nou pei Sesel.

Bokou touris apre ki zot in lir ouswa atraver en lot zanmi, kot zot in aprann serten lenformasyon lo nou pei, zot in vwar portre oubyen zot in vwar portre nou bann lans byen blan, nou zoli kouler delo sale, bann diferan kalite laform ros e nou bann zepis lokal, nou bann diferan kalite pwason byen fre; fri lokal ek serten zarden egzotik, i fer ki bokou etranze i reve e ,esper sa zour ki zot kapab vwar sa bann mervay dan son vre leta natirel.

Mr Speaker, pli nou akey touris dan pei pli i bon pou nou lekonomi e alor i tre enportan ki pou sa arive nou tou bezwen annan en rol pou zwe anver nenport sityasyon, ki pou anmenn en rezilta pozitiv dan nou Lendistri Touris a tou moman.

Nou tou nou konnen ki e touris i pa depans larzan pou vin dan en pei zis akoz i anvi en vakans, ouswa senpleman anvi sorti e al rod en serten trankilite lwen avek son fanmir.

Me zot plito anvi eksperyans en keksoz diferan, melanz zot dan en diferan kiltir; ekout en diferan langaz, admir son peizaz, e son bann zabitan e osi dekouver e apresye bann zil ki i pran zot 15 a 45 minit pou arive depandan lo ki zil ki zot in swazir pou al vizite.

Kot lakwizin Kreol i konsernen Mr Speaker, i tre enportan ki viziter i osi apresye sa bon pla Kreol Seselwa avek pasyon, e ki zot osi ganny ankouraze kontinyen deviste lezot plan nou kreolite. E menm fer zot devlop sa dezir pou al fer en vire dan lezot pti restoran Kreol dan sa lespri a leksperyans lezot kalite pla pli bon avek en lot latous Kreol.

Mr Speaker, dan nou pti Kapital Viktorya i manke restoran Kreol. E bokou pti *takeaway* i mank restoran ek bokou pti *takeaway* ki pe pratik pirman lakwizin Kreol.

En restoran Kreol kot touris i kapab asize pa zis manze me osi apresye en pti labwason fer pirman Kreol anmezir ki zot pe tenir en pti konversasyon avek travayer sa letablisman e menm nou bann frer ek ser Seselwa ki zot menm zot, zot la pe montre sa touris ki zot osi zot pe apresye zot prop lakwizin kreol.

Mr Speaker, apard restoran Marie Antoinette

Serret Road St Louis, *Boat House* Beau Vallon, touris i osi kapab apresye en bon manze Kreol kot restoran *Jardin Du Roi*. Anse Royale. E a mon lavi Mr Speaker, mon panse k ii merit annan plis landrwa parey sa 3 landrwa ki monn mansyonnen.

Mr Speaker, ler nou koz kiltir kreol fodre ki nou osi vin pli inovativ dan diferan laspe. I osi enportan ki nou eksplor lezot fason pou atrakte nou bann touris plis, kot i ava fer ki diferan akter i benefisye.

La mon pou mansyonn nou bann artis lokal. Parey mon'n dir ou komansman touris i vin Sesel pou vin pas en moman agreab dan en diferan atmosfer. Alor i toutafe normal ki nou pa donn zot zis valer pou zot larzan, me osi bann zoli souvenir pou zot al avek dan zot pei.

Mr Speaker, lanmizik i en fason egey touris. E diferan bit lanmizik i anmenn bokou lazwa pou diferan dimoun dan diferan fason. .

Letan en *Manager* lotel i vwar ki son kliyan apre en bon repa i pa'n al direk dan son lasanm me i pe anmize avek sa bon lanmizik Kreol, sa i en lot lavantaz pozitiv dan kote sa lotel. Kot sa touris pou depanse ancor lo bar e osi lavantaz lo kote sa mizisyen li menm, kot li osi i kontinyen ganny bann performans. Sa i

fer ki nou lanmizik Kreol i devret toultan dominant dan nou Sekter Tourizm.

Mr Speaker, dan nou pei Sesel nou'n annan bann latroup kiltirel, group kanmtole, group sega Kreol, bann group moutya, abiye dan zot zoli lenz, dan zot zoli resanz kolore pirman Kreol.

E se sa ki devret pe met sa laganm Kreol dan nou bann lotel, dan nou lavil Viktorya e osi dan bann distrik.

Mr Speaker, nou bann zenn osi fodre pa nou bliye, zot osi zot devret pe ganny ankouraze pou vin performen dan bann lotel.

Ozordi dan nou pe Sesel i annan diferan group zenn ki perform ladans modern e ki anglob nou ladans kiltirel osi.

Mon pe demande ki mon pe demande ki bann lotel pa zis espere pou sa bann group ki perform kiltirel vin tap zot laport. Me nou ti a demande ki avek sipor Minister Tourizm, en travay i ganny fer lo kote rod lenformasyon.

E menm envit bann propriyeter bann letablisman touristik dan en *meeting* anba en sel twa avek tou bann group ki performen, dan tou laspe kiltirel Kreol kot zot ava prezant zot lekor, met zot talan ek prodwir ater.

E la bann lotel ava ganny en nide sa kalite talan ki nou annan e zot ava deside

lo kwa ki zot annan pou ofer zot kliyan.

Mr Speaker, dan lepase ti annan bokou sa bann group kiltirel ki ti perform dan bann lotel. Touris ti vreman apresye kot ti menm leve e danse zot osi.

Sa bann performans pa ti zis atrakte touris me bokou Seselwa ti vin dinen an fanmir e apre asize pou regard bann *show* kiltirel. Ou menm annan ki ti vin kot lotel zis pou vin apresye sa *show* li menm.

Mr Speaker, mon'n osi sirprann apre ki monn fer en pti statistik, kot mon'n dekouver ki laplipar lotel ozordi pa pe fer okenn spektak kiltirel.

Dan 10 lotel kot mon'n pran lenformasyon, zis de ki i annan zis de ki i annan en *band* Kreol ki perform, enn fwa par semenn e dan sa de lotel, enn i lo Mahe lotel *Coral Strand*, e enn lo Praslin *Le Duc De Praslin*.

Alor mon dir felisitasyon sa de propriyeter lotel pou omwen annan en pti spektak Kreol pou egey zot kliyan.

Mr Speaker, dan nou Kapital Viktorya, i osi enportan ki en kolaborasyon ant Minister pou Touris ek Lofis Mer Lavil, i annan divers aktivite pirman kiltirel pou kontinyen atir bann touris.

Bokou bann travayer dan bann lotel i dir i ki touris i

demande ki i annan dan Viktorya konman aktivite Kreol? Apard ki bann batiman istorik, legliz en pti vizit dan Zarden Botanik, pou lemoman nou ankor manke sa pti latous tipikman Kreol dan nou Viktorya.

Mr Speaker, alor pou tou touris ki'n vin Sesel, kot zot in tre byen pase e pou fer zot osi ede al vann nou zoli pei ler zot retourn kot zot e al vann nou pei Sesel pou son bon repitasyon, ankouraz zot zanmi e zot fanmir pou vin apresye nou bann mervey e ki zot menm zot ava osi annan sa lanvi pou retourn ankor.

Mr Speaker, atraver sa Mosyon, dan sa lespri sipor nou Lendistri Touris e fer nou kiltir *tourism* kontinyen fleri e vin pli meyer, mon pou demann mon bann koleg Onorab *MNA* pou donn mon zot sipor anver sa Mosyon. Mersi.

MR SPEAKER

Mersi Onorab. Onorab Georges Romain ou annan laparol.

HON GEORGES ROMAIN

Mersi Mr Speaker. Bonn apre midi tou koleg Onorab e tou dimoun a lekout.

Mr Speaker, sa Mosyon devan nou i enn ki enportan akoz touris i en pilye nou lekonomi. Premyerman mon ti

ava kontan felisit nou Minis Radegonde ek son tim pou sa travay formidab, ki zot pe fer pou ede ki sa lendistri i kontinyen fer byen.

E osi tou Seselwa ki pe kontinyen donn sa sipor pozitiv dan sa sekter, la ki nou vwar ki lakantite touris ki pe antre dan nou pei pe kontinyen ogmante pandan sa dernyen 3 an.

E larzan ki sa sekter i kontribye dan nou lekonomi i osi pe ogmante signifkaman. Alor sa Mosyon i enn ki enportan, akoz i pe rod fason pou nou sofgard en sekter ki ganny konsidere konman en sekter kle nou lekonomi.

E nou leritaz kiltirel, i definitivman devret ganny servi pou pli byen atir bann viziter ki vin Sesel. Agrandi zot konesans lo en destinasyon ki zot pe vizite e promouvwar sa konseps lokalman, koumsa nou bann Seselwa dan sa sekter ava kapab benefisy e ekonomikman.

Mr Speaker, wi nou konnen ki viziter i vin Sesel akoz labote nou pei. Pou nou lans, nou lanmer, nou trankilite, e nou stabilite. Me i osi enportan pou nou al pli lwen, akoz konmela touris i rod plis valer pou son larzan ki i depans.

E pou en touris i pou pli byen apresye konn en pe plis

lo listwar nou pei, nou fason viv, nou kiltir, nou lanvironnman si sa bann keksoz i kapab enkli dan sa *package* ki nou ofer zot, sa i pou ogmant valer e anrиси sa servis ki nou pe ofer. E fer nou vin pli konpetitiv dan marse touris.

Annou pa bliye ki bokou lezot pti leta zil parey Sesel pe deza ofer sa bann servis, e alor i pa bann keksoz nouvo e nou bezwen fer sir ki nou pa ganny kit deryer.

Mr Speaker, premyerman mon krwar ki partaz listwar nou leritaz i enn bann keksoz ki nou kapab pli byen ofer nou touris. Sak pei i inik e i annan son prop listwar.

I annan son tradisyon e kotim spesifik, son langaz, son lanmizik, son ladans, son bann sit istorik e tousala i groupe pou form parti nou leritaz kiltirel.

Isi Sesel nou annan plizyer sit leritaz. E menm bann ki'n ganny rekonnet o nivo mondyal parey *Atoll Aldabra*, *Vallée De Mai Praslin*. Me i osi annan lezot sit ki senboliz nou listwar parey simityer Bel Air. *Mission Lodge*, nou Lorloz, nou bann *trails*, nou Zarden Botanik, Jardin du Roi, Linyon *Estate La Digue* ek lezot.

Mr Speaker, eski nou kapab dir ki nou pe *maximize*

sa bann resours ek nou bann touris pou fer zot depans plis pandan se zour Isi Sesel?

Sa i bann loportinite ki nou bann zenn i kapab servi pou aprann nou listwar e partaz li dan en fason inovativ. E an retour ganny en reveni pou zot.

Mr Speaker, dezyenmman, bokou bann pti leta zil i servi bann levennman tel parey en festival pou atir touris dan bann letan spesifik. Annou get *Jamaica* par egzanp, kot zot annan levennman anyel ki apel *Reggae Festival*, kot bann artis lokal i performan akote bann lezot artis enternasyonal.

Sa i en levennman ki atir bokou viziter pou sa zil. *St Lucia* i en lot legzanp kot zot annan e festival *jazz* ki fer tou le lannen k i promouvwar lanmizik *jazz* e sa osi i en latraksyon ki ganny bokou latansyon enternasyonal.

Grenada Mr Speaker, zot annan en festival ki demontre bann zepis Nasyonal e sa zot fer li atraver karnaval, lanmizik e diferan kouler *costume* pou demontre sa bann kouler plis.

Mr Speaker, menm dan larezyon nou vwar *Maldives* par egzanp ki i annan en festival lo konservasyon bann *whale sharks* ki enkli bann aktivite edikasyonnel e ki zot ganny

bokou partisipasyon ki ganny rekonnèt o nivo Mondyal.

Isi Sesel Mr Speaker, nou annan nou Festival Kreol e osi *Carnival de Victoria* ki nou'n deza fer dan lepase. Ki petet nou kapab relans zot avek en lanplèr enternasyonal, ki kapab vin lo en kalandriye anyel ki touris ava kapab planifye e partisipe.

Mr Speaker, en trwazyenm laspe ki merit ganny garde se ledikasyon kiltirel.

E enn bann pei ki pe fer sa byen se *Maldivè*. Zot deza annan bann Lanbasad atrakte avek touris pou promouvwar zot listwar ladans eksetera.

Zot menm al pli lwen. Pou ofer bann pti *workshop* lo ki manner pou servi fey koko pou fer sak sapo ek lezot.

E osi bann pti kou pou aprann zot langaz. E sa i fer se zour en touris vin pli enteresan e pli satisfèzanm anvè ki in kapab partisipe e enterakte avek lakominote.

E en lot laspe ki ti kapab ganny promouvwar, se nou lakwizin Kreol lo en pli gro lanplèr.

Nou get Moris kot zot in pozisyonn zot ozordi koman en destinasyon ki promouvwar divers kwizin, tel ki Endyen, Sinwan, Kreol ek Franse.

Zot organiz bann *tour* lo manze fer bann laklas kwi

manze ki met lanfaz lo manze tradisyonnèl.

E zot menm sipòrt bann pti restoran ek letablisman pou pli byen promouvwar bann pla dan zot pei. En keksoz ki Sesel osi i kapab fer lo en pli gran lanplèr.

Mr Speaker, an vi ki konnen ki touris i pas bokou zot letan lo lans, la ti pou en bon loportinite pou bann operater anmenn lakwizin Kreol pli pre avek sa bann touris.

Kekfwa i ti ava annan en fasilite ki ava ganny demarke kot nou ti ava kapab vwar en group zenn Seselwa pe prepar sa bon manze Kreol parey nou'n vwar ki ganny ofer Anse Major Bel Ombre kot mon'n ganny sans personnelman pou gout en bon manze Kreol ki ti senp me tre goute. San bliy sa bon servis Mr Speaker.

E bann tel keksoz senp ki touris pou apresye. Mr Speaker, mon konnen ki lo kote bann prodwir artizanal Sesel in fer bokou. Me in toultan annan lespas pou nou azout lezot keksoz kot nou bann artis lokal ava ganny en pli gran platform pou promot nou bann prodwir lokal.

Mr Speaker, litalizasyon platform nimerik pe vin plizanpli komen. Ti ava byen pou nou servis sa bann *digital platform* pou kree bann galeri *online* ki ava donn plis

vizibilite nou bann prodwir lokal, donn vizibilite sa bann artizan zot menm e met zot prodwir lo en marse enternasyonal.

Ler en touris i vin Sesel i a deza konnen ki prodwir ki i anvi akoz in vwar sa prodwir *online*. E i ava annan opsyon pou li vin direktman kot sa latelye oubyen menm fer son *order online*. Tousala i a vin bann fason pou nou al pli devan. Fer touris depanse e kree plis lanplwa dan sa sekter.

Mr Speaker, annou pa bliye ki bokou nou bann mizisyen i ganny zot lavi atraver Lendistri Touris. La nou pe fer referans lo bann ki al zwe lanmizik dan bann Letablisman Touristik.

Nou konnen ki i annan loportinite pou zot deza me nou ti ava kontinyen ankouraz spesyalman bann gran letablisman po donn plis loportinite nou bann mizisyen Seselwa pou demontre nou lanmizik e fer sa touris pi byen konpran nou kiltir ek nou ladans.

E la mon lans en lapel avek kominote mizisyen osi pou al an ver sa bann letablisman e ofer zot servis avek en o standar ki osi anliny avek kalite standar ki sa letablisman pe ofer..

Mr Speaker, en tel Mosyon i pa kapab depans zis

logo Gouvernman. Me i demann tou bann akter kle pou zwe zot rol pou promouvwar Sesel konman en destinasyon. Sesel i nou pei e nou reveni prensipal i depan lo touris.

Alor nou merit rod tou fason pou fer Sesel vin sa destinasyon ki pa zis ofer son lans ek lanmer me annou vin pli inovativ. Annou diversifye e anrisi e ofer pou nou kapab atir plis touris. E osi kree plis lanplwa ek larises dan sa sekter.

Touris ozordi i annan bokou swa pou li swazir kote i pou le al pas son vakans. E nou Sesel fodre nou reste konnekte avek sa lendistri e rod fason pou nou toultan atir sa touris dan nou pei.

Mr Speaker, en tel Mosyon parey i pou ganny mon sipor. E mon espere ki osi i ava ganny sipor ou lezot Manm. Mersi Mr Speaker.

(APPLAUSE)

MR SPEAKER

Mersi Onorab. Mon ava pas laparol avek Onorab Philip Arissol.

HON PHILIP ARISSOL

Mersi Mr Speaker. Bonn apre midi Mr Speaker, tou koleg Onorab e tou dimoun ki pe swiv nou.

Mr Speaker i en plezir pou mon ozordi avek konviksyon profon, pou aport mon sipor Mosyon ki Onorab Bastienne in anmennen.

Mr Speaker, sa Mosyon i met lanfaz lo rol rol vital Lendistri Touris fabrikasyon ekonomik Sesel. Letan ki nou rasanble dan Lasanble, i enportan pou rekonnet profonman lenpak touris ek prosperite, byennet sosyal e idantite kiltirel nou Nasyon.

Mr Speaker, Sekter Touris i depi lontan enn bann pilye krwasans ki ekonomikman Sesel. E servi konman en sours enportan pou reveni laglwar e loportinite pou nou pep.

An plis ki son sinifikasyon ekonomik, touris i zwen en rol fondamantal dan prezervasyon e promouvwar nou leritaz kiltirel ris, ankouraz konpreansyon enter kiltirel e demontre labote natirel ki defini nou larsipel.

Dan sa konteks mon osi mon pe lans sa lapel Minister Tourizm pa non selman soutenir me osi agrandir program *cultural tourism*.

sa linisyativ i prezant parey en lanrisman kiltirel i ofer viziter en apersi lo divers tradisyon koutim tradisyon e form lar ki defini fason viv Seselwa.

Ler nou devlop plis sa program, nou kapab kree

nouvo loportinite pou li sanz kiltirel stimil lantreprenarya lokal e ranforsi krwasans dirab nou Lendistri Touris.

An plis ki sa, mon demann tou Seselwa pou anbras en lespri inovasyon e partisipasyon aktiv dan Sekter Touris. Sakenn de nou nou annan en rol inik pou zwe dan formasyon e devlopman talan pou ofer touris; ki swa atraver lanmizik artizanal plezir gastronomik, performans tradisyonnal ouswa pratik ekolojik.

An itilizan nou kreativite kolektiv e nou lespri lantreprenarya, nou kapab tous Sesel lo en lasenn Mondyal konman enn bann premye destinasyon pou langazman kiltirel ek leksperyans touris.

Louvertir resan lotel *Canopy* Anse La Mouche Anse Boileau e bokou bann pti *guest house* reprezant bokou bann pti loportinite eksitan pou nou distrik, pou nou demontre larises son larises e diversite atraver bann diferan form lar.

Sa bann letablisman, i kapab servi konman en sant pou resanz kiltirel, pou ofer platform pou artis lokal, artizan partaz zot talan e avek lemonn.

Konman reprezantan Lepep Seselwa, i nou devwar pou defann linisyativ ki non

selman benefisye endividi me osi fer avanse lentere kolektiv nou Nasyon.

An aportan nou solid deryer devlopman *cultural tourism*, nou pe sinyal nou langazman pou nouri en Sekter Touris vibran, enklisiv e fleksib, ki servi konman en katalis pou progres sosyoekonomik e lafyerte Nasyonal.

Mr Speaker, *cultural tourism* i ofer plizyer lavantaz pou Sesel e tou Seselwa. E kontribye dan devlopman lekonomi e prezervasyon kiltirel Nasyonal. Tel ki diversifye aktivite touris dan Sesel; atir en seri viziter ki enterese dan leksperyans kiltirel otantik.

Sa diversite i ava ede ogmant larive touris i ava osi prolonz dirasyon zot sezour e ogmant reveni ki zot anmenn, alor kontribye dan krwasans ekonomik an zeneral dan pei.

Mr Speaker, *cultural tourism* i kree loportinite lanplwa pou Seselwa atraver plizyer sekter. Letan nou partisip dan *cultural tourism*, dimoun i kapab devlop nouvo *skills* pou ganny en reveni e kontribye dan krwasans ekonomik lokal; par montre pratik tradisyonnel tel ki lar, artizanal lanmizik ladans e lakwizin a bann viziter.

Seselwa i kapab pran lafyerte dan zot leritaz

transmet bann tradisyon kiltirel avek bann zenerasyon fitir e asir prezervasyon nou lidantite.

Kominote lokal i kapab sezi loportinite, pou partisip aktivman dan aktivite touristik e benefisye. Ler nou enplik kominote *cultural tourism* tel ki lanmizik, vizit kiltirel e bazar artizanal. Rezidan i kapab partaz tradisyon zener reveni e ankouraz en sans lafyerte e santiman partenans dan leritaz kiltirel.

Mr Speaker, *cultural tourism* i ankouraz pratik dirab ki respekte lanvironnman kiltir ek kominote lokal ler Sesel i met lo lenportans konservasyon touris pou responsab e lot antite kiltirel, Sesel i kapab protez son resours natirel, siport artizan ek biznes lokal e ankouraz en sans pou zer lanvironnman parmi viziter e osi rezidan.

I en fason ki ede fasilite lesanz kiltirel e dyalog ant viziter e zabitan da lokalite ankouraz konpreansyon mityel, respe e apresyasyon pou diferan kiltir, par angaz bann touris avek diferan lorizin, Seselwa i kapab montre en tradisyon kiltirel aprann avek lezot e promouvwar dyalog enterkiltirel ki anrиси tou bann

viziter e bann ki pe akey zot osi.

Mr Speaker, pou konklir mon lans en lapel avek tou koleg Onorab pou ini e donn sipor sa Mosyon, pou re afirm nou devouman pou fer avanse Lendistri Touris dan Sesel. Annou debout ansanm dan solidarite, pou promouvwar *cultural tourism* pou konstri en lavenir ki pli briyan pou nou pei e pou nou sitwayen. Mersi Mr Speaker.

MR SPEAKER

(Off-Mic)

HON MICHEL ROUCOU

Mersi Mr Speaker. Bonn apre midi a tous. Mr Speaker, i annan plezir pou mon osi parey bann lezot Manm pou partisip lo sa Mosyon anmennen par Onorab Desheila Bastienne lo *cultural tourism*.

Mr Speaker, mon pou pran en lot lapros lo mon deliberasyon aköz mon anvi eksplor en pti pe bann loportinite ki bann distrik i annan pou *cultural tourism*.

Mr Speaker, mon'n ganny sans pou mon annan sa leksperyans ki savedir *cultural tourism* li menm li. Mon ti annan en zanmi malerezman in kit nou en pe letan pase Mr Terence Belle, ki i ti en *tour guide*. E mon'n ganny sans pou mon zwenn li a plizyer fwa

dan bann dan son parkour ki in fer avek son kliyan, sorti dan diferan pei.

Kot la nou'n vizit plizyer *trail* kot la monn kapab fer zanmi avek plizyer bann larestan plizyer bann touris, sorti dan plizyer pei e partisip avek zot dan enn de aktivite ki montre zot nou kiltir Sesel.

Mr Speaker, ansanm avek mon fanmir en moman letan ler nou ti dan sa parkour ansanm avek mon zanmi Mr Belle, nou ti ganny sans pou nou envit bann fanmir touris kot nou lakour montre zot bann kiltir parey ki mannyer nou kwi nou bann pla Kreol, ki mannyer i ganny prepare li menm li. E sa in montre ou en pti pe ki mannyer sa kiltir e ki mannyer bann larestan lemonn i kapab apresye nou fason ki nou Seselwa nou viv.

Bann pla ki nou'n montre zot ki mannyer pou triy bred, fer ladob, fer pwason griye li menm li. E ki zot in vremen apresye. Pou zot ti en gran keksoz sa.

E ler mon pe koz lo la Mr Speaker, mwan osi anvi met sa lanfaz parey Onorab Bastienne in dir pou ankouraz Minister Touris ki mannyer nou pou anmenn plis sa *cultural tourism* pou edik nou pep aköz i annan plis sa lanfaz.

Mr Speaker, zis mon ava met en keksoz devan, bann

premye zabitan ki ti ariv isi Sesel ti debark lo zil Ste Anne le 17 Out 1770. Ste Anne i enn bann zil ki tonm dan distrik Mont Fleuri li menm li.

E zis mazine *the cultural tourism* atraver nou kiltir li menm li, nou listwar, ler nou pe anmenn bann touris dan sa bann landrwa kot tou keksoz ti konmanse, donn zot en pti pe nou listwar e lekel bann dimoun ki sa letan ki ler zot ti premye bann premye konmanse isi Sesel.

E osi Mr Speaker, ler ou marse en pti pe dan sak distrik li menm li, ler nou pe koz lo bann lenfrastriktir ki ozordi in ganny modernize, ki in kit sa koutim dan lepase li menm li.

Zis parey an montan Mont Fleuri ler ou pou pase apre ki ou'n kit bilding kot dokter Jivan, ou kapab vwar bann zoli lenfrastriktir kot lafanmir Pothin ki la i montre poudir lontan ki mannyer nou bann lakour ti ete li menm li Mr Speaker.

E an menm tan Mr Speaker, ler ou anmenn li menm li sa *cultural tourism*, ozordi ler ou pase dan distrik ou vwar sa bann touris li menm li zot pe marse dan bann distrik.

Akoz touris zot nepli reste zis dan lotel zot marse zot zwenn piblik zot menm li, kot la zot kapab vwar lafason ki nou, nou koutim ki

mannyer Seselwa li menm li i viv. Ki bann gro manze ki nou menm nou nou konsonmen - parey mon mazin nou friyapen nou mayok ki zot kapab vwar.

E si Seselwa i pran sa byen an menm partisip plis ankor Mr Speaker, ki touris i ava kapab vwar en pti pe sa *enjoy* sa lanatir li menm li.

Mr Speaker, e ler ou pe get parey monn dir plizyer dan bann distrik e nou, nou annan en listwar ki mon osi monn vremen apresye pou mon konnen dan mon pe koz avek Mr Govinden, in eksplik mwan i dir ek mon koumsa poudir Basen Larme Mr Speaker, dan lepase i ti en basen ki bann letan avan, dan letan Angle kot bann bato ti kapab gannyen pou vin pran delo. Akoz ti annan bann gran drenaz ki ti desann ziska bor lanmer.

E sa tousala nou kapab anmennen dan plas ler touris i vini zot annan bokou keksoz ankor pou zot kapab *enjoy* dan nou distrik dan nou pei li menm li, kot zot kapab zot osi partisipe *enjoy* sa labote.

Akoz ozordi Mr Speaker ki ou vwar? Ou vwar ki lotel ozordi i pa zis o bor lans, lotel i en pti pe partou dan montanny li menm li Mr Speaker. Kot bann dimoun I kapab *enjoy* sa ler fre ki nou Sesel nou annan, sa lanatir ki

nou'n ganny beni avek, parey Onorab Bastienne in dir.

E ler nou pe koz en pti pe Mr Speaker, mon krwar poudir ki nou bezwen annan plis travay ankor ki ganny fer pou nou kapab idantifye, idantifye en pti pe bann moniman ki nou annan en pti pe partou lo Mahe, bann keksoz ki'n la pou bokou letan.

Kot menm nou'n kapab edik nou bann zanfan lekòl ki demen - akòz ozordi nou vwar poudir bokou Letablisman Touris, zot pe adopte bann lekòl kot la zot kapab aprann en pti pe plis lo bann fason fer pou zot ed bann lekòl li menm li Mr Speaker.

E osi ler nou'n get *the cultural tourism* Mr Speaker, nou bezwen edik nou pep k manyer nou pou kapab pran li byen, ki demen s ai kapab anmenn sa benefis pou bann lakour bann fanmir li menm li.

Ler ou pe get partou konmela dan bann kominote i annan bokou dimoun ki ankor pe pratik bann keksoz, parey nou gro manze. Mon ava mazin en madanm Mr Speaker, Mrs Christianne Benit i fer bann *chips* lokal ki sa nou kapab anmenn bann touris laba, pou zot vwar ki manyer sa i ganny fer. Akòz tousala zot ganny *enjoy*.

Ozordi ki nou vwar, bann prodwir tousala i ganny enporte deor. E ler bann touris

i vin isi zot kapab vwar annan en pti pe sa leksperyans ki manyer sa i ganny fer.

Ki sa ozordi i kapab anmenn plis en pti pe sa laspe dan nou bann kominote kot bann dimoun ki sorti deor, ler i sorti i ava kapab al laba deor pou endik en pti pe plis bann lezot viziter pou zot kapab vin dan nou pei Mr Speaker.

Mr Speaker, be sa *cultural tourism* la, i en keksoz ki fodre pa zis Gouvernman li menm li. Nou bezwen anmenn Seselwa an antye *onboard* e nou bezwen annan plis dyalog ankor lo la e fer sir poudir nou pa perdi nou bann kiltir zis parey ozordi Festival Kreol.

Nou bezwen relev li met li lo sa nivo ki i ti ete kot ozordi ler ou pe al Festival Kreol Mr Speaker ou pa ava vwar bann keksoz pe ganny kwi parey *burger*, ou ava vwar zis bann keksoz bann gro manze parey friyapen nou ava edik osi vann zot koko en pti pe bann keksoz koumsa.

E si nou kapab anmenn li en pti pe bann aktivite parey dan bann distrik kot bann dimoun i kapab li menm li vin partaz en pti pe bann keksoz ki zot annan bann keksoz ki zot fer kot lakour parey nou konfitir, en pti pe sa bann promosyon koumsa, kot bann touris ki zot ler zot vin dan nou pei zot kapab deteste en pti pe nou bann gro manze pou nou

bann keksoz ki nou ganny fer lokal nou bann *juice* lokal Mr Speaker.

Mr Speaker, mwan mon pou siport sa Mosyon par Onorab Bastienne akoz mon vwar poudir i annan son merit. E ozordi si nou anvi ki nou ganny plis touris. Touris ozordi zot pe kit kot zot sorti zot reste pou zot vin rod en pti pe sa leksperyans kiltir li menm li konn en pti pe nou listwar, konn en pti pe ki manner Seselwa bann fanmir Seselwa i viv, zot menm zot ki bann keksoz ki nou annan pou ofer. Touris nepli zis vini este dan lotel *enjoy* zis lans.

Touris i mars preski partou mon tanzantan dan mon distrik mon zwenn bann touris ki pe reste dan bann pti letablisman, zot vini zot al partou lo nou bann zil parey Ile au Cerf li menm li kot zot *enjoy* en pti pe nou labote.

E mon mazine poudir avek sa pos ki nou osi nou pou donner, nou pou ede pou ed Minister Touris pou zot fer en pti pe plis li menm li pou ede ki demen nou *cultural tourism* ki nou'n konmans koz lo la ki i vin en pti pe plis realite kot Seselwa li menm li i ava kapab vwar son plas kote li i antre dan bann distrik, nou moutya li menm li. Parey la mon vwar Serzan i pratik byen sa moutya li menm li.

Mr Speaker, zot la nou ava kapab edik bann lezot Nasyon ki sorti dan zot pei ki zot fer bokou *savings* pou zot kapab vin depanse. Kot la zot ava kapab depans en pti pe plis. Mersi.

MR SPEAKER

Mersi Onorab. Mon ava pas laparol Onorab Spiro?

HON RACHEL SPIRO

Mersi Mr Speaker. Bonn apre midi Mr Speaker, tou koleg Onorab.

Mr Speaker Mosyon pe dir prenon kont lenportans Lendistri Tourizm dan Lekonomi Sesel Lasanble i ankouraz Minister Tourizm pou kontinyen avek son program *cultural tourism* e devlop li plis ankor. E demann tou Seselwa pou vin pli aktiv e inovativ dan sa sekter ki i annan gran potansyel pou anmenn benefis endividyel e pou nou pei an antye.

Mr Speaker, *cultural tourism* i refer avek sa laspe tanzib e entanzib kiltir en pep en pei e souvandfwa le de i marye ansanm.

Dan bann lannen '80 – '90 e boner 2000, Sesel ti annan en kiltir vivan, dan tou kwen nou zil enkli Praslin La Digue e serten lezot zil en pe elwanye Seselwa ti manifeste zot kiltir e son kreolite.

Nou ti kapab admir tou form lar e artizanal pa ti manke. Nou ti pou kapab vwar nou kiltir pe fleri. Viziter ki ti debark lo nou zil ti kapab apresye nou lakey, nou lakwizin, nou ladans ensi ki nou lar e nou artizanal. Akoz sa ti nou fason fer.

Nou pa ti koz lo *cultural tourism*, akoz viziter ti deza pe eksperyans li e nou ti pe ofer zot deza dan en fason ou en lot en parti sa *cultural tourism* ki nou pe koz lo la.

Sa ki pe ganny demande an plis se ki nou kapab kree bann program adisyonnèl ki i annan potansyel kree plis reveni pou met dan lekonomi nou pei atraver sa bann aktivite.

Akoz? Ozordi fas sa bann defi e lenfliyans ki kiltir eksteryer i anmennen, nou bezwen pe vwar nou pe rode ki mannyer pou vin pli inovativ, pou atrakte touris ki oule vin eksperyans nou kiltir.

E loter Mosyon pe demande ki Lasanble i ankouraz Minister Tourizm pou kontinyen avek son program *cultural tourism* e pou devlop li plis ankor.

Departman Touris i deza annan en program parey *Creole Rendezvous* ki ankouraz viziter pou vin fer en leksperyans kiltirel dan nou pei.

Mr Speaker, Sesel ti annan manifestasyon kiltirel partou kote depi dan lotel koman dan kominote. Nou ti'n osi entansifye nou zefor pou anmenn bann aktivite ki atrakte touris pou vizit nou pei an mas. Tel parey Festival Kreol e *Carnaval de Victoria*, Bazar Labrin pou nonm enn, de pou ki viziter ti kapab apresye bann diferan fasad nou kiltir.

Loter Mosyon pe osi demann ankourazman pou Minister Tourizm pou kontinyen avek son program pou *cultural tourism*.

Nou konman sa Lasanble nou bezwen realize ki sa zefor i pa kapab ganny fer san bann lezot akter kle ki nouri e anrissi sa sekter, tel parey Minister Lanvironnman, Lenstiti pou Kiltir e Lar, Minister pour Lendistri e Lantreprenarya e lezot ankor.

Si nou oule sa program i marse, nou bezwen asire ki nou artizan i kree la relev dan promosyon bann diferan lendistri ki pou nouri sa program. Tel parey artizan ki fer tanbour moutya, sa ki fer sapo lapay, bann group kiltirel ki zwe lanmizik tradisyonnèl, bann kwizinyen ki prepar bann pla tipikman Kreol, pou ki viziter i ganny sa leksperyans otantik.

Nou bezwen osi revwar lafason ki nou fer promosyon

nou bann aktivite kiltirel, pou ki nou annan bann manifestasyon pli souvan.

Departman Tourizm ek lezot akter, i bezwen asire ki sa bann sipor i ava dekwa pou ki sa ki angaz zot dan promosyon e program pou siport *cultural tourism*, i kapab konsider sa konman en metye, pou li kapab fer lavenir pou soutenir son fanmir.

E la mon pe mazin bomaten, Minis in vin dan Lasanble e in koz lo amannman dan *Licences Act* ki pou donn bann *licence* provizyonnel. La i bann landrwa ki i kapab konmans donn sa bann *licence* provizyonnel pou k i ava larg lanmen bann pti dimoun ki i anvi osi ankouraz touris pou vin fer leksperyans kot zot dan en fason ou en lot.

Pei in met pa mal resours dan reparasyon nou bann sit istorik pou ki viziter i kapab vizite parey restorasyon *Mission Lodge*, bann Mize e bann moniman.

Creative Seychelles konman en lot antite partenarya en *partner* avek bann artis, i bezwen kontinyen ganny sipor pou *empower* sa bann artis pou zot kontinyen promouvwar sa bann artis e zot travay lo en baz komersyal

Konsej Nasyonal pour Lar li, osi ede fer promosyon *arts and craft* lo nivo lokal, i

osi bezwen osi byen ki enternasyonal tou sa bann antite i konpletman kanmarad.

Bann lezot Minister tel ki Minister Lanvironnman, i bezwen asire ki materyo brit ki bann artizan i bezwen parey vakwa, rafya, I kontinyen ganny propaze pou ki bann artis kapab ganny prodwir pou fer zot artis.

Pou sa kapab arive i bezwen annan en lagrikiltir ki entegral pou asire ki zot kapab furni marse.

Lenstiti Nasyonal pour Kiltir Leritaz e Lar osi pe seye atraver *Seychelles National Resource Council* li i konsantre lo prezervasyon sansibilizasyon e promosyon Leritaz Sesel. Ki swa tanzib ou entanzib.

I organiz bann aktivite tel parey Bazar Domenn, ki Seselwa osi byen ki viziter I ganny sans fer sa leksperyans vwar e partisip dan bann demonstrasyon ki ganny fer. I osi annan bann program parey Savwar Granmanman kot lekspertiz ek transmisyon konesans I ganny promouvwar e valorize.

E konesans lo fason fer I ganny remet an valer, pou asire transmisyon konesans I ganny partaze ek bann ki pli zenn.

Departman Tourizm i bezwen enterakte plis avek sa

bann lezot akter, e dan son demars pou promouvwar Sesel, i devret pe kolabor ek zot par envit zot serten sa bann *trade fair* aletranze. Zis parey Departman Tourizm i vann lans e labote Sesel i devret osi kapab vann nou bann atou kiltirel dan en fason soutenab par travay plis an partenarya.

Sa bann diferan *partner*, i devret kapab fer en programm konzwent ki ede promouvwar *cultural tourism* atraver son stratezi *marketing* pou ede vann sa bann prodwir kiltirel.

Bann letablisman touristik zot osi konman en *partenaire* zot bezwen kapab ede dan fer piblisite dan zot letablisman, pou sa bann diferan prodwir kiltirel ki Sesel i annan pou ofer.

Departman Touris i devret pe ede par ankouraz bann lotel pou annan bann *band* e performans par artis lokal.

Mon rekonnet zefor ki Minister Touris pe fer e se travay e se atraver sa bann zefor konzwent e kolektiv, ki nou pou kapab anmenn *cultural tourism* pli lwen. E reponn a demann loter Mosyon ki pe demande ki nou siport Minister Tourizm ek ankouraz li.

Me solman mon mazine ki i enportan ki nou osi met an plas tou sa bann striktir

neseser e osi travay partenarya ki enportan pou asire *cultural tourism* i vwar en vre plas dan nou sosyete.

Mersi Mr Speaker.

(APPLAUSE)

MR SPEAKER

Mersi Onorab. Mon ava pas laparol Onorab Richard Labrosse. Mikro silvouple. Mersi.

HON RICHARD LABROSSE

Mersi Mr Speaker. Bonn apre midi Mr Speaker; bonn apre midi tou travayer Lasanble, tou mon bann koleg e tou dimoun ki a lekout.

Mr Speaker, Mosyon ki devan nou. I pe koz lo kiltir ansanm pou melanz li pou fer li vin en programm touristik ansanm, pou vin en sel prodwir.

Sekter Touris i pli gran pilye dan Lekonomi Sesel dapre lenformasyon, Rapor Anyel a Labank Santral 2023, pou 2023 sa lendistri li menm in grosi par 5.8 poursan. E sa dan li menm in anmenn en pe plis ki 989 milyon Dolar dan nou lekonomi an 2023.

Parey tou Seselwa i konnen, Lendistri Touris i enn sa lendistri ki'n ed nou pei bokou depi son legzistans.

Sa byensir i vin depi sa premye bato krwaze ki ti koste o bor nou Por; sa premye

avyon ki ti apoz lo nou *Airport*, wi Mr Speaker parey nou granmoun I kontan dir wi se li menm li sa diber lo nou dipen.

Kot la in kree plizyer loportinite pou plizyer de nou isi Sesel. Swa endirekteman swa direktteman.

An 2022 an Zilyet isi menm dan sa Lasanble, swivan kestyon ki mon ti demann nou Minis pour Touris, konsernan zefor ki pei pe fer lo sa menm laliny kot i konsern *cultural tourism*. E son repons Minis ti fer resorti ki i annan 5 distrik ki'n deza fer odit lo sa laspe.

Me selman Mr Speaker, ler nou lo sa menm laliny i mon krwar i ti pou enportan osi kekfwa i ava vin en lot kestyon ki mon ava anmennen, kot kekfwa Minis ti kapab donn ou en pti pe plis lenformasyon ki zot in gannyen dan sa odit. E sa bann distrik osi.

E koumsa nou bann diferan osi dan bann distrik, si ti annan keksoz pou nou donn en koudmen ladan pou nou poli li, pou nou organiz li, e ansanm pou nou fer sir ki sa kanpany pou fer *cultural tourism* vin en lot prodwir pli atrakte pou nou bann viziter, kot nou osi bann dirizan dan politik menm isi dan sa Lasanble atraver nou distrik, nou ti kapab osi donn en

koudmen pou nou fer li vin en sikse.

Kot i konsern *cultural tourism* dan kominote koman en Nasyon nou kapab dir bokou nou osi kontribye dan en fason ou en lot parey nou dir dan lavi sakenn de nou bann dimoun parey nou dir nou kiltir Kreol.

Mon distrik par egzanz Mr Speaker, nou annan plizyer keksoz ki mon santi nou ti kapab atrakte plis bann touris li menm kekfwa sa osi ti ava kapab ed bann lazans parey nou dir bann *DMCs* ki vann nou pei aletranze.

Kot zot ti kapab osi, ler mon pe dir tousala kekfwa osi nou ti kapab rod en fason osi dan bann distrik ler nou pe vann sa bann parey nou *trail* parey nou dir. Parey Plaisance nou annan *trail* nou annan de zoli *Trail Plaisance*, nou annan Montanny Copolia ki balizaz avek nou. Nou annan en lot zoli *trail* ki apel *Rosebelle Trail*.

E san bliy en lot latraksyon touris ki mwan touzour mon santi ti kapab vin en keksoz vremen atrakte pou touris. Parey Onorab Roucou in koz lo la en pe taler Basen Larme; ki Basen Larme li Mr Speaker nou partaz li nou de Onorab Roucou sakenn lanmwatye, e i separ an de - en bout i tonm Plaisance en bout i tonm Mont Fleuri.

Sa osi mon santi kekfwa bann *partenaire* prive osi ti kapab zwenn ansanm Mr Speaker. Kot kekfwa pou nou kapab mentenir sa landrwa ki mon santi ler mon pe get li Sanmdi pase mon'n pas en kou dan sa rezyon.

Mon'n vwar konmsi pli ale ou a krwar i pe degrade. E nou rapel nou ti menm demann en kestyon isi dan Lasanble avek Departman Leritaz, kot zot ti eksplik nou kekfwa i annan bann travay ki pe ganny fer lo la.

Me selman la mwan mon ti ava lans en lapel kekfwa dan plas pou nou met sa lo sa louvraz plis lo Gouvernman, kekfwa menm bann biznes dan zalantour ouswa menm kekfwa bann ki enterese, ki ti kapab zwenn avek le de distrik ansanm, kekfwa nou ava asize pou nou get li ki mannyer nou kapab fer sa landrwa vin pli atrakte?

Mr Speaker, e ler nou'n lo sa topik osi, nou pe koz lo leritaz osi pa zis Plaisance e osi dan bann lezot distrik parey Onorab Loizeau fek fer mon konnen Bel Air, nou annan plizyer landrwa istorik. Me selman ankor enn fwa parey mon'n dir pli boner mon santi kekfwa ki travay i merit ganny fer plis la kekfwa pou *maintain* sa bann sit leritaz.

Akoz ler ou pe regarde plizanpli zot pe deteryore e

nou Sesel nou pe vann nou napa tro bokou apard ler mon pe get nou lans ki bann touris i en pti pe pli atrakte avek, nou pou osi bezwen revwar bann lezot prodwir ankor par egzanp pou nou kapab vann nou pei en pti pe plis kot i pou atrakte plis dimoun pou vin isi pou zot vin vwar bann keksoz kekfwa ki zot pa pe vwar dan lezot pei.

Ler mon pe koz lo *cultural tourism* bokou dimoun i osi mazin lafason pou fer touris reste dan lakominote.

La i annan en en lot zafer ankor. I annan sa zafer *change of use* ki lamazorite bann Seselwa sirtou bann ki annan en landrwa ki ase gran ouswa ki annan lespas bata zot kontan sanz li kekfwa pou vin en *guest house*. Sa osi i enteresan., dan li menm kekfwa touris i santi li pli i ava kapab ganny sa lanbyans Kreol sa lanbyans kiltirel n pti pe pli pre dan son kominote.

Me selman mon en keksoz ki mon ganny en pti plis konplent en pe lo la, ler nou pe koze kekfwa nou en pe dan lavil osi nou ganny sa en pe plis. Kot parfwa ler sa bann landrwa in ganny sanze pou fer sa tel aktivite parey la apre i annan sa bout kot dimoun i ganny en pti restriktirasyon restrikte. La ou ganny dir pa fer tapaz, pa isi, pa laba ou pe *disturb* kliyan.

So mon krwar dan menm laliny osi la nou pe ankouraz dimoun pou fer sa Mr Speaker, mon osi konsyan ki kekfwa bann dimoun ler i pe al antre ladan bann departman konsernen ler sa bann dimoun pe apros zot pe fer bann tel keksoz parey.

Zot merit osi kekfwa fer en evalyasyon e ansanm kekfwa donn sa bann dimoun en pe *advise* lo sirtou ler zot pe al *invest* zot larzan dan en tel keksoz parey.

Akoz nou pa kapab osi nou bezwen mazin tou le de kote i vre touris i dipen lo nou parey mon'n dir diber lo nou dipen, nou bezwen respe.

Me sa dan en lot laspe osi Seselwa osi i annan son laspe kiltirel ki li lafason i anmiz son lavi.

I pa vedir ki i fer tapaz I en keksoz ki ou ankouraze. Me selman parey nou tou nou konnen tapaz i osi form parti dan nou kiltir Kreol Mr Speaker. Si ou rapel byen moutya ler ou zwen moutya I fer bon pe tapaz en bon pe leokri n bon pe keksoz i ganny dir ladan e la mon kapab die ki moutya osi ozordi in ganny son nonm enternasyonal kot i a rekonnet par *UNESCO*.

E la ler mon lo sa topik mon pe koz lo moutya ganny rekonnet par *UNESCO* - nou pe koz lo *cultural tourism*, e mon santi kekfwa *well* ankor enn

fwa pa zis Minister Touris oubyen kekfwa pa zis Minister Kiltir, eski i annan bann lezot keksoz ki par egzanp nou kapab fer en zour nou blok lavil en zour nou donn nou moutya nou fer en pe tapaz leokri dan lavil.

E s dan li menm li nou pa fer li toulezour kekfwa i ava en zour spesifik pa zis ler Festival Kreol. En zour spesifik kot nou osi nou vann sa avek kliyan deor. Zot ava konnen *ok* ler nou pe vin Sesel tou le tel ler tou le tel zour i annan moutya la, *ok*.

Zis parey Onorab Romain in donn en legzanp *Jamaica* taler, kot zot i annan en levennman anyel. E mwan mon krwar ki si moutya in ganny rekonnet enternasyonalman mon krwar osi Sesel nou bezwen fason pou nou kapab montre poudir nou satisfè e nou kontan ki sa in arive.

E la ler mon lo sa topik Mr Speaker, byensir nou bezwen osi rann omaz pou tou bann dimoun ki'n fer sa arive. E la mon mazin defen Norville Ernesta ki'n kit nou tou resaman.

Ler nou pe koz *cultural tourism*, artis osi i form par en lot *partenaire* kle dan demars *cultural tourism*. Nou bann santer popiler sirtou bann ki pratik nou bann lanmizik

tradisyonnèl, parey mon'n nonm enn la ki'n tou resaman.

Lontan dan bann kominote parey nou konnen ti annan bann bal Kreol ki ti ganny deroule, sa ti dan bann kominote en pe parey lontan. Parey mon'n nonmen moutya, kanmtole ti enn.

E nou santi ankor enn fwa al *well* kekfwa nou mon zenerasyon kekfwa mon pa p vwar mon pa santi mon pa vwar en dimoun ki pe al lo sa laliny.

Me selman ankor enn fwa Mr Speaker, i bann keksoz ki nou pou bezwen konmans *tackle* li byen menm depi dan lekol.

Mon konnen dan lekol zot annan *curriculum* kot i montre zanfan zwe lanmizik. E mon pa vreman konnen si ladans i enn form parti sa.

Me selman si bann departman konsernan pe ekout nou la. Mon krwar i pou pli bon pou nou konman sek nou bann zenn ase tre zenn nou bann lanmizik tradisyonnèl, bonm, zez, gitar, tanbour moutya li menm ek bann plizyer lezot ankor.

Konmsi nou konmans li byen zenn ki sa bann manmay la ler zot ava grandi zot in fini met sa dan zot disan e zot in fini ganny en konpran lo kwa ki Sesel e pei li menm, ki bann granmoun in kit pou

nou osi e zot ki la zot pou al lo la.

E ler mon lo sa topik osi e par egzanz osi ler nou pe koz lo lakey viziter, nou annan nou *Airline* enternasyonal *Air Seychelles* li menm ki sa premye *well* - konmela i pa laplipar aköz i annan diferan kalite *Airline* ankor ki pe vin Sesel.

Me selman i annan bokou dimoun i annan bokou touris zot pli kontan servi li pou vin isi. Zot santi li en pti pe pli, konmsi zot *feel* zot pe vin Sesel parey nou dir.

Me selman mon santi la ler zot ganny sa premye, zot premye rankont ler pou rantre lo *Air Seychelles*, zot ganny lakey avek sa Manm lekipaz ki lo avyon.

E la mon santi kekfwa la i merit annan sa serten keksoz tradisyonnèl osi nou met konmansman la ler nou pe vin Sesel. Pa ler ou pe ale, ler ou pe ale en lot zafer.

Ler sa avyon pe sorti dan sa lot destinasyon pe vin isi mon krwar nou merit konmans la. Kot la kekfwa abor, mon pa konnen si nou annan nou bann lanmizik tradisyonnèl i ganny zwe ki bann dimoun i ekoute. Nou bann pti dokimanter lokal, kot bann dimoun pou ganny sans konnen kot zot pe ale.

Konmsi ansanm mon mazine nou lakonpanyen

Airline avek bann DMCs parey nou dir, bann ki fer promosyon destinasyon, zot ti kapab zwenn ansanm ankor enn fwa pou zot vwar ki mannyer zot ti kapab konmans sa kiltir.

Parey nou pe dir nou pe siport Minister Tourizm. Me mwan mon santi kekfwa Mosyon osi Onorab Bastienne, i kapab al pli lwen ki sa nou pa kapab zis kekfwa en touris i kapab fer son bout son Polisi. Me selman mwan mon santi ki sa program li menm li i merit konmans en pti pe pli lwen ki sa.

La monn donn en legzanp kot sa touris in konmans ler i anbank lo avyon pou li vin isi. E osi kekfwa osi bann bato krwazyer mon pa konnen ki mannyer zot *operate*. I bann keksoz konmsi ler zot pe al koste Sesel, zot santi poudir zot pe vin Sesel. Nou pa pe vin vwar menm keksoz ki zot in vwar dan bann lezot pei kot ot in pase.

Mr Speaker, lo menm aliny osi par egzanp lo bann artizan osi, mon santi ki bann artizan isi Sesel - mon pa konnen si vreman I en problem - nou pa pe ganny ase artizan ki pa pou prodwir souvenir parey lontan.

E se pou sa rezon ki ozordi i annan bokou dimoun zot pa pe kapab depan lo sa artizan zot in fer mon ganny en

konpran, kot zot bezwen osi, fer vini bann keksoz deor kot I ganny prodwir aletranze.

E ankor enn fwa sa bann dimoun pe rod zot lavi, nou pa pou kapab anpes sa. Me selman la i en mesaz osi kot nou pe lans avek departman konsernen pour lar.

Kekfwa pou zwenn ek bann lasosyasyon pou vwar ki zot bann defayans, kwa ki zot, zot kapab ankouraze. Kwa ki zot kapab fer pou promot bann artis ki bann artis osi zot vin pli inovativ, kot ler zot kapab osi, pa vann zis ek bann vander ki vann bann souvenir tradisyannel.

Me osi kekfwa pou avans zot bann prodwir ki zot prodwir i en pti pe pli o nivo eksteryer parey nou dir.

Ler Lasanble pe revwar sa bann Lalwa ki ede pou fer bann biznes vin pli fasil dan Sesel e osi sa pou mon i en travay Nasyonal ki sakenn de nou i merit partisip ladan dan diferan fason.

Ki mannyer zot merit partisip ladan i en travay ki nou, nou ava konmans isi, bann Letablisman Touristik, tou bann dimoun deor. Pa zis bann Letablisman Touristik nou osi annan bann ler nou pe koz *cultural tourism* Sesel i annan diferan kiltir.

Me vol touris pou mwan i pa en kiltir ki nou merite. Sa i

en kiltir mon pa konnen kote i sorti.

Me selman sa osi i annan en pe travay ki nou bezwen fer lo la. Ki ler nou bann touris pe vin isi pe vin *enjoy* nou kiltir, zot pa pe santi ki nou kiltir pou zot ganny vole pou vin ganny isi vin ganny laba.

La ankor dimoun kekfwa pou demann mon be lapolis. Ankor enn fwa i pa zis lapolis i en keksoz en travay ki mn krwar ki nou santi ki sakenn de nou i merit zwe ladan.

Parey monn dir pli boner touris in ogmante, In anmenn en bon pe larzan dan nou lekonomi, ki sa dan li menm li i ede pou pey tou bann depans ki tou bann pep Seselwa i ganny atraver bann depans Gouvernman i fer, swa dan Lasante, dan Ledikasyon.

E ou vwar enn ou sa enn la deor avan ou pran sak en touris pou ou tay avek, ou bezwen mazin de fwa detrwa fwa. Akoz i pou difisil. I fasil pou ou perdi en touris pou li vin kot ou. Me parfwa mon santi ki i annan bokou travay ek difikilte, ki bann dimoun la deor pe fer zot osi pou zot kapab kontinyen fer nou lakantite viziter ogmante tou le lannen.

Mr Speaker, mon pa pou long lo sa. Avek sa mon ava dir ou mersi.

MR SPEAKER

Mersi Onorab. Laparol Onorab Kelly Samynadin.

HON KELLY SAMYNADIN

Mersi Mr Speaker. Bonn apre midi tou mon bann koleg Onorab e tou dimoun a lekout.

Mr Speaker, lorganizasyon Nasyon-z-Ini pou Tourizm Mondyal i defini *cultural tourism* konman mouvman bann dimoun pou bann motivasyon kiltirel esansyel tel ki bann *study tool*, *performing arts* ek *cultural tools*, voyaz pou asiste bann festival ek bann levennman kiltirel. Vizit kot bann sit ek moniman. Voyaz pou etidye lanatir ek lar. Ensi ki bann pelerinaz.

Lorganizasyon mondyal pour Tourizm, i sit *cultural tourism* konman mouvman bann dimoun pou satisfere zot bezwen imen, pou diversite ki tant pou elev nivo kiltirel bann endividi e donn nesans sa bann nouvo akizasyon, leksperyans ek rankont.

I osi ganny defini pou anglob partisipasyon bann viziter dan bann aktivite kiltirel, kot swa sa bann aktivite I ganny konsidere konman zot bann aktivite primer ou non.

Mr Speaker, i annan de laspe *cultural tourism* i annan enn ki entansyonnel, kot bann viziter dan nenport destinasyon dan lemonn i

target pou ganny en leksperyans otantik. E sak kominote i annan son karakteristik ki fer li inik avek lezot. E sa i kapab konpri listwar tradisyon lar ek kiltir.

Dezyenmman Mr Speaker, i annan sa laspe in entansyonnel kot bann viziter i pas atraver sa ki nou apel en imersyon kiltirel avek bann zabitan lokal, zot langaz, koutim lakwizin. An bref kot sa i en konponan inevitab pandan son vakans.

Malerezman Mr Speaker, mon santi ki sa laspe in entansyonnel i en gran mankman dan nou pei. Nou bann viziter pa pe ganny sifizaman *exposure* avek bann diferan laspe nou kiltir eek tradisyon. E nou bezwen reakte lo la konmela menm.

Sak Kominote i annan en zistwar pou rakonte. E i enportan ki en stratezi angazan i ganny trouve pou fer sa mesaz ganny pase avek nou bann viziter, osi byen ki i atrakte zot pou enterese pou vin a sa dekouver.

I enportan pou note Mr Speaker, ki sak distrik dan Sesel i annan son prop partikularite e i souvandfwa ganny rekonnet atraver swa son bann ansyen. Bann moniman ki ganny trouve dan sa distrik, bann sit nasyonal e bann tradisyon par ki sa kominote i ganny idantifye.

En legzanp tipik Mr Speaker, Au Cap i ganny rekonnet konman *the cultural hub of Seychelles*, atraver son *fame* Lenstiti Kreol, ki an se moman i pe pas atraver en prosedir renovasyon. Langar pirog ki ganny trouve zis a kote. Vilaz artizanal e distil Takamaka Bay.

Au Cap i osi en sit ki popiler pou son bann zoli lans, kot tou le *weeknd* i konble avek plizyer viziter lokal ensi ki enternasyonal.

I osi annan bann lezot partikularite. Me sa bann ki mon'n nonmen i pli zou mwen bann latraksyon ki pe atrakte nou bann viziter aktyel.

Lo sa not Mr Speaker, mon ti a kontan sizere ki nou zoli distrik Au Cap i ganny transformen konman en vilaz tradisyonnel, plizoumwen nou vilaz artizanal aktyel.

Pandan en konversasyon ki mon ti gannyen avek Mr Marcus Monthy, en zabitan mon distrik, i ti propoz avek mon ki petet Gouvernman i devret investir dan en vilaz tradisyonnel, oubyen vilaz Kreol. Kot akse bann diferan laspe nou kiltir e tradisyon i kapab ganny dekouver e eksplote anba en sel twatir.

Sa i konpri nou lakwizin, lanmizik e ladans tradisyonnel, lapentir, literatir e bann lezot dokimantasyon ensidswit.

Sa i pou byensir atrakte bokou viziter. Akoz i pou en loportinite pou zot ganny akse avek sa bann diferan laspe nou kiltir leritaz anba en sel parasol. I ava osi en loportinite pou bann diferan artis ganny loportinite pou ganny en reveni me prensipalman mon pou eksprim zot dan zot lar partikilye lo en baz 7 zour lo 7.

Pou kwa pa 11 er bomaten en viziter i pase e i kapab partisip dan en bal kanmtole avek aroma en bon pwason griye byen zepis lo labrez. E en viziter pe ganny sa sans pou en pent ilistre son portre lo en *canvas* antoure avek lanatir?

Mr Speaker mon santi ki sa i en tre bon linisyativ ki Lenstiti pour Kiltir e Leritaz ek Lar i merit konsider sa konman en rekomandasyon pou le fitir tre pros, akoz i pou en tre bon linisyativ ki pou benefisye nou pei ekonomikman atraver koleksyon reveni e kreasyon lanplwa.

E i pou osi en meyer fason pou relev e promot nou kiltir leritaz ek lar ki swa lokalman oubyen enternasyonalman.

An menm tan Mr Speaker, mon oule felisit e rekonnet travay ki Konsey Nasyonal pour Resours Leritaz ki baze dan distrik Au Cap

anba direksyon Madanm Manmzel Benjamin Rose pe fer, pou kapab entegre *cultural tourism* dan lakominote.

Sa i atraver bann edisyon Bazar Domenn ki ganny fer tou le Sanmdi tou le dernyen Sanmdi lafen dimwan. Louvertir Mize koko, Lakaz Roza ek restoran Vye marmite avek son lakwizin tipikman kreol. Tousala ti ganny inogire lannen pase.

Mr Speaker, an gro, i enportan pou note ki *cultural tourism* i premyerman annan en laspe konsekans sosyal, kot i ede ranforsi idantite a grandi konpreansyon enter kiltirel. Ensi ki prezerv leritaz ek kiltir en pei.

Dezyenmman i annan bann konsekans ekonomik pozitiv kot bann viziter ki vizit en pei ou en landrwa partikilye, pou aprann plis lo son kiltir oubyen ki vizit latraksyon touris kiltirel zot an retour pe kontribye anver lekonomi sa pei.

Me par kont Mr Speaker, nou bezwen fer sir ki sa laspe *cultural tourism* i ganny enplimante dan en fason ki soutenab. Akoz malgre son bann benefis ki serten mon fek mansyonnen si nou pa fer atansyon i kapab anmenn ver konpreansiv nou bann prodwir ki i inik a nou pei.

Mr Speaker, nou lavil Viktorya Kapital Lemonn

Kreolofonn i merit osi pas atraver en transformasyon kiltirel. Parey serten mon bann koleg Onorab in koz lo la.

Sa laspe *cultural tourism* i merit ganny entrodwir dan nou lavil, aköz i enn parmi bann premye landrwa kot bann viziter i aksede kan zot debarke Sesel.

I sagrinan mwan letan mon vwar bann kliyan sirtou sorti sirtou dan bann bato krwazyer, pe marse dan lavil e napa okenn latraksyon pou zot vwar e eksperyanse.

Mon panse ki bann stratezi inovativ pa merit zis sorti kot Gouvernman zis, letan mon pe koz lo kreasyon louvertir lepanouisman *cultural tourism* dan nou lavil.

Bann biznes ki ofer bann servis ospitalite, i merit travay an partenarya avek bann *partenaire* kiltirel, ki enkli biro Mer Lavil avek bi pou kree loportinite pou zot e osi pou ede egey e fer nou lavil vin pli vibran e an retour ogmant zot reveni zot osi.

An konklizyon Mr Speaker, mon oule felisit langazman ki nou Gouvernman in pran pou ede dan promosyon laspe *cultural tourism*. En linisyativ ki'n konmanse depi lannen 2021, kot nou pe ganny sipor UNESCO dan sa demars.

E mon senserman krwar ki nou pe devret sezi sa bann

loportinite, pou ed e siport bann distrik dan travay ki zot pe fer pou elev e prezerv nou bann patrimwann kiltirel en si ki dan promosyon bann aktivite kiltirel.

I pa en travay ki fasil, me mon santi ki avek sinerzi ant bann diferan parti prenan i swa Gouvernman ou prive, nou pou reisi konmans rekolte fri sa travay. Fas a kiltirel Sesel i enn ki ris e vas e i merit ganny partaze avek lemonn.

Cultural tourism i en laspe ki monn akeyir lebra ouver, aköz i pou kategorikman fasilite lepanouisman ekonomik nou pei dan en laspe ki pozitiv e soutenab.

Avek sa Mr Speaker, mon konfirm mon sipor anver Mosyon Onorab Bastienne. Mersi.

MR SPEAKER

Mersi Onorab. Bon, mon krwar mon ava apel pou en poz la. Lo mon lalis mon annan Onorab Georges, Esparon, Porice, Aglae, Arissol, Monthy. Si i annan okenn Manm ki le azoute les, mon ava pran zot non e nou ava frenm lalis, aköz mon bezwen konsider en pe letan ki nou ale aköz *staff* i bezwen...

So alor aköz zot reste lo dernyen moman pou lev zot lanmen. Bon bann Manm ki'n

koze ziska konmela in pran apepre 10 minit en kantite en pti pe mwens. So mon ava demann bann Manm ki pe al koze pou fer sir zot pa depas 10 minit.

Nou annan plis Manm ki'n lev lanmen la ki ti annan avan, monn azout Onorab Loizeau, Uranie, Cosgrow, Pillay, Woodcock. Se sa? Gill.

Byen, mersi alor nou ava termin la e avek sa lalis e nou a rebran 4er 10. Mersi.

(BREAK)

MR SPEAKER

Byen Onorab Georges ou annan laparol?

BERNARD GEORGES

Mersi Mr Speaker. Bonn apre midi Mr Speaker e tou bann koleg Onorab. Mr Speaker, sa Mosyon ki devan nou la, i pa merit en apre midi - i pa merit koz 10 minit. I en Mosyon ki merit en semenn antye i lo li akoz i tous telman keksoz enportan e i tous nou lekonomi ki enportan nou sekter ekonomik ki enportan dan nou pei.

E Onorab Bastienne kan son Mosyon in fer nou apel 2 keksoz; premyerman ki nou pe devret pe zis *focus* lo bann fason tradisyannel fer tourizm e sa se fer lotel, fer *guest house*, fer *self-catering*. Akoz sa bann keksoz i fasil.

Si ou war Mr Speaker, ki tou bann dimoun ki investi dan lendistri tourizm i al dan lotel, *guest house* e *self-catering* se akoz son retour i gro e son letan, son louvraz ki ou bezwen met ladan i pa osi enportan ki bann lezot Sekter Tourizm.

Par egzantp, si ou pou fer en self-catering, e ou pou lwe en lasanm R150 ERO par lannwit, ou pou ganny en *return* ase fasil. Me si ou pou al fer en restoran par egzantp kot ou bezwen vann en manze R500 ou bezwen fer en kantite pou ou kapab ariv menm kantite reveni. E ou travay pou pli enportan.

E sa i menm keksoz pou tou bann lezot laspe tourizm ki a labaz Mosyon Onorab Bastienne. So sa se son premye pwen. Son premye pwen se annou sorti lo fason tradisyannel fer keksoz fer lotel annou al dan en lot fason fer. Annou fer sa ki nou Minis Touris i dir nou e sa se fer en fason ki touris i ava depans plis dan nou pei, olye zis vin isi pas son letan dan en lasanm lotel e apre al lo lans eksetera. Alor donn nou touris bokou plis keksoz pou fer.

Son 2enm laspe son Mosyon, se ki i pe demann avek bann dimoun dan Lendistri Touris, bann Seselwa dan Lendistri Touris, pou amelyor nou prodwi.

Annou fer keksoz en pe pli byen. Mon pe mazin - taler mon ti pe koz avek enn mon koleg – annou pran lanmizik par egzanp Mr Speaker. Bob Marley akoz ki Bob Marley avek *reggae* in fer telman byen?

En pti zil *Jamaica*, en *mode* lanmizik *reggae* e ozordi in vin en fenomenn enternasyonal, se akoz Bob Marley ti sant an Angle e *that's the simple truth. Ok, reggae i en fantastik lanmizik e personn pa konn sa pli byen ki zabitan Les Mamelles, me solman ou bezwen kapab capture –*

Wi, zot tou zot konnen ki si ou al dan okenn lakaz Les Mamelles i annan swa en *poster* Bob Marley, swa en paviyon *Jamaica*. E *Red Gold and Green* set en keksoz ki vreman dan nou kiltir, i dan nou distrik.

Be mon pa pe dir sa pou mwan denigre nou lanmizik. Mon pe servi sa koman en legzanp sa kalite keksoz ki dan 2em parti Mosyon Onorab Bastienne apre midi. Se annou fer sa ki nou pe fer, me annou fer li ankor pli byen.

Annou bann artis par egzanp, olye zis kekfwa penn bann pti senn kot ou war en lans ek en pye koko, eksetera, kot ou kapab vann pou en pti pe larzan avek touris, annou

kekfwa fer bann *paintings* en pli abstre, en pe pli gran kot ou kapab vann li avek plis larzan.

Lotrozour mon'n asiste louvertir lekspozisyon Mr Leon Radegonde ki enn si non - nou bann pli gran artis Seselwa, san ankor enn fwa minimiz konpetans bann lezot artis Seselwa. E mon konnen la o bor mwan mon annan Onorab Gervais Henrie Deputy Speaker ki son frer Nigel, i enn bann gran artis Seselwa ankor, me mon mansyonn Mr Radegonde, akoz in fer en lekspozisyon e pandan louvertir in ganny dir ki bann artis etranze, bann gran non dan lar etranze i konsider li koman en artis a konpetans enternasyonal.

Donk, nou annan dimoun isi Sesel ki lo sa nivo. E tout an respektan lide fer *cultural tourism* dan lafason tradisyonnèl ki nou pe fer li atraver *guest house* e lasanm *self-catering* me osi dan lafason ki nou pe fer li tradisyonnèlman ozordi kot nou annan Pommes Canelles, i annan restoran Marie-Antoinette, i annan Chez Baptista ki par egzanp zot ou zot konnen Chez Baptista in koman par griy pwason o bor lans e son biznes in devlope ozordi in vin en lotel avek en restoran byen koni.

Olye zis fer sa, mon krwar sa ki sa Mosyon pe

demande, se nou regard en pti pe ki mannyer nou kapab fer bann keksoz diferaman e fer li pli byen – pli byen ankor.

Par egzanp Mr Speaker, yer nou ti pe koz lo Victorya e la ozordi nou'n - enn, de dimoun in ankor mansyonn Victorya. Konbyen lannen nou pe koz lo annou fer Victorya viv? Annou fer Victorya vin vibran?

I annan en zoli sign ki'n ganny mete o bor Lorloz; sa set en keksoz ekstraordiner. Fantastik. *Well done*, sa ki 'n fer li. Nou annan prezan en mize ki alaoter – Mize Listwar. Nou pe reorganiz Carnegie – Mize Listwar natirel byento.

Me se pa tou Mr Speaker. Victorya i bezwen ankor bokou plis. I bezwen reouver *Pirates Arms* – dan Victorya *Pirates Arms* ti anmenn latmosfer dan lavil aswar. Konmela preski tou bann pti *café* i fermen, so nou bezwen *think big* dan en serten fason tout an konsideran ki nou annan bokou keksoz e ki nou fer bokou keksoz byen.

Nou bezwen mazin en pe pli lwen en nou pa bezwen zis dir avek Gouvernman-Gouvernman i bezwen fer sa, Gouvernman i bezwen fer sa, Gouvernman i bezwen fer sa.

Mon a donn en legzanp Mr Speaker. Konbyen dimoun ki aste en *takeaway* anvil? Lamazorite dimoun ki travay

anvil i aste en bwat manze midi e kote zot manze? Sa bann ki napa en refektwar oubyen *whatever*, zot asiz dan zot biro, oubyen zot asiz lo en bor peron oubyen zot asiz lo en landrwa lo en bor miray anvil, pou zot manz zot *takeaway*.

Sa, nou devret sorti dan sa mantalite. Nou'n devret kapab ozordi e mon pe fer en lapel avek bann dimoun ki responsab pou Lavil Victorya, nou ti 'n devret kapab fer dan bann pti landrwa met en parasol avek detrwa ban avek en bin, kot dimoun ti kapab asize Seselwa ek touris manz zot *takeaway* met dan bin apre retourn dan zot biro. Sa se bann – e se sa – se sa lespri mon krwar deryer Mosyon onorab Bastienne. I pa pe zis dir nou annou fer plis keksoz pou *cultural tourism*. Sa se sa ki Minis pe demann nou fer.

Minis pe demann avek Seselwa pa zis fer lasanm lotel, al dan bann lezot keksoz ki zot kapab fer. Onorab Bastienne pe dir nou wi, me annou fer li pli byen.

Annou valoriz sa bann keksoz ki nou annan. Annou fer ki Mr Patrick Victor par egzanp i ava vin en *star* enternasyonal olye zis vin en *star* nasyonal.

Nou bezwen annan bann dimoun ki pe monte ki kapab fer sa, i kapab pran nou kiltir e anmenn li a en nivo siperyer.

E nou kapab fer li. *Air Seychelles* par egzanp i *fly the Creole Spirit*. I pa'n vin par laverti. In vin par en lespri enter-nasyonaliz e devlop en keksoz ki nou annan; en kiltir ki nou anndan nou.

Alor Mr Speaker, mon pa - i annan en kantite dimoun ki pou koze apre midi, mon pa anvi monopoliz sa deba, me mon ti anvi zis fer sa detrwa refleksyon.

E les mwan dir ki i annan - mon konnen mwan aköz mon *involve* ladan - i annan lezot keksoz ki pe ganny fer e ki pou ganny fer byento, pou al dan sa direksyon ki Onorab Bastienne pe demann nou al ladan.

Mon kapab donn zot enn de legzanp. Nou ti annan *Vallée De Mai* ki en sit byen koni. E la nou annan Fond Ferdinand, e Fond Ferdinand pe devlop byen e i pou annan byento en laspe kiltirel avek en vilaz artizanal eksetera, pour ki i pa zis annan enn *Val Des Pres* me i pou annan enn osi Praslin, bann dimoun ki al vizit Praslin.

Nou annan en kantite zoli *trails* en pe partou e mon kontan ki zot pe devlope aköz set en lot laspe tourizm isi Sesel. Me permet mwan Mr Speaker apre midi, mansyonn enn de lezot legzanp.

Par egzanp Onorab Esparon dan enn son bann

kestyon resaman, in fer nou realize ki North East Point sa bann ranplasman ki Larme Angle ti'n fer dan Dezyenm Lager Mondyal pe ganny valorize, zot pe ganny sa bann batiman ki *derelict* ozordi pe ganny en nouvo souf. Se sa keksoz ki nou bezwen.

MR SPEAKER

10 minit ankor Onorab Georges, mon *remind* ou.

BERNARD GEORGES

En *National Art Gallery*, nou bezwen en *Musée de la Marine*, nou en pei avokasyon *de la Marine* nou bezwen en *Musée de la Marine* kot bann touris i a kapab vini ava vwar nou bann kiltir maritim.

Nou bezwen e nou pou gannyen byento - *Aldabra House* kot bann dimoun ki napa de mwayen, oubyen ki napa letan oubyen ki pa kapab vizit Aldabra kapab fer li isi menm lo Mahe dan en serten fason. Se sa, sa bann keksoz ki nou bezwen Mr Speaker.

E mon felisit Onorab ki in fer nou mazin sa bann keksoz ozordi. E mon dir li aköz mon napa letan pou al pli lwen ladan, Onorab mersi bokou, pou *remind* nou ki nou bezwen fer ankor plis dan sa sekter.

E ou pou ganny mon sipor e mon *hope* ki ou pou ganny sipor Lasanble an antye

dan sa demars. Mersi Mr Speaker.

MR SPEAKER

Mersi Onorab. Onorab Esparon?

HON REGINA ESPARON

Mersi Mr Speaker. Mr Speaker, Mosyon ki devan nou anmennen par Onorab Bastienne pe demann Gouvernman atraver Minister Touris pou kontinyen avek son program *cultural tourism*.

An dot mo, i pe demann nou pou met plis lanfaz, Gouvernman pou met plis lanfaz lo promot nou kiltir e fer touris apresye nou valer kiltirel.

En Mosyon ki fer nou realize ki menm si nou pe fer byen an term kantite touris ki pe antre Sesel - parey yer Minis fek fer nou rapel bann sif - me i osi enportan pou nou met plis lanfaz lo ki mannyer nou fer bann viziter ganny sa leksperyans lokal e kot nou ekspoz zot ek plis aktivite lokal, ki pou fer sa kliyan apresye sa kiltir Seselwa e depans son larzan isi.

Olye zis parey i leka konmela, pey atraver en Lazans aletranze kot bokou lenstans sa larzan pa pe antre dan lekonomi Sesel.

I osi enportan Mr Speaker, ler nou pe dir anmenn touris pou partisip

dan nou lavi kominoter, nou bezwen fer sir ki zot an sekirite kot pti menn pa vin vann zot en koko R200 parey ti arive kot legliz Port Glaud.

Touris pa ganny arase zot propriyete, me kot nou bezwen edik nou dimoun pou pa *rip off* kliyan ki'n pey ser, ki sorti lwen pou vin vizit nou.

E la Mr Speaker, mon mazin 3 laspe prensipal parey in ganny fer resorti dan bann deba oparavan, ki nou bezwen promote atraver *cultural tourism*. Nou *gastronomy*, nou ladans e nou lanvironnman.

Annou get lo kote *gastronomy*. Mr Speaker, ozordi lo Mahe mon konn zis 2 restoran ki pe ofer sa vre manze Kreol avek sa gou otantik ki ler ou manze ou apresye ki wi, sa enn nou pla krol en meni sorti dan nou tradisyon Kreol.

Sa i Restoran Marie-Antoinette St Louis e osi pti Restoran Micheline Georges anler Jardin Du Roi. Byensir nou annan *Boat House* e Chez Baptista ki osi ofer melanz manze Kreol avek azyatik.

Me Mr Speaker, parske ler sa kliyan i kit kot li pou vin vizit nou, i pa vin rod en *Burger King* li, nou devret annan sa loportinite pou gid li vre landrwa ki i kapab debiste enn nou bon pla Kreol.

Nou bezwen fer plis piblisite isi menm aletranze

pou nou kapab promot nou kiltir.

Me sa ki mon kontan ek *Jardin Du Roi* ou kapab ganny en dite bigarad apre en dezennen e tal ou dan en gran fotey kliyan anba lavarang, parey nou zanset ti fer lontan.

E lot kote Mr Speaker, pou sa kliyan ganny ekspoze ek nou ladans tradisyonnel, kote ki i ale? Parske bokou lotel pa pe ofer sa fasilite kot en *band* i zwe, en *band* lokal i zwe.

Bann *band* parey Leve Tradisyon, kot sa touris i kapab ganny ekspoze. Nou konnen ki La Digue i annan bann lotel ki ofer bann tel fasilite, me lo Mahe i en pe rar. Pourtan *UNESCO* in adopte nou moutya e nou pa pe fer ase pou nou promot li.

Dan bokou lotel ou war bann *band* pe promot lanmizik *jazz*. E parfwa i malere kot nou prop Seselwa pa pe ganny sans performen. E ler ou koz ek bann met lotel zot fer ou konpran ki parfwa pri ki *band* i pran i tro egzorbitan.

Mr Speaker, lontan touris ti *look forward* dan Mercredi pou li al Bazar Labrin, kot i ti kapab dans en moutya o bor sa laflanm dife, debiste en pwason griye kot Garry ki'n ganny griye lo labrez lanmenm devan, gout en pti kalou for.

Bwar en pti zi limon fre, gout en bout bouden ankor so, en bout gato mayok oubyen gato zironmon, *enjoy* en gro moutay kot siro i koul lo son lestoman e osi nou katkat bannann ki servi dan fey bannann ek son latet karang.

Se sa nou kiltir ki viziter i vin rode Mr Speaker. Ki Mosyon pe demande pou nou promote ek nou bann viziter. Ler nou pe ofer sa bann keksoz i ed nou pou osi promot nou artizan lokal. Nou pe osi ankouraz sa touris pou depanse. E sa reveni i pou al direkteman anver nou dimoun e nou artizanal lokal. E mon dakor ki nou bezwen fer plis pou ede promot zot.

Mr Speaker, an sa ki konsern lanvironnman Mahe ozordi i annan nou Zarden Botanik, i annan Kongo Rouz, Montanny Trwa Frer, *Mare aux Cochons*. Dan mon distrik i annan "*When Ships Come*", Praslin dan *Vallée De Mai* e petet lezot *trail* ki pa neseserman anrezistre ou demarke.

La osi i en travay ki bezwen ganny fer, pou mark sa bann *trail* ek bann siny pour ki ler sa touris i monte, i monte, e i kapab retras son semen pou li trounen e semen i kler pou zot pa perdi.

La Digue i annan Linyon Estate pour vizit torti, lo Silhouette i annan Zarden

Maron ki ankor dan son leta vyerz. E en moulen ek kalorifer lo Gran Barb kot bann vye kalorifer ki ankor pe debout an se moman.

Ki montre en parti nou kiltir ki mannyer ti moul koko pou ganny delwil, fer kopra e ganny pounak pou donn koson. En keksoz ki plizanpli pe disparet dan nou kiltir me i osi form par nou listwar.

Me selman Mr Speaker, dan bokou fwa ler touris i marse i ariv sa landrwa, i mank sa dimoun ki konn byen nou listwar pou donn li lenformasyon e parfwa menm akey li.

Sa i en keksoz ki demann revwar, parski ler bann touris i ariv dan bann sit parey, i bezwen ganny omwen en lakey e en leksplikasyon pou li konn en pe listwar sa landrwa, sirtou si napa en map ou be brosir ki eksplik en pe sa.

La petet Mr Speaker, en lot pwen ki mon ti a kontan fer resorti dan sa deba, se ki i annan sa mankman osi pou annan bann gid ki konn byen nou kiltir pou gid sa kliyan ver bann landrwa, oubyen kot bann aktivite ki i kapab eksplere ek nou kiltir.

E la mon panse ki Minister Touris i kapab reviz en pe bann brosir, ki i servi pou vann aletranze pou donn sa kliyan en avangou depi avan zot antre dan pei pou zot

osi met dan zot plan kote ki zot kapab ale pou zot ganny ekspoze ek sa kiltir Seselwa.

Mon osi mazine ki i tre enportan ki bann lotel i fer li en zot priyorite, pou ekspoz bann kiltir avek kliyan, oubyen ankouraz kliyan pou vizit bann sit leritaz ou landrwa pou manze sa bon manze Kreol e ede promot sa kiltir Seselwa.

Petet zot ti a kapab menm detanzantan annan en *Creole Night* dan lotel kot zot ekspoz kliyan ek manze Kreol parey sa bon pwason griye lo labrez, ek katkat bannann ki'n fer dan marmit, sa bon roti *pork* ek zerof bann keksoz parey bouden, graton, en bon moutay e gato mayok ou gato bannann e lezot.

Annan bann *band* kanmtole ki zwe, fer sa touris gout en pti kalou, delo koko ek lezot prodwi lokal parey en bon dite citronnel.

Mr Speaker, zis semenn pase mon ti pe fer en konversasyon ek CEO Francis, mon ti demann li akoz ki zot pa pe fer plis pou ekspoz bann kiltir, nou kiltir ek touris?

Kot mon ti pe dir li ki sa *show* ki Sesel ti fer ler ki UNESCO ti rekonnnet e adopte moutya koman en ladans kiltirel ki pou ganny prezerve.

Kot i enportan ki Minister Touris i travay ek bann etablisman e kontinyen

promot nou moutya parmi nou bann viziter.

Les dir Mr Speaker, kot zot kapab fer en manifestasyon nou kiltir tanzantan kekfw kapab fer lo nivo rezyon sak letablisman dan en rezyon i ganny donner en pe tiket dapre zot grander, kot zot vann ek zot bann kliyan e en lot zour zot menm kapab bouz lo bann lezot zil. Sa i pou ede promot sa laspe kiltirel parmi nou bann viziter.

Mr Speaker, i osi enportan letan ki nou pe ankouraz plis *cultural tourism* kot koman en pei nou osi bezwen fer tou pou nou fer sa kliyan kontan e pas en bon sezour, pour ki demen ler i retourn dan son pei i portre sa bon zimaz ki pou ankouraz lezot swazir Sesel koman en destinasyon.

Me i malere parfwa ki i annan bann move konportman ki sali zimaz Sesel. Sa i malgre Departman Touris ek Minister i kontinyen fer zot mye a sak loportinite ki zot gannyan pou vann Sesel koman en destinasyon.

Mr Speaker, wikenn pase mon ti pe koz ek en drayver taksi ki ti fer mon konpran ki parfwa i annan koripsyon ki pas lanmenm la anba lizye kliyan ki sali nou Sesel.

Kot en etranze ki travay lo resepsyon, sa kours ki i donn sa drayver taksi zot

bezwen donn li en *commission* lo la e si i pa ganny sa *commission* i pa pou donn sa drayver sa kours.

I dir kliyan tou i bezwen pey par li ki lo resepsyon e avan i pey sa drayver taksi i tir sa 10poursan. E bokou sa bann aksyon pe ganny komet par bann travayer etranze.

Mr Speaker, en bann aksyon ki pa donn sa bon zimaz.

MR SPEAKER

10 minit Onorab.

HON REGINA ESPARON

E bokou nou bann travayer Seselwa pe konplent sa bann kalite latitid.

Alor ler nou pe promot *cultural tourism* i enportan ki tou akter i vin *onboard* ki sa kliyan ki ganny sa satisfaksyon i ariv lo *airport* i pas en bon sezour e ler i lo *airport* pe retourn dan son pei, i deza pe reve kan ki i pou retournen. E kot i ale li osi i ede pou promot sa kiltir Seselwa kan in byen pase.

Mr Speaker, pou terminen mon sizere ki *Creole Rendezvous* ki ti ganny lanse le 27 Zilyet lannen pase lo Mahe *Freedom Square*, kot nou'n promot nou kiltir e osi bann antreprenner lokal, i enn ki bezwen vin en aktivite anyel.

Annou bouz li dan bann rezyon ek kominote, olye ki i reste en aktivite santral toultan. I enportan ki nou prezerv nou diber lo nou dipen pou nou fitir zenerasyon ek benefis nou lekonomi.

Avek sa detrwa mo Mr Speaker, mon pou donn mon sipor sa Mosyon. Mersi.

MR SPEAKER

Mersi Onorab. Onorab Aglae.

HON EGBERT AGLAE

Mersi Mr Speaker. Bonn apre midi tou sa ki a lekout.

Mr Speaker, Mosyon ki la devan nou pe demann Minister Tourizm pou ranforsi bann program ki relye avek devlopman nou kiltir fas a nou Lendistri Touris.

Mr Speaker, mon rapel osi ki mon ti anmenn en kestyon pou sey siport nou bann artis ki pe rod zot gannypen pou kapab valoriz nou kiltir isi dan sa Lasanble.

Mr Speaker, bokou in ganny dir lo sa Mosyon. Me selman parey Onorab Georges in fer resorti nou ti kapab koz lo sa Mosyon pou en semenn si fodre.

Me mwan mon get li avek en lot lizye, etandonnen ki mon'n osi konsilte avek plizyer nou bann artis, artizan bann ki dan lakiliner pou ganny en pe zot lopinyon lo lafason ki zot persiv, ki mannyer nou

kapab valoriz nou kiltir fas sa Lendistri Touris.

I bon konstate poudir ki Sesel i ganny rekonnnet dan lizye nou bann touris, koman en pei ki annan en zoli laverti, zoli lans, zoli lanmer ble e nou annan en nasyon ki sipoze akeyan e kapab enterakte avek. E Sesel i ganny gete koman en pei ki vremen *safe*.

Me mon ti a swete Mr Speaker, ki Sesel i ganny gete osi avek en lizye kot son kiltir i atiran pou nou bann touris. Sa i en eleman ki pou vremen enportan parey nou'n nonm bokou pei ki annan kot zot valoriz sa kiltir dan en fason tre o, e kot touris i al laba pou zot sezour, pou eksperyans sa kiltir fas avek bann lezot larsitek ouswa zot bann lanvironnman sa landrwa kot zot ale.

E si nou kapab arive met kiltir koman enn bann eleman enn bann pwen kle, ki en touris i kapab vin Sesel, byensir i pou annan en lepanouisman tradisyon kiltirel e sa lendistri dan li menm i pou fleri mon kapab dir. Me sa pa pe arive.

E letan mon pe get Mosyon Mr Speaker, Mosyon kantmenm i pa *binding* lo Gouvernman, mon ti a swete ki i *binding* me Mosyon i pe viz zis ver Minister Touris. E se la kot mon war i annan serten defayans kot nou bezwen

kapab tyonbo tou sa mayon ki atase avek nou Lendistri Kiltirel e nou tradisyon.

La mon pou koz byensir lo Departman Kiltir li menm, nou annan *NAC, National Art Council*, nou annan nou *Creative Industry* apre nou annan bann lezot sou-departman dan sa bann Minister menm ki sipoze pe ede edike e promot relev nou kiltir.

Me nou bezwen konpran en keksoz eski sa pe arive? Ki zistans nou'n arive ek sa? Ouswa akoz ki artis i ankor annan bann konplent ki dir zot pa pe ganny sipor, zot pa pe ganny bann debousman, zot pa pe ganny bann louvertir pou zot promot zot talan ki swa dan kiliner, ki swa dan lanmizik, ki swa dan skilptir, ki swa dan lapoezi, ki swa dan lapentir dan li menm.

Me kestyon ozordi ki artis pe demande, i bezwen kapab ganny reponn. E Minis ler ti vin dan Lasanble i dir i ti a swete pran tou - lo mon kestyon, pran tou bann artis met dan en lasal annou ekout zot.

Si nou fer letour lorizon Sesel ozordi, i annan en kantite artizan ki annan bann *skill* profesyonnel e menm bann ki nou rapel bann apranti ki pe aprann serten keksoz.

Me ki arive avek zot avek sa talan ki zot annan? Nou bezwen rod fason ki mannyer nou tyonbo zot; ki mannyer nou anmenn zot ansanm pou kapab fer relevans avek sa promosyon kiltir ki touris i ava *happy to see*, form par e osi depanse.

Parske i pou vin en lendistri, i pou depanse e sa kot nou pe koz lo valer azoute. So pour mwan letan mon tann Minis i vin koze in dir poudir nou ti a kontan - vre, en plan, en vizyon ki nou devlop kiltir dan nou bann distrik. nou bann tradisyon. Me i pa pou vin koumsa si nou pa *go back to the roots of cause itself*, pou nou kapab re met tou dimoun ansanm pou kapab fer sa vin en realite.

Mr Speaker, mon oule tous 2 pwen. Premyerman bann lobstak ki egziste ozordi dan domenn kiltirel, *ok?* E mon'n dir poudir i annan en kantite dimoun ki ti a kontan partisipe, met sa talan an viger e fer nou kiltir fleri.

Me enn bann lobstak enportan se zot bezwen annan en komansman pou kapab fer. E si nou pe koz lo la relev, ki mannyer nou kapab fer bann komansman sirtou avek bann zenn ki pa oubliye e dabor mon respe ban zenn ki pran.

Parey i annan en group zenn Beau Vallon i pe bat moutya, nou kontan. Me eski

nou pou zis kot ot laba lo moutya nou pa pou valorize? UNESCO in rekonnèt moutya lo nivo Sesel.

Me ki nou pe fer avek? Ki manner nou pe eparnye li en pe partou, pou donn li sa vre splander ki ler touris i vini lo sa kart ki met Sesel moutya i enn son plan lo son azanda pou vini? Nou pa pe kapab arive fer sa i annan en problem.

So nou bezwen kapab anmas sa bann keksoz premyerman par group bann artis ansanm, gete ki manner zot kapab ganny sipor. E la ler mon pe koz sipor i ava vin komans sa *fuel* pou relev sa lendistri dan li menm.

Mr Speaker, dezyenm pwen se ki manner nou kapab servi nou kiltir nou tradisyon pou valorize. E sa i en pwen ki medya i bezwen annan en rol enportan pou li zwe.

Medya, mon pou atas li avek ledikasyon. E sa Mr Speaker, i dwatet komans depi nou letan skoler sa, *ok?* La nou pa pe vin koz lo lesklavaz la, la nou pe koz lo bann keksoz ki pou anmenn pei sa lendistri, reveni pou nou kapab siport sa lekonomi.

E dayer i pou vize ver sa lekonomi pilye No.1 - touris. So pou nou kapab annan sa, i bezwen annan sa bann mayon depi son medya, depi son

ledikasyon e tou akter sa i enkli sa bann Departman Kiltirel ki egziste ozordi ki mon santi parfwa zot pe *operate in silos* dan en fason.

Lot eleman ki bann artis zot koz ou lo la se, ki fason pou zot kapab ganny resours. I annan plizyer manifestasyon dan lepase ki'n ganny fer kot i konsern aktivite kiltirel. Pli gran manifestasyon i Festival Kreol sa nou konpran; en fwa dan en lannen an Oktob.

Kot nou war tou dimoun ki anvi ouswa ki annan en lyen avek nou tradisyon, nou kiltir, i vini i anmenn zot partisipasyon, i anmenn zot bann proze ki zot annan, zot anmenn zot bann talan zot vin ekspoze sa dan en fason.

Me eski nou pa ti kapab petet dan en fason pou en lot, san esper en Festival Kreol kot dayer la i annan en Bidze ki ganny mete, anmenn li lo tou dilon lannen e tal li dan en fason - pa neserman lo menm lanpler.

E selman i ava kapab annan bann manifestasyon ki arive, nou koz lo Bazar Labrin ozordi in arete, nou ti annan nou Karnaval de Viktorya tousala i pa egziste ozordi. Me mon santi pou nou fer zistis Mosyon li menm li, nou pou bezwen *rethink the whole aspect of cultural tourism* isi Sesel.

E pou nou kapab fer sa premyerman, i bezwen komans depi anler. Tou bann ki annan responsabilite pou devlopman touris, devlopman la kiltir tradisyon dan Sesel.

Eski zot annan sa lanvi? Eski zot anvi kontinyen valoriz nou kiltir? Si larepons i wi, i bezwen annan en lanvi, *then* nou bezwen kapab annan en resours osi. Mon konnen poudir i annan pou dir pa depan lo Gouvernman.

Me lakle fasilitater dan sa zwe se Gouvernman - Gouvernman. E la ler in devlope ou a larg li avek sa bann akter ki zot, zot a form zot parey en lendistri, en biznes, pou zot kontinyen.

Nou pe koz lo Vilaz Kreol; bokou pei ou ale, letan ou ale ou al vizit en pe ou war poudir ou al dan en landrwa menm parey lo nivo Lafrik, ouswa menm lo nivo *UAE*, kot ou ale ou al get en prodwi ki zot annan, ki form par zot kiltir ki zot annan.

E laba ou pou etonnen bann kalite prodwi ki zot pe donn ou, ou pou napa swa e ou pou anvi aste mannyer zot fer zot *marketing* osi.

Be Sesel ou kapab annan en Vilaz Kreol ki a *operate* lo en baz le 1 Zanvyè ziska le 31 Desanm. Ki ava ganny siporte kot bann *DMCs* letan pe fer bann tour avek bann kliyan,

zot kapab vini. Lala fer sa *stop* la, laba ou pou ganny tou ou.

Ou ava war bann performans, i ava annan bann *schedule* bann program, a dir tel ler nou annan performans, ler manze, ler pou egziste bann tradisyon, bann diferan keksoz. I kapab ganny fer.

Me selman i bezwen vin avek en lorganizasyon kot tou mayon i bezwen zwenn.

MR SPEAKER

10 minit Onorab.

HON EGBERT AGLAE

Mr Speaker, pou fer zistis sa Mosyon, mwan mon santi poudir nou bezwen al en pti pe pli lwen akoz Mosyon pa *binding* lo Gouvernman. E mwan mon swete lo sa valer ki azoute avek, parey tou manm in eksprim zot lekor.

Pou konklir, mwan mon ti a kontan *move* en Mosyon pou nou *adjourn debate* anba *Order 23*, pou *call in* Sekreter Deta, Departman Kiltir avek tou son bann departman anba li, ki ava vin la devan nou e Minister Tourizm ava vin dir nou ki zot plan pou zot devlopman la kiltir ek tradisyon.

So Mr speaker, mon pe *move* ki anba *Order 23* nou *adjourn debate*, annou *call in* sa bann departman konsernen pou nou konnen ki zot plan. Si nou serye, si nou anvi. Mersi.

MR SPEAKER

Wi, Onorab Cosgrow.

HON WALLACE COSGROW

Mersi Mr Speaker. Mr Speaker, mon ti a kontan segonn sa Mosyon ki Onorab Aglae in mete.

An vi lenportans sa size ki nou pe koz lo la e sitan kantite keksoz ki bezwen ganny klarifye e eklersi.

E mon krwar i enportan ki nou ganny bann dimoun ki dan bann pozisyon enportan sirtou dan Gouvernman, pou kapab eksplik nou lo zot bann plan e zot bann komitman anver Sekter Kiltirel Tourizm, pou nou kapab pran en bon desizyon lo sa Mosyon. E fer war komitman Gouvernman lo sa Mosyon. Mersi bokou Mr Speaker.

MR SPEAKER

Tre byen. *Well*, i annan en Mosyon ki'n ganny fer anba *Order 23* e in ganny segonde.

Mon konsiderasyon mwan se tou senpleman se si i pa al kont lentansyon sa dimoun ki'n met son Mosyon orizinal. Me alor mon a met sa devan Lasanble.

Mon pou permet loter Mosyon orizinal adrese, mon a osi permet, *ok* nou a pran enn sak kote e apre nou a kapab vot lo sa deba. Onorab Henrie oule adres sa?

HON GERVAIS HENRIE

Mersi Mr Speaker. zisteman mon ti pe demann ou si ou pou permet nou annan en *brief debate* omwen.

MR SPEAKER

Wi.

HON GERVAIS HENRIE

Lo lentansyon Lopozisyon pour *adjourn the debate* baze lo zot Mosyon ki zot in mete. Mersi.

MR SPEAKER

Ou kapab adrese?

HON GERVAIS HENRIE

Wi, mon prezimen prezantater i bezwen eksplike akoz i pe *move*.

MR SPEAKER

Me in eksplike. In fini eksplike. Oule repet ou lentansyon Onorab Aglae pou fer kler?

Wi, *ok*. Be non, non. Segonder i zis segonde li pa bezwen soz, si i oule adrese akoz i kapab adrese lo son kote dan sa ka kekfwa nou a kapab pran 2 manm sak kote e nou a pran en vot.

Mosyon in fini, Mosyon Onorab Aglae i kler se pou anmenn Lotorite ki konsernen pou eksplik zot program zot pozisyon.

Onorab ki'n segonn Mosyon oule azout keksoz lo la?

HON WALLACE COSGROW

Wi Mr Speaker. sertenman mon ti a kontan azout serten keksoz lo sa ki mon'n dir ler mon'n segonde.

Mr Speaker, parey mon fer resorti sa Mosyon ki devan Lasanble ki'n devan Lasanble pa sa enn ki nou pe debat lo la, me sa enn ki ti ganny prezante avan, i enn ki bokou dimoun i annan lentere ladan sirtou par egzanp bann akter dan Lendistri Touris. E sirtou bann akter dan Lendistri Kiltir, lar, *performing arts* ouswa lar vizyel ou menm bokou Seselwa ozordi ki pe investir dan Sekter Touris.

Par egzanp taler nou'n tann Onorab Georges koz lo bann pti *guest house*, bann pti restoran, bokou bann dimoun ki pe investir ki'n deza investir.

E bann ki petet dan lefitir i anvii investir mon krwar zot ti ava kontan konnen petet ki plan Gouvernman, an sa ki konsern sa Sekter Tourizm me selman sa sekter spesifik *cultural tourism* pour ki zot kapab vwar pli byen vizyon Gouvernman dan sa sekter.

Akoz si mon kapab refer Mr Speaker lo bann promes ki Gouvernman ti fer ver elektora ver pep Seselwa an se ki

konsern *Cultural Tourism*, an se ki konsern kiltir an zeneral.

E sa bann promes ti ganny fer dan zot bann *manifesto*. La mon pou nonm par egzanp Mr Speaker, ler nou pe koz lo, ler nou pe koz Mr Speaker lo, en pti moman mon pe zis rod li in sape lo mon *computer*.

Ok Mr Speaker, wi, ler nou pe koz lo siport bann klib ek bann lasosyasyon, i en promes ki ti ganny fer. E nou anvii konnen ozordi kwa ki Gouvernman pe fer *or* ki plan Gouvernman pou kapab siport bann klib ek bann Lasosyasyon Kiltirel Tourizm, pour ki zot kapab annan en par dan sa gato tourizm ek kiltir.

Ler nou pe koz lo pou *secure* bann *livelihood* bann artis ek bann *performers*. Sa bann promes Mr Speaker, bann promes ki'n ganny fer atraver lekritir la ki mon pe gete mon pe lir avek bann *performers* avek bann artis ki ti pou annan, ki ti pou ed zot *secure* zot *livelihood*.

Be eski sa ozordi Mr Speaker i pe arive? So pou nou donn zistis sa topik ki devan nou, mon krwar i enportan ki sirtou parey Onorab Aglae in dir Sekreter Zeneral pou Kiltir Mr David Andre, i kapab vin donn nou en serten leksplikasyon lo kwa ki zot pe met devan, ki bann plan ki zot

pe vin avek pou kapab zisteman *fulfil* sa promes ki zot ti fer avek Pep Seselwa.

Nou'n koz osi taler i annan dimoun ki'n koz lo - i annan manm ki'n koz lo en *Art Gallery Museum*, tousala sete bann promes Mr Speaker.

Nou'n koz lo annan en Lavil Viktorya, en Lavil Viktorya ki vibran ki viv Kreol zisteman koman Mer Lavil, Mer Lavil i a kapab dir nou ki son plan pou lavil e nou prezan nou a kapab debat lo sa Mosyon fer zistis sa Mosyon Onorab Deshiela Bastienne avek bann lenformasyon ki nou'n gannyen avek bann lotorite.

So avek sa Mr Speaker, parey mon'n dir mon pou siport Mosyon Onorab Aglae pou nou *adjourn debate* e pou nou kapab ganny leksplikasyon bann eksper avek bann dimoun dan Lotorite pou nou kapab pran en pli bon desizyon. Mersi bokou Mr Speaker.

MR SPEAKER

Mersi. Mon krwar 5 minit i devret ase pou adres lo sa. Onorab Henrie, ou kapab annan laparol.

HON GERVAIS HENRIE

Mersi Mr Speaker. Bonn apre midi tou dimoun, sirtou bann dimoun Mont Buxton ki a lekout.

Mr Speaker Lopozisyon pe demande ki nou *adjourn* sa *debate* pou kriy bann teknisyen sorti dan Departman Kiltir avek Tourizm.

Zot pa pe sezi lesansyel sa Mosyon, sa Mosyon i en swe Lasanble Nasyonal pe demann, e pe ankouraz keksoz ki deza pe ganny fer, demann i lo Seselwa, dimoun dan kominote kot nou, nou reprezante, e zot pe swiv sa deba, i annan en kantite nide ki pe sorti.

Donk, i pa parey bann lezot Mosyon kot letan Gouvernman li pe fer en keksoz pou nou respekte poudir sa i ti en desizyon administrativ Brans Egzekitiv, alors zot vin eksplik rezondet zot aksyon ki zot pe pran avek piblik Seselwa e pa Lasanble ki pou eksplike.

Toultan nou, nou'n pran sa desizyon koumsa. E sa Parti la ki pe demande, sak fwa letan nou anmenn teknisyen zot in taye, la akoz zot oule anmenn teknisyen, ki zot lentansyon?

E zot in toultan dir zot pa fye nou, be ki mannyer 5er diswar nou pou fye en parti ki napa en plan pou anmenn teknisyen la anndan?

Nou krwar poudir zot pe zis *delay* nou swe, zot pe zis anmenn en taktik retard nou travay.

E alor Mr Speaker, sa ki nou pe fer nou pe dir avek bann dimoun laba deor i nou swe ki zot koman nou bann *constituent* ki nou reprezant zot, zot, zot pran en rol pli aktiv.

Sak dimoun dan sak distrik regard otour li ki mannyer li i kapab partisip dan sa konseps *cultural tourism* ki Gouvernman pe sey promouvwar e se sa ki nou pe dir nou pe ankouraz Minister Tourizm pou kontinyen avek sa program e demann tou Seselwa pou zot vin pli aktiv e inovativ.

Savedir si i annan dimoun ki nou pou kriye pou vin la devan se Lepep Seselwa, be eski nou kapab fer sa? Nou ki pe reprezant zot. Donk lo nou kote non, nou pa dakor avek sa propozisyon e nou ti ava demande ki nou pran en vot. Mersi Mr Speaker.

MR SPEAKER

Mersi. Anfen, mon krwar kontinyen deba lo sa Mosyon ki'n ganny prezante i pa pou vreman anmenn okenn valer. I pou depan lo lentansyon bann Manm Lasanble.

Si manm i siporte napa problem, me selman nou pa kapab kontinyen debat lo la. Alor mon ava apel manm pou vot lo Mosyon. Manm ki an faver?

(comments off-mic)

MR SPEAKER

Onorab be ou'n fini prezant ou Mosyon ou. Yes, bon. *Order!* Manm ki an faver lev lanmen silvouple? Manm ki kont? Mersi.

Lo Mosyon pou *adjourn debate* dan Lasanble anba *Order* 23, 10 manm in vot pour, 20 manm in vot kont, so sa Mosyon in ganny rezete. Nou a kontinyen avek deba lo Mosyon orizinal. Mersi.

(comments off-mic)

MR SPEAKER

Atann, non. *Ok* Onorab Aglae ou'n fini kontribye lo sa Mosyon anba *Order* 23(5). So nou a kontinyen avek Onorab Porice.

HON DOYACE PORICE

Mersi Mr Speaker. Mosyon anmennen par Onorab Bastienne i enn ki vreman enteresan kot i pe demann Minister Touris pou kontinyen avek son *cultural tourism* e devlop plis ankor.

Kot mon distrik Baie Ste Anne pa'n ganny eparnyen. Akoz mon dir sa? Set akoz bokou touris ki vin Praslin ki lokal e osi enternasyonal. Parey nou konnen ki nou lekonomi i baze lo la. E ziska Mars 2024 nou'n annan 92 mil

touris ki'n antre Sesel, menm si i annan nou ki pa krwar.

Mon'n swiv sa de pre. Mon'n menm vwar bato *Cat Cocos* ek *Cat Roses* kantite ki zot anmennen sorti Mahe e osi La Digue. Nou pa bliy osi bann *cruise ship* ki vin Sesel. Nou gran lotel e osi bann pti *guest house* i benefisyè.

E mon pou dir ki zot fer byen e osi zot pe donn sa bon servis, e parfwa zot anmenn sa kiltir Sesel. E mon santi ki zot bezwen anmenn plis ankor. Me petet Pralinwaz nou bezwen anmenn plis prodwir pou atir sa bann touris.

Praslin nou annan bokou lespas pou anmenn nou *cultural tourism* pour ki touris i kapab depans plis larzan an regardan e osi partisipe.

An plis, ki kot bann lotel *guest house* bann *tour* dan bann *trail*, *Vallée De Mai*, Fond Ferdinand mon krwar ki nou bezwen annan plis ki sa ankor.

Tou resaman nou'n vwar en aktivite randevou Praslin ki ti anmenn bann pti biznes ansanm e ti atir bokou touris, ki vremen enteresan. Zis petet nou bezwen bouz sa aktivite dan lezot parti sa distrik lo Praslin sirtou kot i konsern kiltir nou zil.

Byento petet nou pou vwar en komansman dan Cap Samy apre ki nou'n tann nou Prezidan ek son Minis

konsernen laprouvasyon plis pti biznes i pou dan sa plas Cap Samy. Kot nou ti a kontan war en sanzman. Kot nou pou vwar touris pe partisipe zis parey en vilaz kiltirel, *sports*, *tourism*, eksetera.

Kot touris pou osi vwar manze Kreol, diferan *sports* lo later e lo lanmer. Akoz pa tou lotel lo nou zil ki fer manze Kreol e lezot aktivite kiltirel dan zot letablisman.

Nou ti a kontan vwar osi travay artizanal e lezot pti aktivite ankor, ki pou atir nou touris lokal e osi enternasyonal.

Mr Speaker, parey nou konnen ki nou annan en bazar legim ek fri e osi i annan peser ki koste ek zot pwason. Akoz sa sit i o bor lanmer ki nou, nou krwar i kapab anmenn plis sa laspe kiltirel.

Mon kapab dir ki sa Mosyon in vin dan en bon moman kot i pour anmenn plis benefis endividyel pou bann Pralinwaz e pei an antye.

E la mon pou sipliy avek Pralinwaz, pou anmenn plis prodwi e aktivite kiltirel pou atir plis touris lo nou zil.

Avek sa bann zoli devlopman lo Praslin spesyalman Baie Ste Anne serten bann biznessmenn pe mazin bouz lo sanz fason fer biznes e zot santi ki lavi pe evolye e zot anvi war sa sanzman.

Atir plis touris sirtou kot i konsern pre ek lanmer. Pour nou Pralinwaz nou apresye nou viziter lo nou zil.

Touris lokal ouswa enternasyonal. Sirtou ler bann lotel ouswa *guest house* pe fer promosyon bann bon *package* ki lafanmir i vin en pti vakans e gout sa bann pti latous kiltir Kreol lo nou zil. Sirtou manze, kalou eksetera.

Mr Speaker, mon rapel lontan ler zot vin Praslin zot aste bokou e retourn Mahe ek gro, gro sak, gro kes karton. E pou en pe letan pa parey e menm apresye sa kiltir. Me la Pralinwaz i anvi retourn sa ankor atraver anmenn plis keksoz pou dimoun aste.

Mon osi mazin nou santer ek mizisyen Pralinwaz sirtou bann mizisyen tradisyonnèl, kot sa osi nou ti a kontan ki bann lotel ek bann lezot pti *guest house* i anmenn sa bann dimoun pou *entertain* zot bann kliyan.

I fer mwan mazin nou moutya, kot nou annan plis ki 2 group lo Praslin kot ler i annan en levennman nasyonal ou war zot pe *entertain* partou. Sirtou lo Lasose Ero kot touris pe vini ouswa pe ale, e touris i byen apresye sa.

Zot *entertain* ziska zot anbarke. Tousala nou bezwen ankouraz zot pou kontinyen. Pa tou group ki ganny sans perform dan lotel, menm parey

avek bann *band* tradisyonnèl lo nou zil. Nou ti a kontan vwar sa bann fason fer, manze Kreol parey lontan lo en touk dife.

Sa ki pou atir plis sa akse kiltirel lo nou zil ouswa nou pei.

Prenon kont lenportans Mosyon, alor nou pe demann Minis Touris pou kontinyen siport nou Lendistri Touristik, pou anmenn plis *Cultural Tourism* kot pour anmenn plis biznes kot nou tou nou a benefisye e osi touris pou kontan pou retourn dan nou pti pei Sesel.

Avek sa 2 mo, mon pou siport sa Mosyon. Mersi.

MR SPEAKER

Mersi Onorab. Onorab Uranie.

HON ROCKY URANIE

Mersi Mr Speaker. Mon konnen i tar. Bonn apre midi tou bann koleg Onorab. Bonn apre midi tou bann akter dan domenn tourizm e kiltirel.

Mr Speaker, parey nou konnen nou tou ki tourism i sa lendistri, sa premye pilye nou lekonomi ki nou tou nou depan lo la e sa nou tou nou konnen.

Ozordi Mosyon ki devan nou se ki i pe demann plis langazman, Minister fodre i angaz li plis ki bann lezot partner pou angaz zot plis dan *cultural tourism*. Savedir fer

bann kliyan aprann nou kiltir, valoriz nou kiltir en pe plis pou zot ganny plis fason detann ler zot vin isi Sesel zot apresye sa leksperyans.

Mr Speaker, mon zil i enn bann landrwa tipik kot nou tant pou gard tradisyon e osi bann valer kiltirel. *Cultural tourism* i pa nouvo Sesel in toultan la. Me petet nou pa ti vreman pe kriy li parey la *cultural tourism*.

Me in toultan la ler touris ti vini Sesel dan preski tou bann pti *guest house*, bann pti lotel ti annan bann pti latroup kiltirel, ladans ti annan bann si resital, ti annan bann *band*, moutya eksetera.

Ti annan bann manze Kreol, bann degistasyon ki touris in toultan apresye. Me avek sa devlopman dan touris ki'n vin sitan rapid akoz nou'n fer en bon travay pandan 43 an nou'n pous sa lendistri tre o, lo en tre o nivo.

Bokou dimoun in antre ladan e zot in konstri bokou lotel e *guest house*, ki bokou dimoun in ganny zot larises ozordi, ki fer ki sa ki pe tenir nou lekonomi.

Mr Speaker, ler nou koz kiltir sa i en mo ki vas, i gran, i en konpri depi parey nou dir ladans, lanmizik, *art*, lakwizin e osi fason viv nou dimoun dan zot lavi kotidyen toulezour sa osi i form par nou kiltir.

Ki nou vwar Mr Speaker, nou tann bokou koze lo la me bann dimoun zot santi zot menm ki napa ase sipor ki sorti kot Minister oubyen bann lezot lenstitisyon pou siport zot ase, pou zot kapab anmenn sa *cultural tourism* parey i devret ale.

Mon'n vwar lansman randevou Digwa kot bann Digwa i ganny sans vini, vin vann en pe manze Kreol.

Me nou war en mankman apre sa, parey bann ladans, bann lezot aktivite ki bezwen ganny fer pou fer touris aprann en pe nou bann tradisyon parey nou bann zwe Kreol, tousala in preski fini perdi, napa.

Mr Speaker, ler nou koz lo *cultural tourism* en bout ki nou bliye se ki lafason ki Sesel i vann i ganny *market* lo nivo enternasyonal, kot i konsern *cultural tourism* li menm Sesel pou ankouraz zot vini. Mon krwar sa bout i napa.

Ki zot pe fer? Pou mwan i annan en mankman zot *advertise* plito nou soley, nou lans, nou delo sale. Me apre sa apre trankilite. Me zot pa vann sa vre Sesel ki mannyer i ete pou mwan letan mon asize mon regarde.

Akoz ou vwar ki ler, sirtou ler mon pran mon zil par egzant kot i annan bokou pti *guest house* ek lotel sa i

dan kominote parmi bann dimoun.

E ki nou vwar se ki kliyan li in ganny *advertise* trankilite dan paradi. Me o bor li lanmenm, kot i ete i annan *housing estates*, i annan bann lakaz bann dimoun prive.

En pti baba i plere pou li sa i en gro problemm, ou konpran. En dimoun bann fanmir i zwenn ansanm, akoz i form par ou kiltir, zot zwe en pti domino i vin en problemm. Ou ganny mwan?

So kliyan pa pe vremen ganny sa ledikasyon, nou pa pe *advertise* sa Sesel byen pou montre zot poudir be dimoun, i annan dimoun ki viv la, sa bann dimoun osi i annan en serten lavi.

So alors i enportan ki tou bann akter i zwe en rol enportan pou eksplik en pe zot bann kliyan ki ler nou pe vin Sesel, ler nou pe ariv kot nou *guest house*, ki ler ou pe vann ou *guest house*, ou pe vann ou *guest house* parey i ete avek tou keksoz ki ou annan dan zalantour ki touris i ekspekte vwar.

Akoz i dan nou kiltir kot i annan dimoun i kontan sonny en zannimo. Par egzanz en lisyen i zape dan lwen, en kliyan pou li sa i en problemm; i en problemm i afekte li akoz dapre li i pa'n ganny dir in ganny dir i pe vin dan en landrwa kot i sipoze annan

trankilite, ou ganny mwan. Ou konpran?

E sa i kre bann konfli ennler dan bann kominote e mwan mon konnen sa i pase ennler lo mon zil. Alors Mr Speaker, so nou bezwen vremen gete ki nou vann ler nou pe vann Sesel.

Nou pe koz *cultural tourism*. Ler Onorab Aglae ti pe demann bann sekter pou vini par egzanz i annan rezon anmenn sa Mosyon pou *adjourn debate* pou anmenn sa bann dimoun la devan.

Mon vwar son nide akoz i ti pe sey fer sa, akoz par egzanz si ou pe get domenn lapas, par egzanz nou annan bann touris i vin isi vre touris i al lapas me i pa nou kiltir lapas ek *fishing rod*, i pa nou kiltir.

Nou kiltir lapas avek laliny, me kliyan i vini i al lapas ek *fishing rod* wi, i kontan lapas i deza pe lape ek *fishing rod*. Me eski i annan sa koze avek bann peser ki servi mini Mahe, ki al lapas toulezour avek laliny, ki al lev kazye ki dir zot, zot kapab fer kliyan ganny sa leksperyans?

Eski zot pou bezwen en lot *licence* apard zot *licence* lapas? Eski zot pou bezwen en *special licence* pou zot kapab pran kliyan en zour anmenn zot vwar ki mannyer i lev kazye? Anmenn zot ki mannyer i lapas avek en

laliny? Akoz *fishing rod* i pa nou kiltir me nou fer li.

E tousala in vin avek bann devlopman rapid dan nou pei ki alors nou bezwen annan en konversasyon pli larz pou gete kote ki Gouvernman i antre li, ki son plan vizavi devlopman *cultural tourism*.

Mon konnen i en keksoz ki nou tou nou bezwen zwe en rol, me dimoun i bezwen konn plan Gouvernman ki bor i pe ale avek sa. Nou pa zis dir tou dimoun dan kominote pran ou responsabilite.

Dimoun pe seye pran zot responsabilite, me ennler i manke, i manke serten keksoz pou anpar zot, pou ankouraz zot, pou zot konn vreman kler ki plan Gouvernman konsernan *cultural tourism*.

Nou vwar, nou vwar La Digue i annan Masezarin ki fer moutya, nou annan bwa ver ki fer moutya. Nou annan *band* i pa vreman en *band* tradisyonnèl, me nou en *band* ki kapab zwe en pe lanmizik tradisyonnèl. E lanmizik modern.

Me parfwa i mank serten debousman. Nou ti a, zot ti a kontan petet vin dan bann lezot gran lotel, Mahe, Praslin pou zot vreman ganny sa *exposure*. Me eski sa bann gran lotel in ganny fer konversyon avek vreman, pou gete ki mannyer pou pran sa

bann loportinite ki nou dimoun lokal i annan?

Nou ti a kontan petet, la i en konversasyon ki petet Departman Kiltir ansanm ek *Tourism* i kapab fer, pou anmenn sa diskisyon lo en lot nivo avek sa bann gran operater ki sa bann pti dimoun, sa bann artis la deor i a kapab vin performen, donn zot en *proper night life* lo nou zil.

Par egzamp ler ou pran lans, lans dan lazournen La Digue tou lans in *saturated* ozordi. Pou Seselwa ganny en pti pans lo lans i vreman, vreman difisil. Nou bezwen lager pou ganny en pti plas lo lans, akoz touris zot s *spread across* partou zot in pran partou.

E ou dan nou kiltir nou, nou ti kontan letan nou al lo lans nou defoule nou - parey nou dir nou rikannen lo lans nou *enjoy* nou tire sa bann presyon, me nou pe nepli kapab fer li, akoz touris pa pe vreman aksepte sa li.

Akoz ki i pe vin rod soley, lans ek delo sale. I pa anvi tann ou pe zwe en pti lanmizik lo lans li. Pou li sa i en *disturbance* i pou al konplent.

Ou konpran mwan? E nou'n vwar plizyer fwa partou Au Cap ler dimoun i vini petet i annan ki egzazere.

Me Au Cap konbyen fwa nou'n tande konplent. Akoz

?Seselwa pe, touris pa pe konpran poudir be nou annan serten kiltir zot bezwen ganny met azour avek zot osi ki ler zot vin isi zot bezwen kapab aksepte nou kiltir.

Par egzanp nou koz bokou lo Linyon Estate.

MR SPEAKER

10 minit Onorab.

HON ROCKY URANIE

Linyon Estate Mr Speaker. nou ti annan moulen koko, me ozordi ek konplent i annan bann lorganizasyon enternasyonal sirtou bann touris menm.

Saret ek bef, zot konplent *cruelty to animals* i annan keksoz ki bezwen arete. Ou konpran? Olye nou fer zot konpran poudir be nou annan en kiltir nou annan en tradisyon, ki ou vin isi ki nou anvi vann ou. Me li pou li i war sa en lot fason, ki ou war ou prezan sa bann keksoz i limite.

Ozordi nou'n arive annan zis 1 saret. Mon tir mon sapo avek Mr Danny Jeanne ki ankor pe fer maryaz. Touris pe ale dan saret. I ankor la e zis li ki pe tenir. Pou fini perdi sansan. Me nou pe koz, nou pe koz kiltir.

So nou bezwen refer sa bann konversasyon. Linyon Estate moulen ti marse avek bef, tousala in ganny fer tire. Sa bon delwil koko, nou

bezwen komans fer touris vwar ki mannyer sa delwil koko i ganny fer.

Ki zot servi zot al bor lanmer avek pas lo zot i pli bon petet ki sa bann kalite kemikal ki enporte.

MR SPEAKER

Onorab terminen silvouple.

HON ROCKY URANIE

Mersi Mr Speaker. So mon ava terminen. Me selman sanmenm sa mon pe eksplik en kou akoz sa Mosyon Onorab Aglae pou *adjourn debate* pou anmenn bann dimoun la ti vreman enportan.

Akoz Onorab Georges menm in dir ki sa nou bezwen debat pres en semenn. So alors mwan mon pou siport Onorab Aglae pou anmenn sa Mosyon ki sa *debate* i bezwen anmenn pli lwen ki sa.

Kriy bann dimoun konsernen fer zot vin la nou a konn vre plan ki zot annan pou *cultural tourism*. Mersi Mr Speaker.

MR SPEAKER

Mersi. Onorab Sandy Arissol.

HON SANDY ARISSOL

Mersi Mr Speaker. Bonswar tou dimoun ki pe ekout nou. Mr Speaker, letan mon ti pe lekol Dominique Savio avek, apre mon ti desann St John Bosco bann letan Berta

Camille, Mericide Sauzier, Claudia Chetty, Helene Prosper, Franky Gonthier, toultan sa bann ansennyan ti demann nou kwa ki nou anvi vini letan nou gran e souvandfwa bann fiy zot sa bann letan zot ti atase avek 2 karyer; sa sete *air hostess* sa letan zot ti apel li apre *tourist guide*.

Bann garson nou, nou ti plito asosye nou lekor avek bann travay ki annan pou fer avek liniform, solda, en zofisye lapolis, pilot bann keksoz koumsa.

Mon komans koumsa parske letan dan lekol ou komans deza pe enstri ou lekor ki ou ti a kontan vini, mon krwar i ede dan travay ki ou anvi fer ler ou vin en adilt.

Parske Mosyon Onorab Deshiela Bastienne en bout son Mosyon i dir e demann tou Seselwa pou vin pli aktive e inovativ dan sa sekter ki annan gran potansyel.

So kestyon ki mon demande, eski letan ki nou pe koz Minister Tourizm dan nou pei eski i konpri tou dimoun? Oubyen tourizm dan nou pei ozordi nou asosye li zis avek Minister Tourizm avek bann zofisye ki travay avek sa Minister, oubyen avek sa lofis?

Eski tourizm letan nou ti pe grandi, parey nou'n ganny dir nou'n ganny antann la poudir i en diber lo nou dipen

e lekonomi nou pei, e ozordi mon kontan nou ganny sa posibilite pou nou ganny sa Mosyon ki koz lo tourizm.

Parske nou a rapel byen, e Mr Speaker nou ti ganny tape avek *COVID* e si *airport* pa ti ouver kekfwa nou pa ti pou la pe fer sa kalite konversasyon.

Alor pou sa mon bezwen felisit mon Gouvernman pou pran en desizyon serye pou nou reouver nou *airport* menm avek difikilte nou ti pe pas atraver pour ki plis touris i antre dan nou pei.

Nou bann pti dimoun ki'n pran bann *loan*, bann pti *guest house self-catering* ki mon annan en kantite Bel Ombre; bann Lendistri Tourizm zot kapab epanouir, fer zot biznes agrandi, kontinyen anploy plis Seselwa e kontinyen anmenn nou Lendistri Tourizm kot i ete ozordi.

E pa bliye *US* pa ti an faver nou ouver *airport*. Me Minis Derjaques ti dir nou en keksoz yer letan i ti dan Lasanble Nasyonal. Ziska le 24 Mars sa lannen Mr Speaker 93 mil tourizm in antre kot nou. I en lakonplisman sa pou en lannen.

E ozordi nou'n ganny dir pou annan plis lotel pe ganny konstrir dan pei. Nou annan plis pti *guest house* ki pe ganny konstrir e i annan plis

dimoun ki enterese pou *turn* zot lakaz, oubyen en pti bout kot zot reste dan en *self-catering* pou akey touris.

Parske zot vwar poudir i annan en potansyel e i anmenn en reveni zot osi zot kapab fer en kontribisyon dan lekonomi nou pei.

E Bel Ombre mon distrik kot mon ete, pa'n ganny eparnyen Mr Speaker, nou en distrik touristik. Nou annan plizyer bann pti *guest house*, nou annan plizyer gran lotel parey mon'n dir e dimoun i kontinyen, touris i ranpli dan nou distrik.

Me letan Mosyon Onorab Deshiela Bastienne i demande ki Lasanble i ankouraz Minister Tourizm pou kontinyen avek program *cultural tourism*.

Letan nou pe koze la i annan *cultural tourism* Mr Speaker. Bel Ombre dan mon distrik i egziste.

Letan Etablisman Touristik i pran en group, tou son kliyan i anmenn lo por Bel Ombre, i pran en pti bato lwazir e i anmenn son kliyan lapas en karang, i en *cultural tourism*.

Aprè sa kliyan i ganny posibilite pou li al Anse Major parey Onorab Romain in koz lo la pou li griy son pwason, aroz limon lo la, met en fiyapen o bor, bwar en delo koko tann. I apel *cultural tourism* ki pe arive

dan nou pei dan Distrik Bel Ombre ozordi.

Letan Daniel avek son lekip i organiz en moutya en Dimans swar 5er o bor La Plage e ou annan Seselwa avek bann touris i koste e zot apresye sa. I apel *cultural tourism* sa.

Letan ou annan en group kliyan ki son lotel, oubyen son letablisman, oubyen son *guest house* i organiz bann *hike* swa Dan Gala *trail*, swa Anse Major, swa Mare Au Cochons i apel *cultural tourism*. E se sa ki Mosyon Onorab Deshiela pe demande pour ki nou ankouraz plis sa.

Alor Mosyon pe dir si ou, ou santi poudir i annan en keksoz ki ou kapab ofer touristik-man avek bann lotel, *guest house*, silvouple i mars 2 kote. Pa asiz dan lakour dir ou kapab fer kazye e ou kapab fer pannyen e personn pa vin kot ou.

Me ou osi i ou posibilite la pou ou vin devan. Fer konnen ki kalite prodwi ou osi ou kapab vann, ou kapab vin devan pour ki ou osi ou partisip dan sa *cultural tourism* ki Onorab Deshiela pe demande pou nou kontinyen annan dan nou pei Mr Speaker.

E mon krwar sa i en bann keksoz pozitiv, parske i montre poudir dan distrik i annan en kantite keksoz

pozitiv pe arive e sa i fer ki lekonomi pei i kontinyen epanouir e kot tou dimoun i santi li pe fer son kontribisyon, an relasyon avek sa ki Onorab Deshiela pe demande dan son Mosyon.

E mon krwar Mr Speaker, dan tou bann distrik sakenn i annan son fason fer, nasyonanman i annan zot fason fer. Me selman an menm tan nou bezwen rekonnet letan bann difikilte ki bann letablisman touristik zot in pas atraver letan *COVID*.

E mon swete i annan zot in rekipere. Zot in nobou kapab retourn dan sa fason normal parey zot ti ete avan. Parske mon ti osi okouran ki espesyalman bann ki ti en pe pli pti, zot ti pe, letan *COVID* zot ti pe fer fas avek en kantite difikilte spesyalman avek repeyman zot bann *loan*.

E mon swete ki bann negosyasyon, bann koze in ganny sans ed zot, pour ki zot kapab retournen pou zot kontinyen fer sa kontribisyon an relasyon avek sa ki zot in swazir pou fer pou nou pei se bann keksoz pozitiv Mr Speaker.

E mon krwar i annan en kantite keksoz ki'n resorti aswar. Be selman i enportan pou nou kontinyen ankouraz bann lotel e ankouraz nou bann Seselwa ki pran en karyer dan tourizm.

Parfwa nou tant pou get sa lotel, me nou pa get sa Seselwa ki pe fer sa kontribisyon dan sa bann letablisman touristik. Parske sa osi i osi anmenn son bout *cultural tourism*.

E la mon pe ankouraze letan mon'n tann lezot mon bann koleg in koz an relasyon avek nou bann artis Seselwa. Bel Ombre mon annan en kantite artis Seselwa ki'n *perform*, ki ancor pe *perform* oubyen ki pe rod bann landrwa pou li kontinyen *perform*.

Alor Mr Speaker, mon krwar sa osi i bann koze ki nou kapab fer pou nou kontinyen ankouraz sa *cultural tourism* pour ki letan bann lotel i ganny fer i ganny devlope i annan bann laranzman pour ki bann Seselwa i *perform*.

E i osi annan bann laranzman pou nou get bann groupman ki nou annan dan distrik, bann groupman kiltirel.

Parske souvandfwa mon rapel letan Berjaya Beau Vallon Bay ti ancor *Seychelles Hotel*, mon rapel ti annan en fame group ki ti apel *Happy Islanders* ki ti al *perform* laba e lotel ti plen parey nou dir.

E ozordi dan bann distrik nou annan bann pti groupman i pe fer ekstrememan byen e i annan enn de bann groupman ki'n ganny mansyonnen an

relasyon avek sa. So pou nou ankouraz bann lotel dan sa fason, pou zot osi kapab fer zot bout pou ankouraz bann dimoun ki enterese pou fer sa *cultural tourism*.

Mr Speaker, Bel Ombre nou lo bon semen, nou pe fer bann keksoz touristik, nou form parti sa program *cultural tourism* e Onorab Deshiela pe demann nou pou kontinyen e nou Bel Ombre avek lezot distrik nou pou kontinyen fer sa.

E alor nou pe demann tou sipor neserer avek Gouvernman, Minister Tourizm, pou gete kwa ki nou kapab ed nou pou nou fer bokou plis e pou nou kapab fer pli byen pour ki touris i kontinyen vin Bel Ombre, fer plis larzan.

Pou nou kontinyen reste sa zoli distrik pou nou kapab fer nou kontribisyon nou osi dan lekonomi nou pei, pou epanouisman nou bann zenn e Lepep Seselwa an zeneral.

Mr Speaker, avek sa detrwa mo, mon ti a kontan montre sipor pou Mosyon Onorab Deshiela Bastienne e zet sa Mosyon ki'n ganny propoze apre. Mersi bokou Mr Speaker.

MR SPEAKER

Mersi. Onorab Cosgrow.

HON WALLACE COSGROW

Mersi Mr Speaker. I preski 5 er edmi la mon ti a kontan fer mon kontribisyon lo sa Mosyon.

Me mon ti a kontan met lo rikord ki mon *maintain* ki mon krwar poudir, pour ki nou kapab fer sa deba pli enteresan e enn ki pli enforman, ti ava neserer annan serten lesplikasyon sorti kot bann dimoun ki neserman fer Polisi e fer plan stratezi pou sa de sekter sirtou Tourizm avek Kiltir.

Me malerezman nou demann pa'n ganny aksepte par mazorite laba e bann dimoun ozordi ki pe swiv nou bann artis bann dimoun ki *involve* dan Lendistri Touris, zot ava realize ki poudir sa Parti lot kote laba in preski dir fini perdi, *you've lost the plot* parey Angle i dir.

Mr Speaker, an di-z-an sa, ou konnen *sun, sea and sand*, soley, delo sale, disab i en prodwi ki nou'n vann pou en bon pe letan e ki petet avek lavansman teknolozi, kominikasyon ozordi nou vwar ki poudir petet avan nou pa ti tro, tro okouran.

Me nou war ozordi ki poudir *sun, sea and sand*, pa zis Sesel be i dan bokou, bokou, bokou lezot pei bann lezot pti zil e zot osi zoli *in terms of sun sea and sand* parey Sesel.

E konpetisyon deor pou sa bann kalite vakans i enn ki for, for e sirtou ler nou koman en pti pei, koman en pti zil nou dezavantaze sirtou an term zistans avek bann *main markets*, par egzanp Lerop *mainly* Lerop, Lerop, Lanmerik me *mainly* Lerop.

E i fer ki nou prodwi i en pti pe pli eleve or petet mon kapab dir osi ser ki bann ki *compete* avek nou.

So i met nou dan en lot dezavantaz. Alors sa prodwi *sun sea and sand* i bezwen ganny *improve* lo la e *the traditional way of* fer biznes tourizm i pa ase Mr Speaker.

E enn bann lavantaz ki nou, nou annan enn bann lavantaz ki sirtou, taler Onorab Georges in koz lo *Jamaica*, ki sirtou bann pei *Caraibes* i annan, zot servi, zot servi bokou, bokou zot kiltir.

Senp, bokou senp. Me zot kiltir i atrakte en kantite bann dimoun ki sorti dam diferan parti lemonn.

Bokou Meriken aköz i dan zot *backyard* la zot sorti anler zot sot anba dan *Caraibes and they have a wonderful time zot enjoy sun sea and sand plus* kiltir, *plus reggae music comme* dir Onorab Georges *plus* bann lanmizik *la Caraibes, steel drum* e tousala.

E nou war ki mannyer sa bann pei in anmenn, in devlop

zot *Cultural Tourism* dan en fason kot zot ganny en kantite, kantite viziter menm sorti Lerop sirtou dan nou *Western Europe* kot i osi fasil pour *cross Atlantique* pou ariv koz zot.

So nou Sesel nou bezwen kapab osi *tap in* dan sa *market* aköz i en *market* ki annan en kantite dimoun ki apresye. E i disteng nou avek bann lezot pei bann lezot pti zil ki fer *sun, sea and sand*.

E mon krwar si nou met lanmen ansanm, nou vreman *focus* lo kwa ki devret ganny fer, mon pa war aköz nou pa kapab fer li.

Zis pour dir osi Mr Speaker, annou note osi ki i annan en kantite ki'n ganny er atraver *cultural tourism* dan lepase e i pa vedir ki nou devret aret kot nou'n arive parey Onorab Sandy Arissol in dir Bel Ombre pe fer en pe, me mon krwar nou kapab fer bokou plis ankor ki sa ki nou pe fer la.

E bokou plis dan en mannyer ki bokou plis Seselwa bokou plis artis, bokou plis mizisyen bokou plis kwizinyen bokou plis dimoun ki fer *performing arts* i kapab benefisy e anmenn plis larises parmi nou bann fanmir dan nou bann kominote isi Sesel Mr Speaker.

Lanvironnman sertennman Mr Speaker, i enn

bann domenn kot mon krwar nou'n fer en kantite nou'n tap ladan en kantite dimoun i vin Sesel pour nou labote natirel osi.

Ler nou pe koz lanvironnman nou pe koz osi nou laverdir nou bann *trails*, nou bann diferan keksoz ki nou kapab ofer touris an relasyon lanvironnman. Nou annan park maren nou bann Park Nasyonal, *Vallée De Mai*, Botanik, Fond Ferdinand, La Digue e tou sa.

Me sa valer azoute ki *cultural tourism* i donnen i anmennen i enn ki konsiderab e i ki parey mon'n dir nou bezwen kapab konsidere. Nou bezwen investir Mr Speaker dan *cultural tourism*. I bezwen annan en lenvestisman.

Si nou anvi ganny artizan ki fer bann pti zafer ki touris i aste i al avek dan pei i al dan son pei avek nou bezwen kapab investir dan zelev pou kapab fer sa bann pti *artifacts* Mr Speaker.

Nou bezwen kapab investir e nou bezwen konnen ki plan stratezi Departman Kiltir, Minister Ledikasyon i annan dan sa domenn.

Ok, ozordi nou pe fer bann lekol kot nou pe pran *TIVET* nou pe met li *S4, S5*. Pour kwa pa bann dimoun bann manrmay ki pa enterese dan sa bann zafer e ki kapab fer *sculpture* e ki kapab fer

bann pti lobze nou komans entrodwir zot sa boner Mr Speaker.

So sa i bann keksoz ki petet nou ti kapab koz avek bann *policymakers* ler zot vin la devan e demann zot sa bann kestyon e gete kote ki zot pe ale. E petet fer serten propozisyon avek zot.

Ler nou pe koz Mr Speaker, lakwizin, ki mannyer lekol tourizm ozordi pe entegre Kreol, lakwizin Kreol dan *training* i pe don bann kwizinyen? Bann zelev ki vin *study* lakwizin kot zot. Sa i enportan aköz si nou oule entegre sa nou bezwen kapab annan bann dimoun ki pran sa koman en profesyon.

Ler nou pe koz lo mizisyen, artis, nou pa kapab zis devlop bann dimoun ki tradisyonnelman in doue ek lanmizik. E sa zenerasyon pe ale pou ale pe fini, nou bezwen kapab *train* mizisyen fer bann dimoun lentere dan lanmizik e fer zot pran lentere dan lanmizik kiltirel Kreol Seselwa.

So tousala Mr Speaker, nou bezwen kapab war vizyon sa Gouvernman. Nou pa pe kapab war vizyon aköz nou pa pe war gran zafer. I annan en kantite proze ki'n ganny koze parey mon'n dir in ganny met dan manifesto in ganny met dan en bann lekritir, ki ozordi i pa pe ganny viv sa ki'n ganny ekrire.

Zot pa pe viv li e bokou dimoun ozordi deor i dezapwente, dezapwente aköz ler ou al demann Sekreter Zeneral pou La Kiltir en *gig* pou ou kapab zwe tel landrwa, i dir ou koumsa sa en lanmizik tapaz ou pa pe kapab vin zwe anvil.

Domaine Val Des Pres i dir ou koumsa pe fer bokou tapaz ou pe *disturb* li. So Mr Speaker si sa dimoun ki sipoze pe fer sa li menm li i pa pe war nesosite, be kote, ki mannyer nou pou avans sa bann keksoz ki pe ganny dir ki'n ganny dir dan Lasanble Nasyonal apre midi?

So i enportan nou bezwen investir. Nou bezwen kapab war plan Gouvernman. Mr Speaker, bokou sa bann zafer la i kout larzan e Gouvernman i bezwen annan en plan. Bokou sa bann keksoz i pa neserman anmenn rannman deswit.

Onorab Aglae in koz lo en *cultural village*; ki mannyer nou ankouraz dimoun pou investir dan en *cultural village*? Donn li en sit, petet *lease zero*, ou *lease* li en bout later pou 15 an, 20 an *at zero rent* zis pou li kapab *set up* sa zafer e anmenn valer pli tar.

Dan Lavil Viktorya, nou'n annan nou dimoun ki'n koz *about* Lavil Viktorya, ozordi Lavil Viktorya i reste mor apard sa "*I love Seychelles.*"

Lavil Viktorya i reste mor. Bann dimoun ki ti koz lo reviv Lavil Viktorya ozordi pa pe fer naryen Mr Speaker.

Pour kwa pa nou pa idantifye enn de trwa *spot* ancor? Pou ankouraz devlopman par egzanp bann landrwa manze, ki reflekte nou bann manze Kreol, nou bann landrwa kot nou pran en pti *drink*, nou fer landrwa fasilite *rent free* pou en serten peryod letan pou ankouraz sa bann biznes.

Tir bann, bomaten nou'n koz lo *licensing*, tir bann blokaz regilasyon kot i blok sa bann dimoun, fer fasilite li, *Public Health*, fasilite li pou li kapab *setup* sa bann pti zafer. Fer nou lavil vin vivan e nou ava war sa *real cultural tourism* kot touris i desann dan lavil.

Me tousala Mr Speaker, nou bezwen konpran plan Gouvernman. Si nou pa kapab konpran plan Gouvernman, nou pa pou bouze.

Sa bann dimoun ki anvi antre dan sa bann domenn, zot pa pou bouze e zot pa pou kapab investir aköz zot pa konnen plen kler lonterm. Mr Speaker ancor ler nou koz lo...

MR SPEAKER

10 minit Onorab.

HON WALLACE COSGROW

...ler nou koz lo *cultural tourism* nou bezwen rod en

fason Mr Speaker *rethink*, nou bezwen re mazine la; nou bezwen remazine e nou bezwen annan parey mon'n dir nou bezwen annan en *package* entegral lo ki mannyer nou fer sa.

From depi komansman lekol ziska kot sa antreprenner ler i antre da sa domenn, nou bezwen kapab marye tousala ansanm e nou bezwen kapab annan en plan stratejik lonterm *going forward*.

E sa Mr Speaker, nou'n tann dir taler ki nou'n ganny \$900 ekek milyon atraver *tourism*. Mon asir ou Mr Speaker, avek tou sa bann *added value* ki nou'n anmennen en pti pe larzan isi en pti pe larzan laba ki ganny depanse avek *cultural tourism* nou pou desote bokou plis ki \$1 bilyon Mr Speaker, an term reveni.

E sa ou konnen kot pou ale Mr Speaker? I pou al kot tou nou bann pti fanmir Seselwa, tou bann ki pe debrouye tou bann dimoun ki pe donn en koudmen dan sa lekonomi *cultural tourism*.

E nou tou nou pou *happy*, tou dimoun pou kapab annan en debousman e keksoz pou gou Sesel Mr Speaker.

Avek sa ma dir ou mersi bokou.

MR SPEAKER

Mersi Onorab. Onorab Monthy.

HON PHILIP MONTHY

Mersi Mr Speaker. Bonn apre midi Mr Speaker. In pran Onorab Bastienne avek son Mosyon la 5 er apre midi pou re *start* masin Lopozisyon lo zafer *cultural tourism*.

Akoz zot ti kapab anmenn Sekreter pour Kiltir la anndan osi pou demann li kekyon Mr Speaker, oye sey vin *hijack* en Mosyon pou sey fer li troun dan zot faver.

Mr Speaker, Mosyon anmennen par Onorab Bastienne pe fer referans avek premye pilye nou lekonomi. E parey nou konnen i sours reveni prensipal pou plizyer nou an frer ek ser ki par swa zot lanplwa oubyen zot biznes ki zot enplike ladan sa i zot form reveni ki zot gannyen.

Ler nou get Rapor Anyel Labank Santral Sesel 2023, Sekter Touris i kont pou 71poursan nou *GDP* ki souliny bon performans sa sekter e kot nou'n war la kantite reveni ki Lendistri Touris pe zenere ogmant par 5.8poursan oubyen \$989 milyon Ameriken an 2023 parey in ganny fer resorti pli boner.

Me Mr Speaker, ler mon pe koz lo lenportans Lendistri Tourizm pou lekonomi Sesel e byennet nou pep, i osi enportan pou nou reste

konsyans lo lenportans pou anmenn plis diversifikasyon dan sa sekter.

E fer sir ki dabor plis nou sitwayen i ganny sa loportinite pou aktivman partisipe e benefisye avek sa bann aktivite dan sa sekter e answit ki osi enportan, se pour ofer en pli gran varyete prodwi pou sa bann viziter ki swazir pou vin depans zot larzan isi dan nou pei.

E se sa ki Onorab Bastienne pe demann Gouvernman pou fer atraver son Mosyon la ozordi Mr Speaker. Mr Speaker, in deza annan plizyer demars dan sa menm laliny ki'n deza komanse.

E parey plizyer mon bann koleg in deza koze avan mwan, i deza annan plizyer keksoz ki pe ganny fer pou promot *cultural tourism* isi Sesel.

E Mosyon Onorab Bastienne pe ankouraz sa ki pe deza ganny fer e pe demann Minister konsernen pou kontinyen e fer en pe plis ankor ki sa i pe ganny fer dan sa menm laliny Mr Speaker.

En keksoz ki mwan mon'n enplike direkteman avek se, en seri rankont fer par bann zofisye *SIB* avek bann diferan Lotorite Distrik kot potansyel pou investir dan sakenn sa bann distrik ti ganny diskite e ganny dokimante avek le bi pou pli

byen kapab diriz bann lenvestiser e antreprenner dan sa bann domenn, ki annan potansyel pou devlope.

Pou Cascade mon rapel, mon ti fer resorti nou pa ganny konsidere koman en distrik touristik. Me kantmenm Cascade i en distrik ki annan serten potansyel. E dan nou kominote nou kapab anmenn touris aköz nou, nou ganny konsidere koman en distrik peser.

Parey in ganny fer resorti par Onorab Rocky Uranie lo lot kote lata, pour kwa pa nou anmenn bann touris avek bann peser Cascade al lev kazye, al partisip dan en pti sorti lapas avek zot. Ki sa ti en keksoz ki nou ti diskite lo la ki en aktivite *SIB* ki en aktivite ki kapab ganny devlope.

E mon pe demann Lotorite konsernen pou pran kont, Gouvernman azir koman en fasilitater pou nou kapab met sa an plas.

Byensir i vin avek serten lezot keksoz ou pou bezwen asir *safety* sa bann touris i annan plizyer keksoz ki vin avek. Me sa i en konponan ki kapab ganny devlope dan distrik Cascade.

Cascade i osi en distrik ki renonmen pou 2 *trail* Mr Speaker ki mon'n koz lo la plizyer fwa. E ki mwan personnelman avek mon lekip kot Lotorite Distrik nou pe sey

tou pou kapab valoriz sa 2 *trail*, i annan Mont Seber.

E i annan *Waterfall* ki ganny vizite, sirtou *Waterfall* i en pe pli fasil pou ganny akse avek li ki bokou touris i vin vizite. Me ki nou vwar, nou vwar plizyer fwa bann touris i perdi menm si i en *trail* ki difisil pour ganny akse avek li.

Nou pe komanse pou nou *de market* sa bann *trail*, mon'n al ek zofisye ki sorti kot seksyon *GIS* nou'n *login* sa bann *trail* nou pe travay lo bann *information board*, lo bann *signage* pou nou kapab endik touris ki mannyer pou ariv lo sa bann *trail* e parmi nou proze distrik nou pe aranz semen pou ariv anler kot *Waterfall*.

Me byensir sa travay osi parey pou Mont Seber ki en pe pli lwen i demann serten sipor sorti kot Gouvernman e osi kot sekter prive.

E la mon enplor Gouvernman pou azir koman fasiliter petet ant Lotorite Distrik avek sekter prive pour ki nou kapab anmenn zot *onboard* pou fer sa bann proze ganny realize.

Me selman Mr Speaker, parey Mosyon pe demande, i annan en nesesite pou nou bezwen vin pli aktiv e inovativ pour ki tou sa bann keksoz i kapab ganny arive.

E mon pou lans en lapel osi, kantmenm mon lans lapel

avek Gouvernman. Pour ki sak endividi osi i santi zot konsernen, i santi zot sot responsabilite pou kapab vin dan avek bann nouvo lide, bann nide inovativ pou kapab ede ki touris i ganny anmennen dan kominote e ki sa kote kiltirel i ganny devlope.

Mon'n koz lo kote *SIB* ki'n fer miting avek Lotorite Distrik mon ti antann Onorab Labrosse in koz lo la ki *PS* Touris ti koz lo la. I annan 5 distrik mon krwar ki zot in deza komans sa konversasyon avek, pou get potansyel sa bann distrik pou devlop sa sekter kiltirel.

E mon pou pouse ki sa i ganny fer avek plis distrik avek tou distrik. Menm si parey mon'n dir Cascade i pa to en distrik touristik me nou annan potansyel.

So olye 5 distrik, mon pou ankouraze ki sa konversasyon i ganny fer avek tou bann distrik pou nou kapab idantifye potansyel sa bann distrik. E fer ki tou bann partner tou bann *stakeholders* i vin ansanm pou nou kapab eksplwat potansyel, kiltirel tou sa bann distrik, pou fer sir ki touris i kapab frekant sa bann distrik, frekant kominote parey sa ti en swe Minister Tourizm en pe plis.

In annan sa randevou ki ti ganny lanse an 2023 *Creole Rendezvous*, ti en konsep ki ti

komans lo La Digue ler mon'n fer en pti resers. Me apre in al lo Praslin, apre in ganny lanse lo en pli gran lanpler isi Mae.

Mon ti a sizere ki parey Onorab Esparon in koz lo la, ki sa i ganny fer lo baz rezyon osi dan plizyer distrik, pou ede eksplor kwa ki annan dan sa bann distrik envit bann pti artizan pou ede fasilite akse bann touris dan sa bann lezot kominote.

Mr Speaker, mon pou koz rapidman lo bann mizisyen difikilte ki zot pe fer fas avek pou perform dan bann lotel ki nou'n tann ganny dir. Ki pa parey lontan, lontan ou al *Reef Hotel* dan Vandredi i annan *band Waves* nou tou nou pou apel sa lanbyans ki ti annan.

I demande pou retournen sa aktivite koumsa. Me i annan plizyer faktor pou pran knot ennler ou tann dir poudir mizisyen pe pran tro ser, i annan tro gran group zot ler zot kas sa larzan ki zot gannyen i pa sifizan pou zot. So i annan plizyer faktor ki bezwen ganny pran kont.

Me la osi mon a demann Minister konsernen, pou zwenn avek bann mizisyen, pou vwar ki bann difikilte ki annan pour ki kapab ganny adrese e fer sir ki maksimonm nou bann mizisyen i ganny sans perform. Menm si pa tou lotel me dan maksimonm lotel

posib osi kot kliyan i ganny akse avek nou lanmizik Kreol.

Pent; mon'n annan konversasyon avek 2 pent prominan Mr Alcide Libanotis avek Mr Egbert Marday.

Onorab Georges in koz lo la, nesosite pou annan en *art gallery* akoz sa 2 artis ti fer mon konpran poudir bann pli bon *artwork* nou bann artis nou bann *painter* Seselwa i kot pei i ale.

I en kestyon ki mon'n deza demande la dan sa Lasanble ki i annan en fon ki nou ale nou aste sa ban *best artwork* Mr Leon Ragedonde, *best artwork* Mr Egbert Marday ki i kapab ganny ekspoze dan sa *art gallery*, ki nou bann viziter i ava war le meyer nou bann artis isi Sesel.

I annan en kantite ki pe ganny fer Mr Speaker, me i annan en kantite ankor pou fer e se sa ki Mosyon Onorab Bastienne pe demande ozordi e mon pou apiy son Mosyon.

Mon pou ankouraz sa ki pe ganny fer *me* mon pou demande ki plis ankor i ganny fer pour ki sa *cultural tourism* i ganny devlope plis e ki nou *reap* son maksimonm benefis ki nou kapab, atraver sa bann aktivite e ki sa i benefisyé maksimonm posib nou bann zabitan e pei an zeneral Mr Speaker.

Avek sa 2 mo mon pou aport mon sipor pou Mosyon

Onorab Bastienne. E parey Onorab Sandy Arissol in dir, sa nespes Mosyon ki lot in vin avek nou'n zet li dan bannann. Mersi.

MR SPEAKER

Mersi Onorab. Onorab Pillay.

HON SEBASTIEN PILLAY

Mersi Mr Speaker. Mon pou komans mon lentervansyon avek sa 2 fraz swivan.

Dir sa ki zot pa fer me pa dir sa ki zot fer. Ou konnen se sa ki ilistre en pti pe karakter mazorite dan sa Lasanble e son lentansyon.

Ou ganny ou en propozisyon pou anmenn bann diferan akter dan kiltir, dan *tourism*, bann akter gouvènmantal pou vin devan e ou ganny en largiman ki dir nou pe demann avek Seselwa pou pran responsabilite. Be kisisa sa?

Nou pe demann avek Seselwa pou pran son responsabilite. Me selman enterven an ki fek koze, i pe demande ki mannyer bann peser pou al anmenn bann touris lapès; i pe demande kan eski pou annan en *art gallery*.

I pe koz lo difikilte pou bann artis perform dan bann lotel, kan sa bann larepons nou ti pou kapab ganny li atraver lekel? Sa bann dimoun

ki ti pou vin la devan sa Lasanble. Se sa.

E annefe Mr Speaker, mon ekout zot tou atantivman e zot tou ki mannyer zot in koze, zot in dir responsabilite i ek Gouvènmàn me selman zot, zot pa pare pou pran responsabilite pou anmenn Gouvènmàn la anndan, pou fer Gouvènmàn *accountable* pou sa responsabilite ki i annan. Zot tou zot per.

Onorab Porice atraver ou Mr Speaker, i dir prenon kont lenportans sa Mosyon, me selman premye dimoun pou vot kont Mosyon Onorab Aglae pou anmenn bann zofisye Minister Kiltir, pou vin zisteman eksplike ki mannyer zot pe fer *cultural tourism* marse pou Baie Ste Anne Praslin ki dayer ekstrememan enportan ki son lekonomi i a labaz i baze lo *cultural tourism* e premye dimoun pou lev lanmen pou vot kont.

Premye dimoun pou vot kont, be ki mannyer ou kapab koz lo lenportans en Mosyon, me selman ou pa kapab ou menm ou vin devan e koz avek ba akter bann dimoun ki responsab pou zot pran aksyon?

Bomaten Mr Speaker, mon ti dir zot, zot in pri dan 43 an e se sa ki pe arive Mr Speaker dan sa Lasanble.

Onorab William, atraver ou, i pa prezan dan Lasanble

ozordi, in anmenn konbyen Mosyon devan sa Lasanble? Konbyen son Mosyon ki Gouvernman in pran in fer keksoz avek? Ni enn, ni enn. Zero.

Nou, nou pe propoze fer keksoz diferaman, akoz nou'n war serten merit dan sa Mosyon ki'n vin devan Lasanble e alors nou'n propoz, nou'n donn en propozisyon baze lo tandans bann diskisyon i pe arive.

Akoz akfer ki nou pou koze dan sa Lasanble sepa ziska pres 6 er diswar, pou nou koz lo demann Gouvernman fer sa, nou devret fer sa, nou devret fer sa kan nou ti kapab anmenn Gouvernman e dir ek li poudir be *ok*, akoz bann peser pa'n kapab anmenn en dimoun en touris al lev kazye?

Akoz par egzanp bann artis napa en Galeri, nou ti kapab demann sa ban kestyon, me selman nou pa fer li akoz, akoz sa i en Mosyon ki nou bezwen zet dan bannann.

Annou mazine sa ki nou dir avan nou dir. Annou mazine ki nou dir. Konmsi mon ti a kontan ganny en konpran ki egzaktman zot pe propoze ek Seselwa atraver sa Mosyon, kwa ki nouvo? Tou dimoun in koz lo *cultural tourism*.

Mon krwar semenn pase ou 2 semenn pase Onorab

Aglae ti anmenn en kestyon pou demann Minis zisteman *regarding* sa zafer artis. Onorab ek son bann koleg Onorab ki'n koz lo sa size Onorab Monthly be i pa ti demann kestyon Minis, i pa ti koz lo la ditou.

Konmsi ki mannyer ou kapab vin dir poudir artis pe ganny problem pou performen dan bann lotel. Me selman ler nou oule anmenn bann antite Gouvernman pou vin la pou vin, pou nou kapab *tackle* bann pozisyon ki zot pe pran, pozisyon ki zot pe pran ki zot propoze pou fer, ou pa pare pou fer li, ou napa sa kouraz pou fer li.

Be mwan mon krwar Onorab pe ganny pri dan en keksoz. I pe bliye poudir li i pa la pou defann Gouvernman, me i la pou defann lentere bann zabitan ki'n elekte li bann dimoun ki'n met nou la koman Manm Lasanble pou defann zot lentere.

Se sa nou bi dan Lasanble Nasyonal. Me i paret poudir i annan en kote latib in bliye e pli keksoz pli bizar ki mon'n ganny dir pli komik, pli fer lapenn ki mon'n ganny dir ozordi ki nou'n ganny dir, ki nou en minorite pe sey *hijack* Mosyon en mazorite avek son refri ek tou son *linesman* ansanm.

Ki mannyer sa i kapab posib? I ti pou enposib pou

nou *hijack* en Mosyon *because* i zot zofisye ki pou vin dan Lasanble, i zot Minis ki ti pou vin devan Lasanble, i zot bann teknisyen ki ti pou vin devan Lasanble ki ti pou eksplike.

E ek zot mazorite zot Mosyon ti pou *still* pase, me selman ki ti pou'n arive, bann mizisyen ti pou konnen ki Mr David Andre pe propoze pou fer avek Departman *Tourism* pou fer ki zot ganny bann zwe dan lotel.

Pa pou konplent ler zot vin fer tapaz Au Cap me ki i pou fer pou dil avek ler zot anvi zwe dan bann lotel.

Bann artis ti pou konnen ki Mr David Andre zafer *NAC* ti pe fer pour ki zot kapab annan en galeri pou *display* zot travay.

Bann akter dan kominote ki annan bann group ki oule *involve* touris, ti pou konnen ki mannyer Minister Tourizm ti pe propoze pou *involve* zot; swa peser pou anmenn bann dimoun lapas swa lezot pou fer lezot aktivite.

Tou sa bann dimoun ti pou ganny lenformasyon konkret direk e nou ti pou kapab *hold* sa bann Gouvernman *accountable* pou son bann desizyon.

Be poudir ki se Seselwa ki bezwen pran responsabilite. Ki kalite konmsi ki kalite largiman nou oule avanse Mr

Speaker? Eski nou oubliye bann keksoz ki nou'n dir?

Mr Speaker, nou bezwen met en keksoz an perspektiv. Onorab Cosgrow in koz lo en keksoz enportan. Onorab Uranie in met lanfaz lo la e sa se *sun, sea and sand*.

Pandan 43 an nou'n fer *sun, sea and sand* e ou ganny en parti ki promet pou fer keksoz diferaman ki vin fer *sun, sea and sand*.

Naryen nouvo. *Nothing new, same old, same old*. Be ki pe arive? Ler nou, nou pe ofer *sun, sea and sand* nou pe sant laglwar nou pe ganny sepa konbyen \$milyon dan *satellite account* mon pou vin lo la en pti kou.

Moris pe fer 2 fwa pli byen ki nou, *Maldives* pe fer 2 fwa pli byen ki nou e nou, nou tap nou lanmen lo nou lestoman ar nou pe fer byen.

E prezan mon ti a kontan Lepep Seselwa i ekout mwan byen, si mon ekout sa Gouvernman byen nou pe ganny nou \$900 milyon pres \$1 bilyon atraver *tourism account* ki pe fer sitan tre byen. Be, be akfer i bezwen pran zot larzan taks? Akfer pri elektrisite i bezwen monte?

Akfer *welfare* ou bezwen ganny problem pour gannyen? Akfer zabitan Cascade i bezwen respe pou ganny en solisyon? Si pei i annan sa ta larzan? Sanmenm

ki mon'n dir, zot dir sa ki zot pa fer me zot pa dir sa ki zot fer!

Se sa nou problemn i nou annan devan Lasanble Mr Speaker. E atraver ou mon bezwen dir loter Mosyon ki son Mosyon i annan merit, i annan merit Mr Speaker e set aköz sa merit ki Onorab Aglae an bonn fwa, an bon fwa mon repete, an bonn fwa in propoze k bann teknisyen i vini pou eksplike.

Me zot, zot annan problemn zot. Ou konnen kan zot oule servi teknisyen zot, zot oule servi teknisyen ler i annan pou tir larzan dan pos Seselwa. Par egzamp, ler pou tir R1500 dan pos *carer*, dan pos *cleaner sorry*, ler pou tir R1500 dan pos *cleaner*, anmenn teknisyen.

Ler pou tir larzan dan pos Digwa ek Pralinwa anmenn teknisyen. Zot zistifye la.

Me ler pou obliz Gouvernman pou pran en aksyon zot pa pare pou anmenn teknisyen.

Mon ti anmenn en Mosyon pou obliz Gouvernman pou pran serten aksyon vizavi bann *commitment* ki i fer pa ti anvi anmenn teknisyen sa zour.

Sel keksoz ki mazorite LDS i fer byen dan Lasanble pep Seselwa in realiz sa e zot in bezwen realiz sa kler se dir Minis, Minis mon felisit ou pou

travay ki ou pe fer, nou zis felisit Minis.

Nou felisit tou Minis, zanmen nou kapab *hold* Gouvernman *accountable* pou desizyon ki in fer aköz, aköz sak fwa i annan en kestyon pou *hold* Gouvernman *accountable* ki nou gannyen, ki mannyer ti ganny fer dan lepase.

Be *look* lepase nepli la, lepase ti ganny met deor an 2020 e LDS ti antre o pouvwar e lobligasyon i oule ou fer keksoz pli byen e diferaman.

Nou pe koz *cultural tourism* dan en konteks kot nou war dimoun pe war zot ganny difikilte pou kapab fer *cultural tourism*.

Si ou la, la Beau Vallon la kantite problemn *planning* pe donn la mazorite bann antreprenner ki oule fer *cultural tourism* ou ava realize poudir be ki mannyer *cultural tourism* pe vin en lenposibilite pou bokou dimoun.

Mon'n tann Onorab Esparon koz lo Garry nou, mon osi mon kon Garry tre byen. Me lekel ki'n fer Garry sorti Beau Vallon? Me pa Gouvernman LDS. Lekel ki'n tir Garry lo devan lans Beau Vallon ki'n tir tou sa bann pti biznes ki ti pe ofer sa pti pwason griye ek sa pti lasos ki pou koul lo zot be pa Gouvernman LDS?

But let's talk about the reality to what you guys have done.

Arete konmsi pou vin devan Lasanble pou vin dir keksoz ki zot pa pe fer. Sa nou problemm Mr Speaker. Nou pe koz nou a reviv Bazar Labrin be anmenn zot la nou a konnen kote zot annan lentansyon fer Bazar Labrin. Kote zot annan lentansyon met sa bann pti biznesmenn. *But in fact* Mr Speaker.

MR SPEAKER

10 minit Onorab.

HON SEBASTIEN PILLAY

Mersi Mr Speaker. Mersi pou *remind* mwan. *In fact*, ler mwan mon ti anmenn kestyon pou demann Minis akoz i ti pe tir sa bann pti antreprenner lo lans Beau Vallon tou sa kote latab ti trankil, mon ki ti pe ganny blanmen pou anmenn kestyon. *US* ki ti pe ganny blanmen.

Mr Speaker, i pa Mosyon Onorab Bastienne ki pe fer masin *US* marse, se *US* ki pe fer masin *LDS* marse. E se nou ki fer sa Lasanble marse, akoz si nou pa ti la sa Lasanble ti pou zis en *rubberstamp*. Konpletman obliy son lobligasyon ki i annan anver Lepep Seselwa *and that is to hold the Government accountable*.

Mr Speaker, mon pou konklir lo sa pwen. Si Gouvernman e Parti Mazoriter i serye ek sa Mosyon nou pou anvoy sa Mosyon kot L'Egzekitiv, si i serye *then* demande dan son *Right of Reply* ki Minis i vin fer en stetment lo la e i vin eksplik nou ki i pe fer, ki i pou fer.

Si non pran nide Onorab Aglae e anmenn sa bann antite dan Lasanble Nasyonal e nou ava demann zot kestyon.

E parey mon'n dir toultan Mr Speaker. E mon pou repet ankor, avek *LDS expect the best but get the worst*. Mersi Mr Speaker.

MR SPEAKER

Onorab Loizeau.

HON NORBERT LOIZEAU

Mersi Mr Speaker. Bonzour tou dimoun. Bonn apre midi.

Mr Speaker, dan mon pti konversasyon ki mon fer avek Onorab Bastienne, mon'n konpran nide klerman ki Onorab Bastienne atraver son Mosyon.

Onorab Bastienne atraver sa bon Mosyon, enn; in anvi ki nou, nou fer bann propozisyon. Nou osi montre bann defi e nou gete kote nou kapab aranze e bouz devan koman en pei ki touris i en gran pilye dan son lekonomi.

E Mr Speaker, mwan Onorab Bastienne in dir mwan

fer egzakteman sa, fer propozisyon montre bann defi e gete kot nou kapab aranze.

Mr Speaker, Sesel nou ris dan diferan fason. Me pli gran larises ki nou met plis lenportans en bon pe letan Onorab Pillay in fer sorti sa se labote nou pei. *Sea and sun* Mr Speaker. In dir sa klerman.

Mon pe dir sa Mr Speaker, akoz laplipar ditan en bon pe letan pase mwan laplipar bann *advert* mon travay *SBC* pou 8 an laplipar bann *advert* se sa ki zot montre lo Sesel. Eski alor Mr Speaker, nou ozordi dan sa tan modern la eski nou pou kontinyen zis lo sa kalite fason koman en pei touristik?

Mon krwar non Mr Speaker. Alors la kot *cultural tourism* i antre. Nou bezwen osi Mr Speaker, kapab parey Onorab Bastienne in fer resorti pli boner azout lezot keksoz ki form parti nou lavi koman en pep Kreol.

E la Mr Speaker, mon anvi fer resorti mon anvi felisit en zournalis kot *SBC* Ms Barbara Hoareau ki ti en zabitan mon distrik Mr Speaker, pou tou sa bann program dan *Zil Pros* an *Mouvman* Mr Speaker, ki i pe fer kot i pe ede osi Mr Speaker pou anmenn devlopman dan touris e pou anmenn sa pilye lekonomi en pe pli devan.

Mr Speaker, ozordi nou annan en ta keksoz nou kapab koz lo la. Nou ladans par egzantp mon tann plizyer nou koz nou ladans, ozordi nou annan 3 zoli ladans nou, nou annan sega, kanmtole, moutya Mr Speaker.

Mon kontan ozordi i annan in dir kote nou pou ale pou al aprann sa danse, kote etranze ki vin Sesel ki vin Sesel ki anvi konn dans sa danse pou ale.

Mr Speaker, mon anvi demande kote ki annan en landrwa pandan tou sa bann letan, zanmen in annan en landrwa kot nou kapab al aprann sa bann danse.

E ozordi mwan mon pe dir avek bann dimoun kot *Kiltir* laba, annou fer sir ki i annan sa bann propozisyon ki pe met devan mwan, annou fer sir ki i annan en landrwa kot dimoun i kapab sirtou bann etranze ki anvi konn nou ladans kapab al aprann.

E ozordi Mr Speaker, nou ladans sega, nou ladans sega lontan ti popiler dan bann bal. Mon rapel bann letan avan Mr Speaker, ou pou rapel byen ti annan bann *clubs* partou anvil. Mwan menm pa fini konte la lakantite ki ti annan Mr Speaker.

E tousala i ti'n ganny zis disperse pou bann serten rezon Mr Speaker, akoz serten dimoun pa ti siport isi, alors

nou a donn ki en serten problem ki i a fermen. Ki a lafen Mr Speaker, ti annan en moman Viktorya ti *doom* pandan lannwit, akoz ti napa sa bann *entertainment* pou touris kapab vini e partisipe.

Nou lakwizin Mr Speaker, Onorab Georges in fer sorti en pwen, ozordi kote anvil ki ou pou ale pou ou kapab asize manz en bon manze Kreol apard bann *takeaway* ki plizoumwenn pe vann bann apard enn de bann manze Kreol labitid, zot pe vann bann lezot stil Eropéen Mr Speaker?

Botanik par egzanzp; Botanik i annan en restoran Mr Speaker, ozordi pourtan Botanik i en pwen enportan pou nou.

Annou zis gete ki kalite manze ki pe vann laba. *Chicken* panini mon pa ni konnen kwa. I annan en lot ankor la *chicken*, Mr Speaker mon menm pa kapab lir sa non, oli en manze Kreol lo la?

Pourtan Mr Speaker, i en landrwa ki touris i frekante e nou, nou bezwen ankouraz pour ki bann landrwa ki touris i frekant bokou, i annan zot kapab annan sa fasilite pou zot kapab ganny en bon manze Kreol.

Mr Speaker, i fer mon rapel ler mon ti al *La Chine*, Onorab Pillay pou mazin byen

Onorab Arissol, Onorab Herminie pa la.

Ti annan en moman Onorab Pillay ti anvi manz en *chips*, nou ti ale i ti gannyen son *chips* Mr Speaker, me kot sa *chips* pe vann sa pwa landrwa pti restoran ki pe vann zis manze Sinwan, akoz zot anvi ou pou gannyen ou *chips* me selman sa manze sinwan ki zot kiltir i pou bezwen annan plis. E nou isi Sesel nou bezwen ankouraze pou nu kapab fer sa.

Mr Speaker, pli boner Onorab Uranie in koz lo lapés artizanal. Ozordi mon dakor ek li Mr Speaker, lontan touris ti vini ti pran vwaye pou al La Digue, pou al Praslin ozordi touris i pran Cat Cocos, vwaye pa pe tro, tro war lenportans pou dimoun akoz tousala in ganny entrodwir.

Ozordi bann dimoun ki pe fer biznes lapés zot pe rod gro, gro bato pou fer *trolling*, en bon pe letan pe arive sa Mr Speaker.

Me akoz nou pa ankouraze ki nou fer sir ki lapés tradisyonnèl i form parti osi dan sa biznes, kot parey Onorab Uranie in dir kot sa touris i kapab al lapés ek son nilon e kekfwa ler i al kot li la i war son lanmen i an san i dir wi, mon'n al Sesel mon'n al lapés.

Mr Speaker, pirog, senn lasenn makro Beau Vallon Mr

Speaker, i en keksoz ki fodre pa nou les perdi sa, ozordi, mwan mon rapel ler mon ti pli pti toultan nou ti desann nou ti al gete, e ou mazine defen Francois Havelock ti la, li toultan i ti la lo lans pe sante pe donn son bann *tune* Mr Speaker.

E sa en keksoz ki fodre pa nou les tonbe. Ozordi si nou pa fer atansyon nou pa pou trouve sa e nou bezwen met lanfaz pran dapre konpran mon ti tann Onorab Hoareau pe konplent dapre konpran sel pirog en pirog ti annan zot ti pe servi in koule napa pirog pou fer sa lapas in koule.

E la Mr Speaker, mon anvi dir avek bann etablisman touristik dan sa landrwa Beau Vallon zwenn ansanm, ed sa bann peser pou kapab ganny en lot pirog pou zot kapab kontinyen avek sa tradisyon ki nou, nou'n kontinyen fer.

E la Mr Speaker, ler nou pe koz lo Beau Vallon pe al fer sa promenade la lo kote touristik sa en propozisyon ki mon pe fer, nou ti annan François Havelock. Lerwa Sega zot dir li Mr Speaker.

Lo kote touristik be pa ti a byen ti annan en kwen. Onorab Monthy ti pe dir mon sa taler kot ti ava annan en stati Francois Havelock kot bann santer lokal i kapab vini

ek zot gitar, pleg zot pti Speaker, zwe en pe lanmizik.

Akoz Beau Vallon i ranpli ek touris zwe nou ban lanmizik Kreol, bat en moutya Mr Speaker, sa se bann propozisyon ki mwan mon ti a kontan war Mr Speaker dan Sesel.

E en keksoz ki mon anvi aborde Mr Speaker, byento i pou annan sa proze *Waterfront* ki tonm dan mon distrik Bel Air kot vye *playground*.

Dapre konpran i sipoze annan en Vilaz Kreol Mr Speaker, mon anvi demande konbyen Seselwa ki'n montre lentere pou fer en devlopman parey la anba kot *Waterfront* Mr Speaker dapre konpran napa gran lentere parmi Seselwa pou zot antre dan sa biznes.

Seselwa nou konnen ki i oule, met en pti *food van* met en pti zafer vann manze. Kan sa Mr Speaker, i en proze i en gran proze, si zot kapab detrwa biznes met ansanm vini, fer vini *apply*, fer sa proze pe rode la pou fer.

E nou pe koz lo sa *sun splash* Mr Speaker, sa *reggae sun splash* nou koze bannla ler i al *Jamaica* zot tann sa lanmizik *reggae* zot *enjoy* labote *sun and sea*.

Nou osi nou kapab fer en *Sega Week*, lo lans Beau Vallon. Me selman Mr Speaker, parey *Jamaica* ler i

fer son *sun splash* son *reggae*
sun splash pa zis *sun and sea*
 i annan bann diferan kalite
 touris ki frekant sa landrwa, i
 annan bann touris ki vin laba.

MR SPEAKER

10 minit Onorab.

HON NORBERT LOIZEAU

Wi, mon pou al terminen.

MR SPEAKER

Mersi.

HON NORBERT LOIZEAU

Dan bann touris ki vin get sa
 bann *show* zot pa zis pe get sa
 bann *show* i annan i vini i
 servi en pti *joint* pou met en
 lefe, sa i kiltir laba *Jamaica*
 pou li kapab *feel* sa *reggae*.

Be nou Mr Speaker, nou
 kapab fer en *Sega Week* kot
 nou annan nou bann kalou pe
 vann e sa nou ti a kapab fer i
 dan sa Vilaz Kreol, kalou pe
 vann *Takamaka Bay* i a vin ek
 son zafer, en bon baka Mr
 Speaker.

Petet i annan bann
 etranze Mr Speaker, ki vini i
 anvii goute sa, kote i ale pou li
 goute, kot Bazar Labrin nepli
 annan. Mon pa trouve.

Mr Speaker, an
 terminan, an siportan Onorab
 Bastienne i enportan ki nou
 asire ki nou azout en pe lo sa
 ki nou pe ofer pou nou bann
 kliyan.

E pou sa arive Mr
 Speaker, mon dakor avek
 Onorab, an terminan avek
 Onorab Spiro nou bezwen la
 relev, nou bezwen la relev
 napa la relev sirtou lo bann
 ladan kiltirel moutya oli?

Mr Norville Ernesta in
 mor in al ek tou mon krwar i
 annan enn de pe kontinyen me
 sa ki ti enteresan Mr Speaker
 dan lanterman, Serzan i rapel.

Menm dan lanterman sa
 son tanbour ti rezonnen touris
 ti sorti lari bazar ti vin rode
 kwa ki pe arive dan legliz ti vin
 filmen Serzan i a demanti
 mwan, aköz? Zot anvii se sa ki
 zot anvii zot anvii war sa kiltir
 Kreol, sa fason viv.

Mr Speaker, pou nou
 annan la relev an terminan
 fodre nou annan plis
 formasyon, plis *workshop* pou
 nou bann zenn lo tou laspe
 kiltirel a en tre zenn az.

Ankouraz zot partisipe
 an terminan Mr Speaker, pli
 enportan Mr Speaker, anmas
 sa bann zenn donn zot
 louvertir asiste zot
 finansyerman dan nenport ki
 fason Mr Speaker, pou fer sir
 ki nou kiltir i reste alaflot pour
 ki zot osi Mr Speaker, an
 terminan zot a kapab ganny
 en dipen i a vin en form par zot
 gannypen.

Mon'n tann zot ti pe koz
 lo bann manrmay *TIVET* ki zot
 ava ankouraze pou antre
 ladan Mr Speaker. E i vin en

form par zot lavi e i vin en travay pou zot kapab kapab nouri zot fanmir demen, ler zot annan zot zanfan e viv an fanmir.

Mr Speaker, avek sa 2 mo mon anvè dir ek Onorab Bastienne son Mosyon i en bon Mosyon i en fason kot ou bann Manm nou kapab eksprim nou, dir nou konsèrn, fer propozisyon koz lo bann defi e sipòrt nou Minister pou bouz devan. Mersi Mr Speaker.

MR SPEAKER

Mersi Onorab. Onorab Gill.

HON CHURCHILL GILL

Mersi Mr Speaker. Bonn apre midi tou dimoun prezan e bann dimoun ki pe ekout nou.

Mr Speaker, sa Mosyon en Mosyon ki tre larz e i annan en lenportans tre signifikan. Me i domaz pa tou manm ki'n sezi dimansyon sa Mosyon e propozisyon ki Onorab Aglae ti met devan in mal ganny enterprete.

Akoz sa ti pou ed nou pou nou klersi bokou keksoz, ki Manm laba lot kote zot in koz lo la enkli bann manm lo mon kote ti ava kapab eklersi keksoz.

Me selman vi ki i annan bokou keksoz ki'n ganny dir mon pa pou al repet sa bann keksoz ma plito pran en

konteks ki pa ankor ganny koz lo la.

E petet bokou nou ava konpran, akòz ti pou enportan annan sa bann dimoun ki responsab konsèrnan kiltir pou kapab eklersi en pe oubyen donn direksyon bann dimoun ki ti pe partisip dan sa bann kalite aktivite, pou zot konpran ki vreman i annan la deor pou zot kapab al ver sa bann keksoz e enplimant zot bann nide ki zot annan.

Pou mwan sa Mosyon mon war 2 dimansyon ek li, i en Mosyon ki si i ganny fer byen sa *cultural tourism*, i kapab en sours ekonomi potansyel dan li menm, zis lo li menm i pou kapab anmenn bokou reveni ki petet nou pa pe vwar la ler nou pe diskite lo sa Mosyon.

Pou mwan premye dimansyon, i annan sa dimansyon tradisyonnel ki'n ganny bokou koz lo la, kot nou'n dir ki lontan nou ti vwar partou i annan aktivite; dan bann lotel ti annan bokou aktivite dan bann distrik e serten landrwa, plizyer landrwa dan pei.

Aktivite kiltirel ti vibre lo en nivo tre o. Me mon mazine si sa Mosyon in vini se akòz ozordi nou pa pe vwar sa bann keksoz. So si nou pa pe vwar, lala kot lenportans prezans sa bann dimoun ki pe responsab

sa departman ti pou zwe en rol.

Akoz nou bezwen konnen *take stock* be aköz ki nou pa pe vwar sa bann keksoz.

E en kote sa kestyon i pou avek bann artis zot menm, avek ban dimoun ki anvi vin devan avek bann nide inovasyon. Me lot kote sa kestyon se pour bann dimoun ki annan responsabilite ki pe ganny en saler, pou zot desarz responsabilite pou promot sa bann keksoz pou zot fer zot bout.

Se sa rezon sa propozisyon ti annan son merit, pa ti pou *hijack* Mosyon, pou plito anmenn plis laklerte pou tou ban dimoun ki bezwen sa bann laklerte e Bann dimoun ki bezwen sa ban kalite pratik ki nou annan en kantite Sesel e la ozordi nou pe realize ki lenportans sa ti kapab annan si i kapab ganny fer byen.

Dezyenm dimansyon i annan sa bout inovasyon e progresiv, si i annan en fason ki vi ki nou, nou depan bokou lo Lendistri Touris e i kler ki *tourism* dan lemonn i enn bann biznes ki tre gro.

Tou pei i pratik sa kalite biznes dan zot pei e ler nou pe koz ki nou, nou annan koman en pei, bokou pei i annan menm keksoz ki nou, nou annan si nou pe koz soley, si

nou pe koz lans, si nou pe koz lanvironnman.

Me si i annan en keksoz ki kapab *differentiate* nou pei avek lezot pei, se nou kiltir. Aköz nou kiltir menm si Moris i koz Kreol parey nou, i annan en diferans ant sa 2 kiltir menm si i koz en langaz ki preski parey.

Savedir i montre ou, ki kantite pouvwar kiltir en pei i kapab zwe e ki kantite potansyel ekonomik i kapab anmennen si i ganny fer byen. E tou bann akter ki sipoze travay ladan fer zot travay byen e la ki nou pou finalman kapab war rezilta ki en tel lapros i kapab anmennen pou nou pei.

Lo Praslin, nou annan dimoun ki'n al lo sa dezyenm dimansyon kot zot in deside kree e ler zot in vin ek zot nide devan e ler mon'n al kot zot mon vwar zot nide mon'n koz ek zot e mon'n demann zot be ki mannyer zot pou kapab bouz plis ki zot in bouze ziske la.

Rezon ki zot in met devan mwan se ler zot in anmenn zot nide devan kot Lotorite konsernen, Lotorite konsernen in fer zot konpran ki sa bann kalite inovasyon pa kapab ganny enplimante aköz i pa egziste anba okenn lalwa e zot pa kapab ganny en *licence*.

Premyerman sa i monte nou poudir si nou, nou pe dir dimoun antre dan sa aktivite *cultural tourism* e zot bezwen *innovate* natirelman nou bezwen espekte ki i pou annan nouvo nide ki pou vini.

Alors sa konsep kot nou pe dir dimoun vin devan sa dimoun in vin devan ek son nide li, me i pa kapab donn son lekor en *licence*. So lekel sa lot kote la, ki bor i tonbe?

Se sa ki Mosyon Aglae ti pe dir, annou anmenn sa lot bout ki zot, zot ki fasiliter e zot bann regilater an menm tan se zot ler sa bann nide inovasyon i vin kot zot e sa i a donn zot loportinite pou aziste zot Polisi pou kapab fer antre bann, akoz ler ou pe koz *cultural tourism* ou ekspekte nouvo nide vini.

So si nouvo nide pe vini sa bann dimoun i bezwen annan en landrwa kot zot pou ale pou kapab ankadre sa nide, fer ilegal e zot, zot kapab bouz lo zot bann pratik, lo zot aktivite ekonomik ki zot, zot in deside fer.

E ler i annan labsans sa lot kote ki fason ki nou pou *achieve* sa nide *cultural tourism* si nou napa striktir an plas nou napa lankadreman, oubyen nou pa oule ekout sa dimoun ki pare pou vin devan pou agrandi sa nide, an menm tann zot benefisye avek zot nide atraver bann reveni ki zot

pou anmase baze lo bann aktivite ki zot pe fer.

Alors sa i montre ki sa Mosyon se sa ki mon dir i annan en gran lenportans e son dimansyon i vas.

Me i zis domaz ki pa bokou nou ki'n sezi sa loportinite pou nou kapab fer en travay bokou pli benefisyab pou sa bann dimoun ki pe ekout nou ki ekspekte zot war en *way forward* pou zot kapab ler sa deba i fini vote i fini fer, zot konnen poudir be la pou sa kalite nide al kot mon kapab ale pou mwan kapab bouz devan avek mon proze.

E la ler mon pe koze ban Onorab sorti Praslin zot pou bezwen konnen nou annan en nide tre kreativ ki en imsye nou apel sa Zimbabwe sa landrwa, ki'n vin avek kot touris i kapab ale pou vwar *sunset*.

E i annan bokou bann keksoz antik ki met laba kot li me selman nou rod en *licence* i pa kapab gannyen an menm tan i rod en *licence* i pa kapab gannyen, an menm tan i rod en *licence bar* vi ki li i a pe vin ek en keksoz inovativ nou pa ekspekte i pou donn en prodwi parey en lotel.

Se sa ki i *cultural tourism*. Me i annan serten difikilte pou konpran sa diferans ant sa 2 kalite biznes e sa i fer ki bann dimoun ki vin devan si zot nide i pa pe reflekte nou bann

pattern ki nou abitye travay avek me sela an menm tan nou pe rod nouvo nide then zot pa ganny semen pase.

Alors mon krwar menm si sa nide pou anmenn sa bann dimoun pa'n ganny aksepte ozordi.

Me selman mon krwar a en moman donnen i bezwen annan en serten konversasyon lo sa nivo par bann dimoun ki responsab pou ankadre sa nide *cultural tourism* pou sa bann dimoun ki anvi devlop sa bann nide i a kapab war en semen pase pou zot. Mersi Mr Speaker.

MR SPEAKER

Mersi Onorab. Onorab Woodcock.

HON WAVEL WOODCOCK

Mersi Mr Speaker. Mr Speaker, ennler fransman mon pa ganny en sou konpran avek Lopoziyon. Bomaten fek vin en *Bill. Licences (Amendment) Bill* kot i fer provizyon bann *provisional licences* pou bann dimoun ki napa en ankadreman pou zot biznes dan pei.

Tou Lopoziyon Mr Speaker, zot ti vot kont sa *Bill*, la, zot ti *abstain* zot pa ti vot an faver Mr Speaker.

(Interruption)

MR SPEAKER

Order! Wi ou a korize mon krwar zot ti *abstain*.

HON WAVEL WOODCOCK

Zot pa ti vot an faver sa *Bill* Mr Speaker zot pa ti lev zot lanmen anler.

La Onorab Gill i vini i dir ou i koz lo sa imsye Zimbabwe kot in koz ek enn de dimoun ki zot pa'n kapab ouver zot biznes akoz zot napa *licence* Minis Devika i vin devan Lasanble pou fer provizyon en Lalwa en Lalwa pou ed sa bann dimoun kapab annan en ankadreman pou zot biznes.

Mr Speaker, i pa ti dan Lasanble bomaten Mr Speaker, ler sa Lalwa ti vini?

Konmsi ennler ou war lentansyon Lopoziyon i pa zanmen, zanmen, zanmen bon Mr Speaker.

Zot pe koz *sun, sea and sand; sun, sea and sand* Mr Speaker, sete vizyon Prezidan Mancham. Akoz sa bann letan la Mr Albert Rene ti dir koumsa poudir *tourism* pa nou diber. Me selman apre i ti retourn lo son parol Mr Speaker.

Mr Speaker, parey mon dir tou sa ki ou war Lopoziyon i vin fer i vin dir zot pa fer sa avek bon lentansyon.

Mon a donn ou en senp legzanp, dan en program politik ki mon fek gete i annan en *Leader* Parti Politik mon kapab mansyonn son non Mr

Patrick Herminie ti dir koumsa touris pa pe vin Sesel.

Selman la fek dan entervansyon avek Onorab Uranie in dir la, in dir koumsa dan son prop mo i dir touris pe pet plafon Sesel.

La Digue pa kapab get touris La Digue telman i annan touris La Digue Mr Speaker, i dir touris pe konplent ki bann pti baba dan *housing estate* pe *disturb* touris dan *guest house*. Be savedir touris pe vin Sesel.

Mr Speaker, napa okenn keksoz ki Gouvernman pou fer ki sa Lopozisyon ki la pou aksepte ki byen. Menm sa Mosyon ki Onorab Deshiela Bastienne in anmennen Mr Speaker.

En Mosyon senp ankouraz Gouvernman pou met plis lanfaz lo *cultural tourism* ki dayer in deza komanse.

Sa lamannman dan sa Mosyon ki Lopozisyon in anmennen i pa vin avek bon lentansyon Mr Speaker, ou konnen ki zot pe fer, mon konnen lekel ki par deryer sa, sa se pa lot ki zot *Leader* aköz 2 fwa zot in sey anmenn Mosyon pou *quash* 2 *S.I.* Mr Speaker, avek move lentansyon pou manipil e sey anbet Lepep Seselwa.

Ki nou fer Mr Speaker, aköz ti pe *distort* lenformasyon nou'n dir bann teknisyen vin

la devan pou vin eksplik sa bann *S.I.*, ki zot in fer Mr Speaker, zot ti *walk out* zot ti taye.

La en Mosyon, en Mosyon anmennen par en manm pou nou ankouraz nou Minister Mr Speaker, pour ki nou met plis lanfaz Mr Speaker pou met plis lanfaz lo devlopman *cultural tourism* ki en keksoz ki bon pou nou pei.

Mr Speaker, mon'n tann zot koz ar, Gouvernman zot pe donn en lalis keksoz ki Gouvernman in merit fer zot in la 43 an zot pa'n kapab fer sa bann keksoz. Zot pe dir Sesel i kapab vin en *Jamaica* zot be ki zot in fer tou sa letan?

Mazinen Mr Speaker, mwan mon ti dan Sizyenm Lasanble ler mon ti kestyonn Onorab Cosgrow Mr Speaker, lo bann fasilite pou ed bann artizan bann artis lokal vizavi *airport* Amitie.

Mr Speaker, papye pou sa proze in al devan *Cabinet* e *Cabinet* in aprouve pou annan en vilaz, en pti vilaz artizanal en pti vilaz Kreol pour ki bann artizan i kapab ganny en lespas bann *kiosk* kot zot kapab vann zot prodwi.

En landrwa kot zot kapab fer bann aktivite sirtou dan pti labrin soley kouse ki annan en zoli, ler soley i kouse i en landrwa ki vremen zoli kot pou plizyer lannen bann artis,

bann *craftsman* bann artizan pe demande.

Sa proze pe al vin en realite en keksoz ki mon rapel mon ti kestyonn Onorab Cosgrow ki ti Minis sa letan devan sa Lasanble mon kapab rod *verbatim* Mr Speaker.

Beau Vallon osi en proze konbyen lannen zabitan Beau Vallon Seselwa pe demande pou annan en landrwa en vilaz artizanal en landrwa touristik pour tou bann pti biznes i kapab vini vann zot prodwi, *market* zot prodwi.

Tousala pe materyalize anba Gouvernman ladministrasyon LDS Mr Speaker.

Si ozordi nou pou annan sa konversasyon ek *cultural tourism* si nou ti'n ekout zot ozordi Mr Speaker, nou ti'n fini faid. Nou pei ti pou pli dan en pli gro trou ozordi.

Annou mazine 2020 selman 114 mil 858 dimoun ti pe vin Sesel, lannen pase nou *target* ti 348 mil viziter Mr Speaker, nou ti ariv nou 350 mil 879 viziter gras a bann bon desizyon Gouvernman pou re ouver nou *airport* relans ou lekonomi Mr Speaker.

E sa lannen Mr Speaker, nou pe kas rikord ankor. Fevriye, Zanvye 2023 ti annan 23 mil 315 viziter ki ti vin Sesel, la Zanvye 2024 i annan 29 mil 66 viziter ki vin Sesel, 5 mil 751 viziter anplis in vin

Sesel an Zanvye 2024 ki an Zanvye 2023.

E Fevriye Mr Speaker, i annan en logmantasyon konpare avek lannen pase pran 3 mil 407 viziter e la nou pres 100 mil viziter Mr Speaker.

Bon desizyon nou Gouvernman ki ozordi in pe met zot pou kapab koz bon labous aköz nou Gouvernman se Gouvernman gras a ladministrasyon LDS ozordi Mr Speaker, ki sa Lendistri Tourizm in kapab redebout lo son lipye Sesel Mr Speaker.

Ki i pe fer ki touris pe pet plafon La Digue Mr Speaker, ki ozordi menm lakaz lisyen Onorab Uranie ki o bor en *guest house* pe *disturb* touris aswar Mr Speaker, telman Mr Speaker, touris pe pet plafon La Digue Mr Speaker, Sesel Praslin partou.

Mr Speaker, Praslin nou fer en kantite aktivite depi ler nou ladministrasyon in fer aktivite apre ki nou'n sorti dan COVID-19 Mr Speaker.

Culinary and Arts Festival in rebran lo Praslin. Ki mwan enn bann Manm lo sa Komite ki *Chair* Onorab Gill pa lo la Mr Speaker, nou pe al fer trwazyenm sa lannen.

Festival Kreol ki ti ganny fer lannen pase pli gro spektak ki ti ganny fer Praslin ki mon en Manm lo Komite Onorab

Porice osi in *join* sa Komite Mr Speaker.

Sa lannen *Culinary Arts Festival* pe al ganny fer lo en pli gro lanpler, i an aktivite ki vremen *successful*, tou le lannen randevou Praslin osi in ganny fer Praslin Mr Speaker.

En kantite aktivite ki mwan mon angaze direktman *to the extent*, kot mon'n tap laport nou'n ganny sipor enn de bann artis enkrwayab ki mon apresye zot en kantite.

Parey Rovin, parey Jimmy Pillay pou Festival Kreol, menm si nou ti napa en Bidze pou nou fer sa aktivite nou ti annan zis en Bidze pou fer spektak nou'n nobou kapab tap laport pou nou organiz bann tel aktivite.

La Avril *Culinary and Arts Festival* ki pou donn en lankadremman pou tou bann artizan bann artis lo Praslin Mr Speaker ki pou donn zot sa sans ganny sa *exposure* e bann konpetisyon lakwizin, kiliner konpetisyon *barman* e lezot aktivite Mr Speaker ki pou donn nou bann artis lo Praslin sa vizibilite.

Avek sa proze ki ganny aprouve par *Cabinet*, Amitie i ava donn bann artis, bann artizan bann *craftsman* sa loportinite pou annan en landrwa pou zot vann e *market* zot prodwi.

Mr Speaker, en kantite keksoz nou Gouvernman ozordi pe fer.

Sa zafer lamannman lo Mosyon Onorab Bastienne parey mon'n dir Mr Speaker, parey son labitid zot vey dan lapas dan goulo La Digue pou sey vin amann en Mosyon avek bon lentansyon *out of spite* Mr Speaker, *out of zis* Mr Speaker, akoz sezans zanmen zot annan lentansyon pou fer dibyen sa Gouvernman ki la.

E mwan mon annan en lapel pou mon fer avek zot Mr Speaker, faz ki nou'n arive ozordi la zot bezwen sanz zot mantalite annou vin avek bann keksoz pli konstriktiv pou ed nou Gouvernman bouz devan.

E en proze enportan li, me selman an menm tan nou bezwen osi vin avek bann propozisyon ki konstriktiv pou ed nou pei, pa tou keksoz ki nou bezwen zis vini kraze, opoze.

Se pour sa rezon Mr Speaker, ki mwan ozordi mon pou siport sa Mosyon anmennen par Onorab Bastienne akoz mon krwar ki *tourism* sa sekter i lo bon semen.

E an mezir ki nou anbeli li nou met plis lanfaz lo *Cultural Tourism*. E bann lezot kalite prodwi osi i annan bann zenn ozordi ki kontan vin dan en kalite *tourism* ki donn plis

entertainment ki pli *lively* en pti pe dan model *Ibiza Amsterdam* sa osi petet nou a kapab trouv en lespas osi pou nou annan sa kalite *tourism* osi.

Annou *diversify* nou prodwi pou fer ki tou sa bann etranze ki vin Sesel zot a war en lespas en fason ki zot kapab anmize, *enjoy* zot lekor e ki zot ava kontinyen vin Sesel ki nou ava ganny bokou plis etranze e touris ki vin Sesel.

Avek sa 2 mo Mr Speaker, mon pou siport sa Mosyon anmennen par Onorab Deshiela Bastienne. Mersi.

MR SPEAKER

Mon ava envit loter Mosyon Onorab Bastienne pou donn son repons lo deba.

HON DESHIELA BASTIENNE

Mersi Mr Speaker. Mr Speaker, apre ki mon'n ekout tou mon bann koleg Onorab koz lo sa Mosyon.

Premyerman, mon oule remersye zot tou pou bann nide, kontribisyon vreman valab e osi tou sipor ki zot in aport anver nou sekter *tourism*.

Mr Speaker, lentansyon mon Mosyon i tre senp; Mosyon pe demann avek Minister *Tourism* pou kontinyen avek son program

lo *cultural tourism* e ki nou tou koman Seselwa responsab i osi tre enportan ki osi nou zwe nou rol ver sa sekter a kote Minister *Tourism* an fezan bann bon propozisyon, koz lo bann defi e gete kote nou kapab aranze e fer li pli byen parey Onorab Loizeau in fer resorti.

Mr Speaker, i vreman enportan ki mon pas lo enn de pwen tre valab ki'n ganny sorti isi dan nou Lasanble pou montre nou vre komitman ek senserite akote Minister *Tourism* e fer ki Sesel i a vin en destinasyon pli meyer pou en vakans inoubliyab.

Mr Speaker, bann Onorab in mansyonnen ki i vreman enportan ki bann letablisman *touristik* i ankouraz bokou site vizit ki annan pou fer avek nou bann sit leritaz, dekouver nou bann *trail* kot touris i kapab fer bann zoli portre souvenir parmi lanatir e pran plezir pou ekout bann diferan son bann zwazo pe sante.

Mr Speaker, in ganny osi fer sorti ki i enportan ki nou osi enplik partisipasyon la komite kot bann gid i anmenn kliyan fer en letour dan la kominote e debiste lezot bann group kiltirel. Bazar artizanal e osi bann ladans vreman ritme anler dan leo.

Mr Speaker, fodre pa nou bliye nou kiltir kot bann

madanm ti griy zot kafe lokal e apre pile avek tou zot lafors.

Sa ti pou osi bon pou menm anmenn sa tel demonstrasyon, kot bann letablisman touristik dan bann zour spesifik kot nou les sa touris partisipe e apre i a profite pou apresye en pti tas sa bon kafe Kreol kot li osi in form par dan sa prodwi.

Mr Speaker, serten Onorab in osi mansyonn larg lanmen bann pti dimoun, ki oule fer bann pti *guest house* anler dan leo parmi lanatir kot zot kliyan i a respir sa ler fre, asiz anba sa pti lavarang pirman Kreol granmaten, admir sa zoli soley leve an ekoutan kok pe sante.

Ler mon bann koleg Onorab i don zot kontribisyon e koz lo bann pti *guest house*, i osi enportan ki bann propriyeter sa bann *guest house* i met a dispozisyon zot bann kliyan bann enfizyon lokal.

Montre zot kote zot plante, ki mannyer zot pou kiltive, pou fer zot prop pti enfizyon granmaten oubyen aswar avan zot al dormi tel ki avek sitronnel, gro bonm e lezot ankor.

Sa bann fason fer i a fer ki zot pe from vreman par dan nou kiltir Kreol. Mr Speaker, Onorab Labrosse in fer sorti en zoli pwen, tre enteresan pou fer ki en touris i komans

apresye son vakans e i devret osi kapab fer depi ler sa kliyan i anbark lo nou *airline*.

Kot bann dokimanter lo Sesel pe pase tel ki nou bann diferan *nature trail* ki egziste, bann *waterfall*, bann *boat tours*, nou moutya otour sa laflanm dife, Seselwa pe dans sega, nou bazar avek tou nou bann fri ek zoli pwason e la zot a fini pe komans fer zot plan depi lo avyon kote ki zot pou ale an premye.

3 lezot Onorab Mr Speaker, in met devan, zot in koz lo lapes artizanal ki touris i kapab al ganny sa sans al regard nou peser pe lev kazye e menm asiz lo bor pirog e apresye en tel aktivite e partisipe zot osi.

Mr Speaker, bokou lide tre enteresan in ganny met ater Onorab Samynadin enkli Onorab Aglae ek Onorab Cosgrow apre in sizer en Vilaz Kreol ki reste ouver e anime an plen tan, kot diferan animasyon pe arive an menm tan.

Tel ki manze Kreol pe ganny kwi, zi fri pe ganny prepare la devan sa bann touris, sa loder kafe lokal pe griye. Touris pe admir koko pe plise, lanmizik Kreol pe zwe, diferan lenstriman Kreol tel ki lakordeon, bonm ek zez, bann travay artizanal pe ganny fer, lapentir osi pe ganny fer.

E touris e nenport ki ler ki zot ava antre dan en tel *villa* parey satisfaksyon i garanti.

Sa madanm ki li i sorti avek son sak Kreol lo son zepol, sa msye avek son sapo lapay lo son latet.

Sa bann zanfan zot zanfan i sorti avek zot zoli kolye ek brasle fabrike avek nou bann diferan kalite lagrenn e sa i a osi fer touris depanse. Me depans lo bann souvenir diferan e inik.

Mr Speaker, i nou vin vreman serye e pli inovativ ver *cultural tourism* nou Lendistri Touris pou fleri plis ankor e sa pou ankouraz bokou e bokou touris pou kontinyen swazir Sesel pou zot vakans.

Mr Speaker, avek sa 2 mo mon oule asir Minister Tourizm ki konman bann Onorab e osi sitwayen tre responsab e tre konsernen anver lekonomi nou pei, nou pare pou donn nou Minister tou nou sipor posib dan sa travay nob.

Mersi ankor enn fwa tou Onorab pou zot kontribisyon vreman valab. Mr Speaker, aprezan set avek gran loner ki mon met sa Mosyon devan Lasanble pou nou vot lo la. Mersi.

MR SPEAKER

Mersi Onorab. Nou ava apel manm pou vot lo Mosyon. Manm ki an faver lev lanmen

silvouple. Mersi Manm ki kont?

Lo Mosyon ki'n table par Onorab Deshiela Bastienne ki lir;-

Prenon kont lenportans dan lekonomi Sesel, Lasanble i ankouraz Minister Touris pou kontinyen avek son program *Cultural Tourism* e devlop li plis ankor e i demann tou Seselwa pou vin pli aktiv e inovativ dan sa sekter ki annan potansyel pou anmenn benefis endividyel e pou nou pei an antye.

Lo sa Mosyon 20 Manm in vot pour, 0 kont e 10 in *abstain*. Alor Mosyon in aprouve par Lasanble. Mersi.

(APPLAUSE)

MR SPEAKER

Bon avek sa nou'n termin nou biznes pou ozordi. Mon remersye manm pou zot partisipasyon e Lasanble i ava *adjourn* e nou ava rebran Mardi prosen 9er. *Adjourn*.

(ADJOURNMENT)

